

NATIONAL ASSEMBLY OF SEYCHELLES

Wednesday 20th March 2024

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonjour tou Manm Onorab. Bonjour tou staff Lasanble e nou piblik ki pe swiv nou an deor. Byenveni pou nou travay ozordi. Alors au début pour marquer la célébration de la Francophonie, j'ai le grand plaisir d'accorder la parole aux membres du groupe d'amitié Franco-Seychellois pour un message au peuple Seychellois, les pays francophones de notre région et aux amis francophone dans le monde.

D'abord la parole a Honorable Kelly Samynadin et ensuite à Honorable Audrey Vidot.

HON KELLY SAMYNADIN

Merci Monsieur le Président. Monsieur le président de L'Assemblée nationale, mes chers collègues, chers téléspectateurs et auditeurs, bonjour. La Francophonie est

reconnue pour sa vaste population des femmes et des hommes partageant une langue commune - le français. Et la promesse de promouvoir cette langue, sa diversité naturelle et linguistique ; promouvoir la paix, la démocratie et les droits de l'homme.

Malgré qu'elle ne soit pas la langue la plus parlée, elle est cependant la langue la plus répandue et la plus enseignée après l'anglais. Cette communauté de peuple francophone comprend 321 millions de personnes, 88 états et gouvernements, 144 millions d'apprenant du et en français.

Elle est la quatrième langue sur l'internet principalement aux réseaux sociaux. Et plus particulièrement elle est la cinquième langue parlée dans le monde. Le thème accentué par l'organisation internationale de Francophonie pour cette année créer, innover, entreprendre en français, accompagnera également le Sommet de la Francophonie qui se déroulera vers la fin de cette année en France.

Cette orientation souligne les multiples opportunités et le dynamisme de l'espace francophone encouragent ainsi la créativité, l'innovation et l'entrepreneuriat.

Comme le vié de création d'emploi pour la jeunesse. En cette journée démarquant l'ouverture de la semaine de la Francophonie, j'envite au peuple Seychellois de profiter des activités qui sont organisées par le comité national de la Francophonie. Ensuite qui d'autre agence ou sociétés qui portent à la valorisation et la promotion de la langue française comme mission.

J'aimerais aussi solliciter au l'institution éducationnelle de profiter de cette semaine pour pratiquer davantage la langue française. Quelle que soit en classe, en recréation ou même dans la salle de prof.

Nous avons le privilège d'avoir le français à côté de l'anglais comme langue nationale et nous devons le valoriser de la même façon.

Vivre la Francophonie, vivre la langue française et bonne semaine de la Francophonie à vous tous. Merci.

(APPLAUSE)

HON AUDREY VIDOT

Monsieur le président de l'Assemblée nationale de Seychelles, mes collègues députés de L'Assemblée nationale, tous ce qui nous écoute, bonjour. La journée internationale de La Francophonie a été établie en

1988, dans le but de mettre l'accent sur le partage et l'appréciation de la langue française et de la culture francophone.

Pour commémorer cette journée, la semaine de la langue française de la francophonie a été créée en 1995 et célébrée du 20 Mars de chaque année. Cette année en 2024, la semaine de la langue française et de la Francophonie est célébrée du 16 au 24 Mars à fin de célébrer la langue française à travers de nombreux événements organisés en France et à l'étranger y compris aussi Seychelles où nous parlons également français.

Les pays francophones ont traditionnellement organisé une série d'événements chaque année, pour promouvoir la langue française, principalement à travers des activités culturelles où la langue française s'exprime.

Cependant cette année à l'approche des Jeux Olympiques et Paralympiques de Paris 2024, le thème choisi pour cette 29^e édition est sur le podium. On note entre le sport étant une discipline modalisée qui favorise l'unité pourquoi ne pas saisir cette merveilleuse occasion de souligner que des pays francophones peuvent défendre et promouvoir la langue française à travers le sport?

Ce sont tout le sportif de pays francophone partagé des messages inspirant atraver leur succès dans le sport, qui soit en brillant sur le podium, montrant au monde qu'ils sont de sportifs fiers pour leur pays et aussi pour tout le pays francophone. Le Seychelles ont toujours été reconnaissant de opportunités offertes aux sportifs Seychellois, pour perfectionner leur compétence atraver de sport dans les pays francophone.

Ces tipes d'opportunités devret continuer être considères comme une priorité, pour investir dans nos jeunes sportifs.

De plus, le Minister de Sport en collaboration avec le conseil national de sport, devret prendre la tête cette année pour partager de message inspirant avec nos sportifs locale atraver la langue française, en honorant le thème de cette année.

En conclusion, je saisi cette occasion pour souhaiter une bonne semaine de la Francophonie a tous les pays francophones en particulier au Seychellois, qui apprécie les avantages de parler couramment le français. Merci de m'avoir écoutée.

(APPLAUSE)

MR SPEAKER

Merci mes dames, les députées. J'ai le plaisir d'ajouter quelques mots pour conclure ces messages de L'Assemblée nationale.

La langue française fait parti de notre patrimoine culturel. Elle nous unit dans une grande famille des nations francophone atraver le monde. Cet héritage de langue et culture, constitue un grand parti de notre culture créole. Et elle est en lien ver nos voisin de L'océan Indien.

Il existe de nombreuse raison pour nous de célébrer cet héritage. C'est pourquoi nous somme fier de nous joindre aujourd'hui et pendant cette semaine à la célébration de la Francophonie. Notre groupe d'amitié Franco-Seychellois récemment réactives, s'est engager à renforcer cet aspect de notre identité.

Et nous somme heureux de les rejoindre dans cet effort. Donc, cette un immense plaisir pour moi, étant que président de L'Assemblée nationale d'affirmer une fois de plus, notre engagement envers la préservation et la promotion de la langue française, comme outil de communication dans nos écoles et nos institution à coté de l'anglais et du créole.

Pour conclure, j'aimerais rappeler a tous que cette célébration rend hommage à la

naissance de notre nation et que nous devons toujours rester digne de notre origine. Bonne fête de la Francophonie à tous!
Merci.

(APPLAUSE)

MR SPEAKER

Mersi les députées. Bon pou kontinyen nou annan lanons lo novo Manm Komite lo de kote lasal. Onorab Esparon *Deputy Whip LDS*.

HON REGINA ESPARON

Yes, bonzour Mr Speaker. Bonzour tou dimoun a lekout. Mr Speaker, nou pe zis enform *the House*, ki i annan en sanzman dan bann Komite avek antre novo Manm.

An Onorab Anne Bistoquet i pou en Manm *Standing Orders Committee* e koman en madanm otomatikman i pou en Manm *Women's Committee*. Onorab Georges Romain pe ranplas Onorab Samynadin lo Komite *MYCC – (Media, Youth, Sports, Culture and Committee.)*

Kant a Onorab Kelly Samynadin prezant in vin en Manm *Communicable Disease, HIV AIDS, SRHR Committee*. E osi i pe pran, an vi ki i pe pran, ranplas Onorab Bistoquet, i pe pran *Chairperson Human and Social Development and Special Program Committee* lo

nivo SADC PF. Mersi Mr Speaker.

MR SPEAKER

Mersi Onorab Esparon. Onorab Aglae.

HON EGBERT AGLAE

Mersi Mr Speaker. Mon a dir bonzour tou Manm Onorab e tou dimoun ki a lekout. *Caucus US* i anvi met devan sa bann sanzman lo Komite, Onorab Rachel Spiro pou form par otomatikman *Women's Parliamentary Caucus*. I pou osi form par *Media, Youth and Culture Committee (MYCC)*. E osi pou form par *International Affairs Committee*.

Ki fer ki Onorab Loze ki ti lo *IAC* prezant in donn laplas avek Onorab Spiro prezant i pou form par lekip Komite *Standing Orders Committee* e osi lo *Bills Committee*. Sa i lo kote *Caucus US*. Mersi.

MR SPEAKER

Mersi bann Whips. Sa bann lenformasyon i ganny mete a dispozisyon Lasanble e i neseser pou permet bann Komite repran zot travay. Bon, avan nou al lo biznes ki lo nou *Order Paper* Onorab Sébastien Pillay *Leader Lopozisyon* in demann mwan en laparol pou en *matter of privilege* ki mon pou akord li.

HON SEBASTIEN PILLAY

Mersi Mr Speaker. Bonzour Mr Speaker. Bonzour tou koleg Onorab. E bonzour tou dimoun ki pe swiv nou ozordi bomaten. Wi efektivman Mr Speaker, mon'n demann ou pou *raise* en *matter of privilege* vizavi en provizyon lo *Standing Orders* ki donn Manm en posibilite pou demann kestyon a en Minis pou rod lenformasyon, seek klarifikasyon e press Minis pou aksyon.

E osi anliny avek nou Konstitisyon ki prevwar ki i annan lib lekspresyon dan Lasanble; savedir *freedom of speech* dan Lasanble Nasyonal.

Mon le met devan ou Mr Speaker, ki yer pandan sesyon kestyon, ler Minis Fonseka in vin reponn en *PNQlo* size fiziad - tir fizi an relasyon ek loto Minis Hassan dan en *roadblock*, sa *statement* ki ti ganny fer ki sa *matter* i anba lenvestigasyon e ki *sub judice* i pa korek anliny avek bann prensip ki nou'n etabli dan nou demokrasi.

Pou en size *sub judice* fodre i annan en *case* devan Lakour. Mon soumet Mr Speaker, ki napa okenn *case* devan Lakour as we stand e ki sa *matter* alor i pa *sub judice*. E alors pou aplik *the sub judice rules* lo nou *Standing Order*, ti en vyolasyon privilez bann Manm dan Lasanble.

Dezyenmman Mr Speaker, an relasyon avek Minis servi lartik 19 nou Konstitisyon pou dir ki bann sa de zofisyen pou *involve* dan sa lensidan i bezwen ganny en *fair hearing* oubyen en *fair trial*.

Mr Speaker, mon le met devan ou ankor enn fwa ki laplikasyon lartik 19 in ganny mal fer dan sa konteks osi. Akoz sa de zofisyen in fini komans ganny pini. Le de zofisyen in ganny sispann *with half pay*. Alors Mr Speaker ki mannyer ou pou donn en dimoun en *fair trial* kan ou'n komans pini li?

Mon met devan Mr Speaker, poudir sa i en vyolasyon privilez Lasanble ki pa devret kontinyen. E ki Manm i devret ganny loportinite pou demann kestyon sirtou Mr Speaker, apre ki Sef Ziz li menm, dan en *statement* kler kategorik i ti dir poudir *the sub judice rule as it applies to the court* in ganny servi pou *stifle freedom of expression*.

Si Sef Ziz pe *allow* bann zournalist pou vin devan Lakour Mr Speaker, Manm Lasanble osi i devret ganny drwa pou demann kestyon ler en size pa *sub judice*. Mersi Mr Speaker.

MR SPEAKER

Mersi Onorab *Leader Lopozisyon.* Bann pwen ki ou'n leve i ase konsekan. Mon pa pou kapab donn en *ruling* lo la, la. Mon pou bezwen re egzamin verbatim Lasanble rikord Lasanble e osi konsider bann pwen ki ou'n leve an relasyon avek *Standing Order* e Konstitisyon. Mersi.

Bon, nou a prosede avek biznes ki nou lo *Order Paper* e sa se en Mosyon ki dan non Onorab Sebastien Pillay *Leader Lopozisyon.* Onorab Pillay ou a soumet ou Mosyon silvouple pou nou komans travay lo la.

HON SEBASTIEN PILLAY

Mersi Mr Speaker. Bonzour tou dimoun ki pe swiv nou espesyalman bann *cleaners* ki bokou zot in kontakte mon Mr Speaker. Mon Mosyon i lir koumsa;

In accordance with section 64(2) of the Interpretation and General Provisions Act, this Assembly resolves that S.I. 106 of 2023 is quashed.

An Kreol an akor avek seksyon 64(2) nou Lalwa lo Lenterpretasyon Zeneral, sa Lasanble i pas en rezolisyon ki S.I. 106 2023 i ganny anile. Mersi Mr Speaker.

MR SPEAKER

Mersi. Nou a ganny segonnman pou sa Mosyon silvouple? Onorab Spiro.

HON RACHEL SPIRO

Mon pe segonn Mosyon Mr Speaker. Mersi.

MR SPEAKER

Mersi. Onorab ou ava adres ou Mosyon silvouple.

HON SEBASTIEN PILLAY

Mersi Mr Speaker. Mr Speaker, mon ti a kontan ki avan mon konmanse pou efase ki mon konnen mon Mosyon pe pas dan en klima, kot tre prosennman avan ki nou fini debat lo merit mon Mosyon, mon pou ganny en Mosyon sorti lo lot kote latab, ki pou demann en *adjournment* deba e ki pou anmenn bann zofisyé Minister Finans dan Lasanble Nasional pou vin eksplike rezondet deryer S.I. 106 2023.

E pou osi reponn kestyon bann Manm ki, ki bann Manm i ava annan. Mr Speaker, mon le, mon le met lo rikord ki mon pa dakor avek sa prosedir. Mon krwar ki Gouvernman in ganny *ample time* pou li eksplik tou eleman sa S.I.

Ki tou *statement* ki zot ti bezwen fer avek bann *cleaners* zot in fini. Zot ti'n devret kontinyen angaz avek bann *cleaners* e bann dimoun ki'n ganny afekte avek sa S.I. pou asire ki sa bann dimoun zot

bann kondisyon travay i ganny respekte.

Gouvernman pa'n fer li! Zot pa'n onor lobligasyon. Zot pa'n onor responsabilite e zot pa'n onor *commitment* ki zot in fer ek sa bann dimoun. Alors mon war sa i zis en fason pou met en - si oule - en retar travay Lasanble e anpes Lopozisyon fer son travay, *that is to hold the Government accountable* pou son bann aksyon Mr Speaker.

Mon soumet sa devan ou, akoz mon konnen ki Prezidan Larepublik in osi fini dir dan son *press conference*, ki sa bann zofisyen Minister Finans pou vin dan Lasanble.

Alors Mr Speaker, mon bezwen dir mon pa pe pran lofans, me mon sirpriz ler mon'n tann ou dir ki ou'n demann Onorab Esparon e ou'n ganny enformen ki ankor enn fwa pou annan en Mosyon pou *adjourn* deba lo Mosyon ki mon'n soumet dan Lasanble, pou fer bann zofisyen Minister Finans vin dan Lasanble.

Mr Speaker, nou tou Seselwa nou konnen mannyer keksoz i marse. I paret mwan Mr Speaker, san ki mon *impute* en *proper motive*, i paret se Prezidan ki pou *dictate* ki mannyer Lasanble i travay aprezan. Mon soumet sa pou lepep Seselwa.

Mr Speaker, mon komans dan sa fason ozordi

bomaten, akoz mon ti a kontan fer sir ki nou ganny byen rezondet akoz mon pe anmenn sa Mosyon devan Lasanble Nasyonal. Mon ti a kontan ki tou dimoun i konpran tre byen akoz mon pe anmenn sa Mosyon.

Mon fer sa Mr Speaker, akoz sa i dan lentere lazistis sosyal pou sa bann *cleaners*, *Cleaners Corporative* - ansyen *Cleaners Corporative*. E i neseser pou nou pran sa an kont Mr Speaker.

Annou etabli en pti pe istorik otour *Cleaners Corporative*. Korperativ li menm ti ganny kree par en lord *S.I. 89 of 2009* anliny avek bann *restructuring* ekonomik Gouvernman, ok? E i ti vin an operasyon an 2010. Apre sa an 2010 ti annan en lord *S.I. 76 of 2010* ki ti set maksimonm nonm dimoun ki travay ek sa Korperativ koman 500.

Swivan sa, nou ti osi annan *the Corporative's Act 88* ki ti stipile ki bann akt bann kont e bann *statement* sa Korperativ i bezwen ganny *monitored* par Minister Finans.

Alors Korperativ ti ganny formen an relasyon avek restriktirasyon ekonomik e son kantite Manm ki sipoze annan maksimonm sete R500.

Me nou tou nou konnen ki o fil letan avek developman, avek sanzman, bokou dimoun

i al rod louvraz e Korperativ in grandi pou li annan over plis ki 600 Manm Mr Speaker; 600 *cleaners*, ki lamazorite ozordi Mr Speaker plis ki 250 ki travay dan lopital Victoria in bezwen pas dan en moman sitan difisil depi Desanm akoz zot saler in sanze dan en fason enkrwayab Mr Speaker.

Eski Gouvernman napa en konsyans? E ler in ganny demande sa kestyon dan son *press conference* Mr Speaker, Prezidan Larepublik dan plas reponn sa kestyon e dir pou ki rezon zot pa'n kapab pey sa bann *cleaners* lo kondisyon ki zot ti set.

Prezidan Larepublik i al dan rapor Oditer Zeneral poudir ki in annan en sitan kantite keksoz ki zot in war ki mal, ki zot ti bezwen ferm *Cleaners Corporative*.

Mr Speaker, tousala i enportan, akoz mon pe sey etabli en istorik ek sa ki'n arive avek *Cleaners Corporative* pou ki nou konpran byen.

Premye pwen Mr Speaker, pou mon demanti sa ki Prezidan pe dir dan son *press conference*. E i annan en tandans pou li *mislead* Seselwa, mon pa konnen akoz. Mr Speaker, desizyon pou ferm Korperativ ti ganny pran depi an 2021.

Mon annan en dokiman ekstre *speech* Bidze Minis Hassan an 2021, ki dir ki par

lafen lannen zot pou fini konplet travay lo lentegrasyon tou bann *cleaners* dan bann diferan departman Gouvernman kot zot pe travay.

Depi 2021 zot in deside pou ferm *Cleaners Corporative*. E tou sa letan zot pa'n kapab fer okenn travay, pou asire ki ler sa bann *cleaners* i bouz dan sa landrwa travay kot zot ale, zot ava al lo saler ki zot ti deza pe zouir dan sa landrwa travay. Depi 2021!

Sa pa fini la. An 2022 *Cabinet* i re vizit sa size, re vizit sa size e demande ki en odit i ganny fer. Odit i ganny konplete an Me 2023. Alors menm avan odit in ganny konplete Gouvernman ti'n fini pran son desizyon pou li ferm *Cleaners Corporative* Mr Speaker.

Sa i montre ou en Gouvernman ki pa serye; en Gouvernman ki napa lentere son pep a ker Mr Speaker.

Ki mannyer ou kapab kontinyelman koz lalang avek Lepep Seselwa e dir keksoz i en fason, kan levidans i montre tou diferan, tou le kontrer sa ki ou'n fer Mr Speaker?

MR SPEAKER

(Off-Mic)

HON SEBASTIEN PILLAY

Met ou *micro on*, mon pa tann ou.

MR SPEAKER

...lalang, bann zofisyen Gouvernman. So mon pou demann ou vey byen mannyer ou adres sa size. Ou kapab servi lezot term ki met sa pli byen an konteks. Mersi.

HON SEBASTIEN PILLAY

Mersi Mr Speaker. Mon kapab met sa pli byen an konteks, *ok?* Mon pa'n dir zofisyen Gouvernman mwan - Prezidan ki'n koz lalang!

(APPLAUSE)

MR SPEAKER

Onorab, sa i *imput, improper motives* lo Prezidan e ou napa dwa fer sa anba *Standing Orders*. Silvouple *retract* e re fraz ou *statement*.

HON SEBASTIEN PILLAY

Mr Speaker, mon pou *retract* mon *statement*; mon pou *retract* sa ki mon'n dir e mon pou sey dir li en lot fason. Eski si mon dir eski Prezidan i fer lekonomi laverite avek sa size *Cleaners Corporative* mon pou byen? Oubyen, eski si mon dir ki Prezidan pa'n dir tou laverite an se ki konsern *Cleaners Corporative* eski mon pou byen?

Mr Speaker, akoz levidans i la devan nou. *Following* sa nou ganny nou en miting ki ganny fer avek

Cleaners Corporative Mr Speaker. En miting ki ganny fer ki ganny *chaired* par - mon krwar lo *panel* mon rapel tre byen ti annan SS Payet e Madanm Mohideen.

E Madanm Mohideen i fer deklarasyon kler. *Ok* Gouvernman in deside pou li ferm Korperativ. I fer son prosedir; i fer sorti S.I. 126 2023 ki aparet Desanm 2023. I pa aparet avan *Cleaners Corporative* fermen, in aparet apre ki *Cleaners Corporative* in fermen.

Apre, savedir la deza Gouvernman in fer en aksyon ilegal Mr Speaker! Ou bezwen annan en dokiman pou ou efektivman pou ou ferm sa korperasyon. Ou bezwen annan en dokiman ki dir ki ou pe ferm sa korperasyon. Be ou dokiman i vin apre ki ou pran ou desizyon.

But be that as it may Mr Speaker. Zot in pran zot desizyon Lasanble pa ti pe pa'n kapab pran sa *matter* devan, devan nou pou nou kapab diskite.

Annou retourne lo sa ki pertinan, *ok?* Pandan sa bann sesyon ki zot in fer avek bann *cleaners*, bann miting, bann *cleaners* ti demann kestyon *regarding* zot saler.

Ki pou arive avek zot saler? Ki pou arive avek bann kondisyon travay? Dan en deklarasyon kategorik ki

Madanm Mohideen ti fer, i ti dir ki zot pou respekte bann kondisyon saler ki bann *cleaners* pe enport sa ki arive. Respekte zot kondisyon.

Be eski respekte zot kondisyon, se ler en dimoun pe ganny li ozordi R10 mil al *end up* ganny li R10 mil 900 - i *end up* ganny li R9 mil 500? Se sa respekte? Se sa respekte?

(APPLAUSE)

HON SEBASTIEN PILLAY

Eski respekte se ler en dimoun i perdi R1500 lo son saler.

Mr Speaker, mon annan en *pay slip* avek mwan la. Mon a montre ou ki mannyer zot in respekte pou menm dimoun. *Ok?*

(comments off-mic)

HON SEBASTIEN PILLAY

Ki ou problem si i en Sekreter seksyon?

(comments off-mic)

HON SEBASTIEN PILLAY

Ki ou problem ki en Sekreter en seksyon?

(Interruptions)

MR SPEAKER

Silvouple, *order!* Bann Manm silvouple aret enteronpe. Les

(comments off-mic)

MR SPEAKER

Aret enteronpe. Mwan ki pe diriz Lasanble. Silvouple.

HON SEBASTIEN PILLAY

Mr Speaker, mon pe *raise* en pwen pou en dimoun ki'n arriv en problem ek li, zot pe rod mwan Sekreter seksyon. Mwan pe enport si ti en Sekreter seksyon, oubyen, oubyen aktivis *LDS*, i en *cleaner* i santi poudir...

MR SPEAKER

Ale fer ou largiman Onorab.

HON SEBASTIEN PILLAY

... in ganny afekte. Annou get byen Mr Speaker. Mr Speaker, saler orizinal sa dimoun i ti ganny li en *personal salary* R8 mil 37 *responsibility, inducement, shift, long service*. Tousala in ganny *amalgate* - serten in ganny *amalgate* apre sa.

Son *final net* sete R10 mil 985. Apre fermtir Korperativ son *final net* i vin R9 mil 926. Sa i en legzanp ki mon annan. Mon annan plizyer lezot legzanp kot i annan dimoun ki'n perdi ziska R1500.

Alors Mr Speaker, mon bezwen demann mon lekor eski sa *statement* ki Madanm Mohideen ti fer, i en *statement*

ki onor lobligasyon
Gouvernman?

Akoz zot pa'n fer li apre Mr Speaker. Me sa nou a pli lwen Mr Speaker, annou al pli lwen annou regard ki ti arive. *Following that* pandan deba lo Bidze Mr Speaker, mon demann avek en, avek *panel* ki ti enkli Madam Mohideen, si kondisyon travay bann *cleaners* pe sanze?

E mon ti ganny reasiran avek Minister Finans poudir sa i pa leka. Malgre ki konsekaman mon apre kontakte Minister Finans e donn zot levidans poudir sa pe arive dan bann serten landrwa travay.

Be alors Mr Speaker, si sa *S.I.* pou stand ki nou ferm Korperativ, *then* i bezwen annan sanzman ki ganny fer ek sa *S.I.* I bezwen annan en sanzman fondamantal ki bezwen ganny fer ek sa *S.I.* pou protez kondisyon travay bann *cleaners* ozordi. Se sa lesansyel ki nou pe met devan Lasanble.

E si ou a permet mon Mr Speaker. Sa i al dan laliny lazistas sosyal ki nou pe rode pou sa bann *cleaners*. Mr Speaker, apre ki Gouvernman in fer tousala, mon'n dir be *ok let's assume* poudir Gouvernman pa'n fer fot, annou zis dir Gouvernman pa'n fer fot.

Annou regard ki mannyer Gouvernman in tret tou lezot *repeal* ki in fer. Tou lezot landrwa kot in *repeal* en Lalwa. Mon annan devan mon *National Aids Council Repeal Act*.

Dan sa *National Aids Council Repeal Act* lo son clause 3 i dir koumsa "notwithstanding any law under Public Service Orders en dimoun ki anploye avek *National Aids Council* anba seksyon 22, pou kontinyen son lanplwa," ok? E lo bann kondisyon ki *no less favorable than those subsisting immediately prior to the date of the repeal*.

Savedir dir li tou son bann kondisyon travay dan Lalwa in mete pou ganny respekte. Pou *cleaners* nou pa kapab fer?

Mon annan devan mwan Mr Speaker, *National Agricultural Agency Repeal Act*. Ankor enn fwa lo son seksyon 3 kontinyasyon lanplwa; ankor enn fwa nou dir Mr Speaker, "notwithstanding any law a person employed with the Seychelles Agricultural Agency on the date of the repeal of the Act shall continue his or her employment with Government on terms and conditions no less - no less favorable."

Savedir menm kondisyon travay ki ti egziste avan ki sa i

ganny *repeal*. Pou *cleaners* nou pa kapab fer parey?

Mr Speaker, mon annan devan mon *repeal APDAR* seksyon 3 kontinyasyon of employment. "Notwithstanding any law a person employed with the prevention of drug abuse rehabilitation center, pou kontiny son lanplwa on terms and conditions no less favorable."

Ankor enn fwa menm kondisyon travay than those subsisting immediately prior to the date of the repeal. Be ki sa eski *cleaner* i tro fay ki nou pa kapab met menm clause dan sa *repeal* Mr Speaker?

La, la *repeal* Korperativ "in the exercise of the powers conferred by section 16." So annou regard diferans Mr Speaker ki egziste prezanz, dan lafason ki nou'n *repeal* Korperativ.

Anba bann pouvwar ki'n ganny donnen, Minister responsab pou Finans savedir Minis, menm Minis ki ti involve dan loto taye dandan...

MR SPEAKER

Sa napa nanryen pou fer avek ou size Onorab.

HON SEBASTIEN PILLAY

Mr Speaker, be mon pe montre en *pattern* konportman la.

MR SPEAKER

Wi koz lo ou S.I.

HON SEBASTIEN PILLAY

Sa lord i ganny site koman *Cleaners Corporative Dissolution Order*. Nowhere dan sa lord ki nou mete, ki bann *cleaners* pou kontinyen ganny anploye lo bann kondisyon no less favorable than those subsisting before the repeal.

(APPLAUSE)

HON SEBASTIEN PILLAY

Sa mon problem Mr Speaker lazistis sosyal pou bann *cleaners*! Se sa ki fer mon koz ek sa kalite pasyon ki mon pe koz avek bomaten Mr Speaker.

Akoz nou'n swazir en group dimoun ki nou krwar pa kapab defann zot lekor e nou krwar nou kapab fer sa ki nou anvi avek zot.

Mr Speaker, si sa S.I. i retournen avek sa clause ladan nou satisfer kondisyon saler sa bann *cleaners*, san ki sa bann dimoun i bezwen ganny dir verbalman par Prezidan Larepublik a de repriz, ki nou pe aranz zot saler.

E ler i ganny demande menm kestyon par zournalist, i say kestyon e dir poudir ti annan en bann zafer pe pase kot *Cleaners Corporative* ki en bann lalang Mr Speaker - mon

bezwen dir Mr Speaker, poudir sa Gouvernman pa serye! Zot pa serye Mr Speaker.

E i pa kapab zis nou ki bann *cleaners* i vin kot nou. I pa kapab zis nou. Oubyen mon bezwen dir Mr Speaker, eski i annan de tim foutbol vid avek refri ek *linesmen* lot kote latab! Mon bezwen demande Mr Speaker, akoz mon bezwen zot sipor pou fer Gouvernman retournen e aziste sa *S.I.* pou fer sir ki kondisyon sa bann *cleaners* i ganny respekte.

Se sa nou problem dan Lasanble Nasyonal konmela Mr Speaker. *This is our* problem. Nou annan en Gouvernman *who lacks tolerance, who lacks compassion e is arrogant with power! Arrogant with power* Mr Speaker.

En Minis pou Finans pou tou larestan dimoun ou kapab met en *clause* pou protez zot saler, me selman pou *cleaners* ou pa kapab mete? En Sef Servis Piblik ou dir bann kondisyon pou ganny respekte, ler kondisyon pa ganny respekte, ou pa vin devan pou koze poudir ki'n arive, pou fer fason ki bann kondisyon i ganny respekte.

What is this Mr Speaker?
Is this change? Se sa sanzman? E sak fwa ou anmenn en Mosyon koumsa, zot vir lo mwan. Zot le fer Mosyon *to adjourn* pou

anmenn bann zofisyen dan Lasanble. Nou, nou per teknisyen! Nou per isi, nou per laba. Be zot ki mazorite, *do your job!*

Nou tou nou ganny peye koman Manm Lasanble pou fer nou louvraz nou lo sa kote latab nou pe fer pou nou.

(APPLAUSE)

HON SEBASTIEN PILLAY

Zot osi fer pou zot. *That's what it comes down to* Mr Speaker, fer letour, rod leskiz blanm tou dimoun isi, laba - Mr Speaker, pa pou *get* nou *anywhere*. *Unless* nou fer sa Gouvernman *accountable* pou son aksyon larogans pou sot *board*.

Mr Speaker, mwan, mon war li koumsa mwan. Ler sa journalis ti demann Prezidan Larepublik sa kestyon, premye keksoz ki i ti devret aksepte, poudir gete nou'n fer en fot, bann *cleaners* zot saler pa ti devret sanze; zot kondisyon travay pa ti devret sanze e alors nou pou aziste sa. I fer sa *statement* dan Lasanble, me selman an aksyon keksoz pa ganny fer. *What is this?*

Se sa nou problem e ler mon poudir li i - ou konnen ki mon pe sey dir - ou dir mwan pa dir mon pa kapab dir. Zis parey *container* leksplozif ennler lakle i ek Larne, ennler lakle i ek Lapolis; ennler lakle i isi e ler ou koze tou dimoun i

lev lavwa ar pa dir nanryen lo la. Be kan eski zot pou *hold* zot prop Prezidan *accountable* parey zot ti dir dan kanpanny?

Kan eski zot pou fer zot louvraz Mr Speaker?

(comments off-mic)

HON SEBASTIEN PILLAY

Be then, mon a fer pou ou Onorab mersi. Mwan, mon a fer pou ou. Mon a pran ou saler mon a donn sa bann *cleaners* e ou, ou ava fer ou louvraz. Mr Speaker, nou bezwen regard larealite an fas e levidans i devan nou poudir nou Gouvernman in fer en fot.

Gouvernman pa'n onor en lobligasyon. Gouvernman ti devret met an plas en *clause* ki pou dir, poudir sa bann *cleaners* pou al dan bann lorganizasyon e zot bann kondisyon pa pou *no less favorable* e zot bann kondisyon pou parey. Be akoz i pa'n fer? Akoz pou *cleaners* i *ok* pou fer desann zot saler?

Be mon a dir zot akoz? Be akoz Prezidan in deza dir li, in deza demande ki sa ou pou fer *cleaner* vin Prezidan? Si ou regard en dimoun ki netway ou biro, kit li prop met tou keksoz annord dan sa fason Mr Speaker, byensir ou pa pou war lobligasyon pou ou asire ki ler ou sanz son kondisyon travay, son kondisyon i reste parey.

Blanm Prezidan Albert Rene mannyer zot anvi - anba Gouvernman Albert Rene sa zanmen ti pou arive!

(APPLAUSE)

HON SEBASTIEN PILLAY

Fer sa ki zot oule, dir sa ki zot oule sa zanmen ti pou arive! Anba en Gouvernman US sa zanmen ti pou arive!

(APPLAUSE)

HON SEBASTIEN PILLAY

Mr Speaker, nou bezwen regard larealite an fas. Si Gouvernman in pran li en desizyon Polisi pou li ferm Korperativ ti son desizyon Polisi, i Gouvernman dizour i annan dwa met son Polisi an plas, nou kapab proteste, fer sa ki nou anvi fer son desizyon Polisi.

Me ou Polisi pa kapab LDS pou tou son milyonner! Zis regard dokiman *Tender Board* zot a ganny en konpran ki pe pase dan sa pei. Sey dir mon sa ki zot anvi nenport dimoun ki pou regard sa dokiman *Tender Board*, pou war kote tou gro kontra pe ale. E zot a vin dir nou? Be nou annan en problem dan sa pei Mr Speaker!

Be ladan menm, sa bann nou asire ki zot kontra zot gannyen nou asire ki zot larzan ki zot gannyen, pou en

pov *cleaner*, nou pa kapab protez son saler - sa nou problem. So kote nou pe ale Mr Speaker, si Lasanble Nasyonal pa kapab dan en lavwa for e ferm, *call to order* Gouvernman e dir ek li al revwar sa S.I. ki la.

(APPLAUSE)

HON SEBASTIEN PILLAY

Mr Speaker, lesansyel mon Mosyon i senp - tre senp; remet sa bann *cleaners* lo bann kondisyon ki zot ti lo la. E asire ki tou zot kondisyon pa ganny sanze, pou ki i vin defavoriz pou ki i defavoriz zot. Se sa lesansyel mon Mosyon napa nanryen plis ki sa.

Mon pa pe vin rod okenn lezot keksoz mon pe rod sa. *Whatever* reaksyon ki nou pou gannyen avek *expert* eksetera, lefe i reste ki dan sa *clause* napa sa. E mon pa trust Gouvernman *LDS* pou onor son parol Mr Speaker! Mon pa *trust unless* i an nwani ek blan.

E menm ler i an nwani ek blan i le sey pa, pa onore me *at least* nou a konnen ki nou annan en keksoz pou anmenn li Ankour avek pou dir la, la ou ti mete ant nwani ek blan, ou pou onor mon kondisyon travay, me ou pa'n fer li ozordi bomaten. Se sa ki nou pe rode ozordi bomaten.

E ler ou'n dir nou ou'n konsilte e zot konnen poudir Mosyon pe vini Mr Speaker, nou tou nou konnen Prezidan ki'n deside e zot pou anmenn zot bann eksper.

Alors Mr Speaker, ler mon regard sa sityasyon mon demann mon lekor en kestyon tre senp. Si en *cleaner* ti *actually* anploye avek sa bann Lazans parey *APDAR*, parey *AIDS Council*, parey *SAA*, i ti anploye sa letan e ou ti pe *repeal* Lalwa.

Obviously, ou ti pou bezwen onor son kondisyon anba sa Lalwa. Se sa ki dimoun i bezwen mazinen Mr Speaker, lardaz Kreol i dir ou, dikton Kreol i dir ou, poudir tou travay, tou metye i annan son valer ki ou peser, ki ou *cleaner* ki ou Dokter, ki ou travay dan biro.

I parez ozordi Sesel zis sa ki travay dan biro ki annan en valer? Zis sa ki annan milyon ki annan en valer? Ou pa kapab mars de pa ozordi dan nou pei, kot en dimoun i dir ou li i fer aplikasyon pou tel landrwa i pe esper trwa, kat semenn pou ganny larepons.

En lot gro msye i pase dan loto, li in dir ou in fer aplikasyon in *call*, in *call* Sef direk tou zafer in *ok*. Se sa ki pe arive dan nou pei. Konmsi mon bezwen met en kosyon lo nou. Mon bezwen dir be kot nou pe ale? *Nepotism* ek

cronyism in retournen avek en vanzans dan nou pei.

Nou defann bann aksyon ki bann o zofisyé Gouvernman i fer san reprimann zot. Me sa i pli move ki *one party state* sa! Pli move ki *one party state* Mr Speaker! E ler ou kestyionnen ou ganny problemm e dan en fason endirek ou fanmir i ganny targete.

Ou zanfan i ganny targete, ou telefonni i ganny ekoute - konmsi *what exactly do we want?*

MR SPEAKER

Onorab, ankor enn fwa, alegasyon en kote ou lot nou kapab, ou kapab fer ou deba san anmenn bann alegasyon, ki mon pa krwar ou kapab soutenab, mon pa war li soutenab. Mersi.

HON SEBASTIEN PILLAY

Mersi Mr Speaker. Mon pou ekout ou *ruling* mwan. Konmsi mon kontan ler ou dir mwan, mon pa kapab anmenn keksoz ki soutenab. Me pou Lasanble pou ou menm i paret napa nanryen tou kritik lo Gouvernman pa soutenab.

Pa kritik Gouvernman pa dir li kot i mal, pa dir li kot keksoz pa pe marse dir li tou keksoz i byen. Anmenn tou Minis isi tou le Mardi ek Merkredi dir li li felisitasyon Minis mon kontan mannyer ou pe travay. Me apre deryer

rido ou dir mon'n *call* Minis e Minis pa'n pran mon *call*.

Mr Speaker, se sa realite. Mon pe penn en *pattern* e realite dan Sesel ozordi kot nou pe viv kot nou annan en Gouvernman ki napa en sans direksyon. Kot ler pou li *provide* lazistis sosyal pou en group dan lasosyete, ki li i annan en lobligasyon konstitisyonnel, en lobligasyon moral pou li *provide* proteksyon pou sa group Mr Speaker.

Kot bokou nou, nou fanmir ti komanse Mr Speaker. Mwan, mon granmanman ti *cleaner* dan lakaz kot Msye Mancham. Ozordi mon'n arrive vin en MNA Mr Speaker e mon fyer kot mon'n arrive e mon fyer sa ki li in fer i ti bat kannel tou.

Mon pa'n ne ek en kwiyer lor dan mon labous! Me i paret poudir ozordi sa ki nou le promote se sa sistem kwiyer lor. Sa nou problemm. E ler mon koz koumsa nou le ankoler.

Mon koz koumsa, akoz ler nou les sosyete al dan sa direksyon i annan en dekadans sosyal ki i anmennen. E se pou sa rezon ki ou war dimoun pe atak touris! Se pou sa rezon ki ou war en *rise in burglary*, akoz dekadans sosyal ki'n ganny anmennen Mr Speaker apre

2020 par en Gouvernman ki enkonpetan!

(APPLAUSE)

HON SEBASTIEN PILLAY

An incompetent Government, intellectually spent ki pas son letan kritik tou son oponan. E menm *of all things* sey met son oponan dan prizon akoz gri, gri. *What is this* Mr Speaker? *What is this?* Mr Speaker, *it is on - i baze lo merit mon Mosyon, the merit of my Motion is a sa ki nou annan ozordi se en kalite otokrasi - en dictatorship* ki kontrol tou keksoz!

Dan Lasanble Nasyonal nou ganny kontrole. Tou dimoun i war tou le Mardi ek Merkredi. So ki nou pou bezwen? ki nou le war? Nou le war Gouvernman - nou bezwen montre li poudir *look you are wrong* e la dan sa konteks, return ek sa e met en *clause* ladan ki dir poudir kondisyon sa bann *cleaners will be no less favorable*, ki avan Korperativ ti fermen.

E si ou kapab donn zot en pti keksoz an plis, donn zot osi Mr Speaker.

(APPLAUSE)

HON SEBASTIEN PILLAY

An konklizyon Mr Speaker, mon'n sorti en pe tar kot Lasanble yer Mr Speaker.

Akoz mon'n pran en pe letan pou mwan asire ki bann dokiman ki mon pe gete mon'n kapab verifye.

Mon'n al rode sa bann dokiman Mr Speaker, pou le senp rezon pou montre poudir sa *pattern* anbet Seselwa i, i kontinyen. I kontinyen e i *stem from the very top of the country*. E ki ou espekte larestan fer?

Mr Speaker, mon napa nanryen kont bann eksper vin devan Lasanble. Be mwan, mon santi poudir si zot ti annan eksper pou anmennen, zot ti'n devret fer li. Zot ti'n kapab anmenn Mosyon demann en kestyon eksplike ki pe arive. Me zot pa pou fer akoz zot per zot Gouvernman! Nou annan en Lasanble ki per son Gouvernman.

Nou annan en Lasanble ki pa oule *keep hold* son *Government accountable*. Me nou dan Lopozisyon Mr Speaker, nou pa per Gouvernman *LDS*. E lefe ki nou pa per Mr Speaker, nou pe dir ek Gouvernman *repeal* sa *S.I, quash* sa *S.I*, met en *clause* ladan ki protez saler bann *cleaner*.

Mon pa konnen konbyen fwa mon pou repet sa Mr Speaker. Se sa *the gist of* mon Mosyon *challenge* mon lo tou sa ki zot oule. Montre mon kote zot in met en garanti en *safeguard* pou saler bann

cleaners mon a pare pou mon withdraw mon Mosyon.

Be zot napa! Zot napa such guarantees Mr Speaker. Akoz menm bann garanti ki'n ganny donnen verbalman parey sa deklarasyon ki Madanm Mohideen in fer pa'n ganny onore. Se sa nou problem Mr Speaker. Alors ler mon terminen mon dir i annan zis en sel keksoz ki bezwen arive.

- 1) Prezidan reoran son *S.I.* aranze,
- 2) I mont lo televizyon nasyonal parey i kontan fer en *public apology* ek sa bann *cleaners*. Depi li, depi son Madanm Mohideen depi zot tou, fer *apology* ek zot dir zot *sorry* wi nou ti'n devret fer sir poudir letan zot ale zot kondisyon i parey Mr Speaker.

E ki sa bann dimoun pa ti ava bezwen pe *call* tou dimoun pou rode ki mannyer zot larzan pou retourn parey i sipoze ete Mr Speaker. Se sa lesansyel Mosyon ozordi bomaten Mr Speaker. Prezan pouvwar i dan zot lanmen Mr Speaker, mon'n *move* mon Mosyon gete ki zot anvi fer. Mersi.

MR SPEAKER

Mersi Onorab. Onorab Spiro, segonder Mosyon ou annan laparol.

HON RACHEL SPIRO

Bonzour Mr Speaker. Bonzour tou koleg Onorab. Bonzour tou dimoun a lekout. Mr Speaker, mon pa anvi ozordi fer ni polemik ni politik. Me selman mon anvi fer en tour lorizon lo sa size bann *cleaners*.

Swivan en desizyon *Cabinet* an 2022 pou fer en revi e odit *Cleaners Corporative* pou rezon ki pa antyerman zistifye, *S.I.* 106 ti ganny pibliye dan Garet ofisyel an 2023, pou aboli oubyen parey in ganny Gazete," *Dissolution of the Cleaners Corporative* par le 31 Desanm 2023 ti vin anfors.

Mr Speaker, sa kalite desizyon ki Gouvernman in pran i pa en desizyon ki ti merit ganny pran alalezer.

Mon dir sa akoz en desizyon parey i annan en kantite lenplikasyon e reperkisyon lo lavi en group travayer dan sa pei. *Cleaners* i zwe en rol enportan dan en lorganizasyon se zot menm ki asir lapropte anndan e deor zot landrwa travay.

Konbyen nou ki'n apresye ler nou'n antre dan en landrwa ki'n ganny byen antretenir par en *cleaner*, ki annan en lanmour pou son

travay e i ganny byen valorize pou sa travay ki i fer? Eski zot ganny lapresyasyon pou sa pti latous an plis ki parfwa zot anmennen dan zot travay? Zot osi asire ki kliyan i ganny en servis alaoter.

Cleaners Corporative ti anploy plis ki 600 dimoun, ki ti pe fer en travay ki ti rann lavi sa bann lorganizasyon e endividé pli confortab. Swivan en tel desizyon bokou sa bann endividé e zot manm fanmir in ganny enpakte. E ziska ozordi zot ankor pe santi sa lenpak lo zot lavi.

Sa lenpak Mr Speaker, i pa'n enn ki'n pozitiv dan okenn fason. O kontrer in boulvers lavi sa bann dimoun anba lao. Sa group travayer ti ganny dir dan en miting avek Minister Finans e Biro Servis Piblik ki zot pou ganny peye tou zot benefis par Desanm lafen 2023.

E ki zot pou answit ganny re anploye lo menm kondisyon, par sa bann departman oubyen lorganizasyon travay kot zot ti ete, si zot ti oule kontinyen dan lanplwa. I malere ki plis ki 2 mwan pli tar, serten sa bann travayer pa ti ankor resevwar tou zot bann benefis.

I annan ki pa ti ankor ganny peye zot bann *allowance*. I annan serten zot ki zot benefis ti ganny peye lo en sonm pli ba ki zot dernyen

saler. I annan en kantite *anomaly* dan sa sityasyon peyman sa bann travayer.

Mr Speaker, Prezidan dan son ladres lo Leta Lanasyon ti dir piblikman ki sa bann *cleaners* pou ganny peye tou zot bann benefis par lafen Fevriye.

Plis ki de semenn pli tar sa pa ti ankor regle. I malere ki sa sityasyon ki ti'n devret fini ganny rezourd depi Desanm 2023, ti ankor pe ganny trennen. Sa ki pli fer lapenn serten zot pa ankor ganny *back pay* zot *allowance* ki sipoze ganny rektifye.

Dan sa menm ladres lo diskour Leta Lanasyon, Prezidan ti fer resorti ki *civil servants* pe trenn lipye. Mr Speaker, lekel ki pe trenn lipye dan ka peyman benefis sa group travayer si pa sa administrasyon?

Sa i montre klerman ki bann promes ki ganny fer pa ganny onore par sa bann dirizan ki fer sa bann promes e desizyon. Eski i moralman byen pou en travayer ki'n devote plis ki 10 an servis bezwen esper tou sa letan pou li ganny son benefis?

Serten sa bann travayer ti'n ariv nivo *supervisor* e zot ti pe benefisyé avek serten *allowance* ki ti pe ed zot fanmir. Letan mon'n koz avek en madanm ki li i ti en *supervisor*, i ti pe ganny serten

allowance ki ti ariv environ R3 mil an tou.

I war li ozordi napa sa *allowance* e pe fer mon konpran ki sa *allowance* ti ed li re pey son *loan*. Mr Speaker, sa madanm i pa'n zis perdi sa larzan, me in war li pe bezwen siport son zanfan ek pti zanfan akoz son zanfan in osi perdi son lanplwa.

Ozordi pri lavi in pli o ki zanmen e ler en sonm parey dan ka sa madanm i ganny retire dan sa lanvlop larzan ki pe antre dan son fanmir, i vin pli difisil pou re pey elektriske, delo e bann komodite de baz ki tousala in ogmante.

Promes Avan Eleksyon 2020 sete pou met larzan dan pos malere. Zot ti pou sekwe pye pou met dan poz malere. Me, pli tar nou pe war ki sikloun radikal in pase e zot in pran sa bann dernyen rakay ki ti dan pos sa bann *cleaners*.

(APPLAUSE)

HON RACHEL SPIRO

Tou sa i fermal pou sa bann fanmir ki ti depan lo sa bann pti *allowance*. Tou sa in arrive san ki zot in ganny averti. Sa ki pa akseptab, se letan bann *Leaders* i fer miting ek sa bann *cleaners* zot ganny promet ki zot kondisyon pou reste parey.

E zot saler pou reste parey. Ki'n arrive ek sa promes, ki saler sa bann *cleaner* pa

reste parey? Sa zafer fer fo promes par sa administrasyon, i inakseptab e irresponsab. Kondisyon sa bann *supervisor* pa ditou parey. Pou sa bann ki'n ganny anploye zot ganny anploye koman en *cleaner* zot in nepli *supervisor*.

Dapre zot let apwentman i fer kler ki zot en senp *cleaner* e non pa en *supervisor*. Avek sa re apwentman zot pa benefisye sa bann *allowance* ki zot ti pe resevwar avan. Mr Speaker, sa administrasyon i war sa i normal e akseptab.

Pou en *cleaner* ki'n travay plis ki 10 an e ki'n fer progre gradyelman e ki pou li ti ariv, i ti'n fer en gran progre pou ariv dan sa pozisyon *supervisor*; war li prezan perdi sa bann benefis. Sa i trakasan. Se ki ler zot in re ganny anploye zot ganny met ankor lo en probasyon 6 mwan Mr Speaker.

Kan serten zot ti dan sa menm lorganizasyon travay avan. Sa prosedir ti'n kapab ganny rakoursi pou en peryod letan pli kourt, oubyen pa ganny met ditou dan zot kontra. Sa probableman i en lot manev pou fer serten aret travay angiz zot pa'n pas probasyon.

I fer lapenn ler en Prezidan i vin dan sa Lasanble e donn lespwar sa bann *cleaners* an di-z-an ki zot pe al

ganny zot benefis zis semenn apre ki'n prononse dan Lasanble.

Mr Speaker, sa bann *cleaners* i anvi konnen konbyen letan pou pran pou rektifye sa bann lenzistik? Pou retourn zot lavi parey ti ete avan sa bann boulversman an 2023?

Sa group travayer i enportan pou zot; zot bezwen annan serten *skills* spesifik pou zot fer sa louvraz. E i etonan pou nou tann swadizan *Leaders* responsab refer lo *cleaners* koman bann dimoun ki pa edike.

Sa ki pa pe ganny dir, se ki sa group travayer i deza pe ekspoz zot lekor ek serten risk lasante e maladi. Ki sa pa pe ganny pran an konsiderasyon ditou!

Kot Lopital Sessel, i enn sa bann landrwa kot *cleaners* ki ti ganny anploye ek Korperativ ti pe asir lapropte sa lopital. Ozordi servis in deteryore, nivo lizyenn kot sa lopital in abese e dimoun pe anmas lenfeksyon dan lopital.

Sa pe arive akoz sa group *cleaners* ki ti pe donn sa servis pe ganny *rotate*. Sa ki pa'n ganny fer an formasyon pou donn servis dan en lanvironnman steril, pe war zot bezwen fer sa travay. Sak metye i annan son valer e fodre i pa ki bann *Leaders* i

donn lenpresyon ki en *cleaner* napa valer.

Mr Speaker, sa madam *cleaner* tousel ki ti pe ganny en saler R8 mil 37 ki ler i ti pe ganny en *inducement allowance* e son *long service allowance*, son *responsibility allowance* e son *shift allowance*, ti war li kapab asire ki son de zanfan ti ganny tou zot neseser.

I pe war li dan difikilte prezan pou fer de bout zwenn. Sa sityasyon in arive akoz en desizyon mal kalkile par sa Gouvernman; en Gouvernman ki'n mank konpasyon pou son pep e nou'n war sa dan plizyer sirkonstans parey CCCL.

Kot sa bann dimoun i ankor pe esper rekour ek sa Gouvernman. Pri lavi dan sa pei in ogmante konsiderableman. E ler souris reveni en fanmir i ganny zwe avek Mr Speaker, i kler ki sa pei i annan gro problem.

Si nou pretann dir nou'n fer sirplis ek *savings* par isi par la, akoz koup peyman serten benefis sa bann *cleaners*? Sa i parey en lot form viktimizasyon lo drwa travayer.

Si Gouvernman pa'n kapab fer sa tranzisyon byen, sa i montre zot abitye fer bann desizyon mal kalkile ki fer soufer dimoun. Sa Gouvernman i en

Gouvernman ki mank sans responsabilite.

E i montre klerman ki ou pa kapab fer en Gouvernman koumsa okenn konfyans. I pas letan rod tou mwayen pou fer travayer fristre.

Avek fermtir Korperativ, in annan en dezord total ki montre en Gouvernman fatige e mank kapasite pou fer bon zizman.

Se pou sa rezon Mr Speaker, ki mon aport mon sipor Loter sa Mosyon ki *S.I.* 106 i ganny *repeal* e ki sa Korperativ i ganny remet an plas. E si non saler sa bann travayer parey nou'n dir i ganny aziste dan sa *S.I.* ki zot a kapab ganny zot repeyman parey zot ti gannyen avan.

Mr Speaker, nou swete ki nou bann koleg lo lot kote latab i a fer zistik sa Mosyon ki nou'n anmenn devan, pou *repeal* sa *S.I.* e ki zot a donn sipor sa Mosyon. Mersi Mr Speaker.

(APPLAUSE)

MR SPEAKER

Mersi Onorab. Onorab John Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour tou dimoun ki a lekout. Mr Speaker, Gouvernman ki an plas pe rod tou fason pou fer

keksoz pli byen ki avan. E souvandfwa Onorab Audrey Vidot i fer mazin sa.

E i en travay pou amelyor bann lenstitisyon in vin en travay kontinyel depi 2020. Komansman avek *Burial Services* kot ti annan bal dan larzan simityer. Servis *Welfare*, kot ti annan dimoun ki ti pe ganny *welfare* e laliny ti ariv ziska kot Lorloz.

Dimoun ki ti kapab travay ki ti pe zis ganny *welfare* pou nanryen. I annan SBFA kot larzan ti pe partaz antre fanmir; *loan* ti pe ganny donneen antre fanmir. E koman en Manm Lasamble responsab, ler i annan bann sanzman i neseser pou fer sir dan lentere latransparans.

E pou donn lenformasyon, tou lenformasyon posib nou eksplik, tou lenformasyon posib nou pep, avek lentansyon pou anmenn laverite nou eksplik e konsilte avek sa bann dimoun ki sa bann sanzman i konsern zot.

Mr Speaker, nou'n ganny elekte pou nou pran swen avek larzan piblik. E osi pou koup labi kot i annan labi e sa bann keksoz koumsa nou pa'n ezite pou fer.

Nou'n pran desizyon ki brav, desizyon ki ti neseser pou pran. Pou anpes labi dan sekter piblik. Mr Speaker, an 2008 ler ti annan reform

makro ekonomik, *IMF* ti demann Gouvernman pou aptisi son *wage bill*. Parey zot konnen nou *wage bill* pa devret mont par lao 12poursan nou *GDP*.

Alor Gouvernman ti bezwen pran bann desizyon pou sorti dan bann *noncore business*. Parey netwayaz e ti *outsource* sa bann servis, avek bi pou anmenn plis efikasite e pou kre bann lantrepriz ki pa depan lo Bidze Gouvernman.

Se sa ki'n donn nesans *Cleaners Corporative*. Pandan sa 10 an egzistans sa Korperativ, Rapor Oditer Zeneral in montre bokou defayans dan sa Korperativ. Premyerman S.I. ki ti'n ganny gazete anba *Cleaners Corporative Act S.I. 76 of 2010* ti met en *capping* pou sa lorganizasyon pou pa anploy plis ki 500 travayer.

Me ki nou'n war? Sa lorganizasyon in kontinyen anploy dimoun ziska 658 travayer e sa i kont Lalwa sa prop lorganizasyon.

Dezyenmman sa Korperativ pa ti pe mars parey i devret, kot bann standar ki ti pa'n ganny mentenir; par egzanp nou'n tann bokou lakizasyon ki lopital i sal, i mank dra.

Onorab Spiro ti fer resorti sa dan son diskour Leta Lanasyon. Me kote, kote i blanmen? I blanm lopital li,

olye blanm sa lorganizasyon ki sipoze pe netway lopital, ki sipoze pe met dra lo lili lopital.

(APPLAUSE)

HON JOHN HOAREAU

Mr Speaker,

(comments off-mic)

HON JOHN HOAREAU

Mr Speaker mon ti a kontan ganny... -

(comments off-mic)

HON JOHN HOAREAU

... (ale. Ou *relax ou.*)

MR SPEAKER

Order!

HON JOHN HOAREAU

Mr Speaker, mon ti a kontan ki zot realize ki sa Korperativ ki merit ganny blanmen e se zot ki'n ganny *outsource* avek sa bann servis dan lopital. I annan osi *cleaners* ki'n ganny trwa fwa final *warning* lo rikord.

E okenn *dismissal* pa'n ganny pran, akoz afilyasyon politik sa lepok. Ler i annan okenn ogmantasyon dan lapey, se toultan Gouvernman ki'n bezwen *bear the cost*. Menm si sa lorganizasyon ti annan en vole kot i ti annan en serten travay ki i ti pe fer pou bann Minister. E i ti ganny

peye par bann Minister e menm si ti annan en vole travay ki ti pe fer pou prive, parey *Credit Union* ki ti bezwen pey 3 milyon zot in anmase par lannen lo lo sa bann biznes prive ki zot ti pe fer.

E sa Mr Speaker, i ti devret ganny servi pou donn sa bann *cleaners* ogmantasyon e pa'n ganny fer.

Mr Speaker, Minister Finans ti fer en *cost benefits analysis* an Septanm 2022. En legzersis ki pe kontinyelman fer, pou war si Gouvernman pe ganny valer pou sa bann servis ki i pe peye.

Konnen ki nou'n dekouver environ? 53poursan bann lorganizasyon ti dekrir *Cleaners Corporative* koman zot pa satisfe avek servis ki zot pe gannyen.

Mr Speaker, trwazyenmman bann *overheads* ki ti pe kout sa Korperativ vreman bokou larzan.

En Korperativ i devret annan en vole - en lespri Korperativ parey son non i dir. Kot ou pa vini zis pou vin fer larzan ladan. Me ler nou ti pe gete *CEO* ti pe tous ki R37 mil ki plis ki larzan en Manm Lasanble. Ki malgre toultan zot pe koz lo larzan Manm Lasanble e fer krwar lepep ki Manm Lasanble pe ganny pli gro, pli gro lapey Sesel!

Mr Speaker, en kestyon ki Leader Lopozisyon in fer, i dir ki sa bann *cleaners* zot devret ganny menm kondisyon lapey, menm kondisyon tou keksoz ler zot ganny re abzorbe.

Me les mon reponn li son kestyon, bann *cleaners* ti pe ganny peye pou 8 erdtan travay menm si zot ti pe travay 7 er ziska 12 midi apre 2019, 7 er ziska 12 midi pa 8 erdtan Mr Speaker. Me Gouvernman ti pe kontinyen pey zot pou 8 erdtan travay.

Ladan menm serten *cleaners* ti pe ganny zot R1500 *allowance* pou zot kontinyen depi 12 midi ziska 3 er. E sa zis serten, serten *cleaners* serten zis 128 parmi sa 658 *cleaners* ki ti pe ganny zot sa R1500. La nou war en gro lenzistis. E sanmenm sa lenzistis ki *Leader Lopozisyon* mon pe dir ou nou, nou pe tire.

Mr Speaker, avek disolisyon sa Korperativ travayer tou travayer in ganny tou zot benefis kontrerman avek sa ki Onorab Spiro pe dir i annan benefis ki pa ankor ganny peye.

Mr Speaker, tou travayer ki ti anvi travay in ganny re abzorbe dan bann Minister kot dan bann diferan Minister kot zot ti pe donn sa servis.

Bann ki anvi travay parey mon dir. Bann lezot ki pa'n anvi travay pou plizyer

lezot rezon, zot pa'n kontinyen travay.

Konsiltasyon ler nou pe koz lo konsiltasyon in annan miting ki'n ganny fer avek sa bann dimoun.

Sa bann *cleaners* par AG's Office, par PSAB e par Minis Finans, par Minister kot, kot Finans ki zot tonm anba la. Mr Speaker, alor ki problemm Leader dan minoriter? Mr Speaker, problemm minoriter mon poudir ou ki son problemm.

Son problemm se ki i annan son CC member ki ti CEO sa lorganizasyon, ki ti pe tous gro lapey, ki la li i pe lager lebra kase pou sa. I pa pe lager pou *cleaners* li, i pe lager pou sa CEO ki pa pou ganny sa gro lapey.

Mr Speaker, i malere poudir ki nou annan en Lopozisyon ki pe gaspiy *tax payers money* e letan Lasanble.

A sak fwa ki i annan en S.I. ki selon zot, zot war posibilite pou fer politik bon marse, pou fer politik sansasyonnel zot sey kre en nespes lemosyon pou sey *quash* sa S.I. Pou zot dir nenport kwa e sa i en siny dezespwar *mes amis*. Zot pe grat dan fon barik parey nou dir.

Mr Speaker, fransman mon pa war ki problemm Lopozisyon mon. Parske tou

sa bann dimoun in reganny zot plas travay sa ki ti anvi travay. Ler zot pe demann *quash* sa S.I. zot pe demann zot, zot pa'n fer sa refleksyon poudir be ki pou arive si nou *quash* sa S.I.

Eski sa madanm, sa *cleaner*, sa *mère* fanmir ki'n pran son pti konpansasyon in aste en *fridge*, en *cooker*, en pti *set sofa* e petet in re pey en gro sonm son *loan*. Eski nou poudir li ale al, al repran sa larzan redonn Gouvernman e reetabli sa S.I?

Mr Speaker, *Leader* Lopozisyon in bite. *Leader* Lopozisyon in perdi direksyon. Si ou war en dimoun i zistifye latak lo touris, ler i pe fer son gran lentervansyon, ki direksyon nou, nou pe pran dan sa pei? Alor *Leader* parti minoriter Sebastien Pillay pe met zot dan en latrap.

Mr Speaker, parey son labitud Lopozisyon i vin ek bann Mosyon popilis e pe sey rod en vot, e pe sey kalkile ki fason zot pou detri sa Gouvernman. San realize poudir avek sa desizyon ki Gouvernman in pran, nou pe sov oubyen nou'n fer en benefis R5 milyon atraver bann desizyon ki sa Gouvernman in pran dan *savings Bidze*.

An menm tan, nou pe kre plis lefikasite e bann *cleaner* pe ganny plis valorize dan zot

bann landrwa, dan zot nouvo landrwa travay kot zot in ganny re abzorbe. *At least* parti Desanm, zot kapab al dan sa lorganizasyon, al dan parti Desanm ki ler ti annan, zot ti anba *Cleaners Corporative* sa pa ti ganny valorize, zot pa ti ganny fer.

(APPLAUSE)

HON JOHN HOAREAU

Mr Speaker, parey son labitud ler nou pou anmenn sa dan en Staz Komite, li i pou taye i pou al bwar kafe ek son bann dalon ek son nef sren rouz. I pa pou asize pou demann kestyon pou rod leklersisman parey i bezwen rod leklersisman.

Mr Speaker, i paret ki zis *Leader* parti minoriter...

MR SPEAKER

Onorab.

HON JOHN HOAREAU

Minoriter ki pa'n...

(Interruptions off-mic)

MR SPEAKER

Order! Onorab John Hoareau esper en kou silvouple bann Manm lo tou lede kote, ler zot pou koze zot pa oule ki lezot Manm i enteronp zot. Alors evite enteronp lezot Manm e sa i aplik pou tou lede kote;

(comments off-mic)

MR SPEAKER

Tou lede. Onorab Hoareau silvouple, prosede.

HON SEBASTIEN PILLAY

(Off-Mic)

MR SPEAKER

Onorab Pillay, *order!*

HON JOHN HOAREAU

Mr Speaker, i paret zis *Leader* parti minoriter ki pa tande e pa konpran lenformasyon ki Madanm Mohideen ti fer lo medya. Mon'n ekout zot de lenthervansyon ki'n pas avan *Leader* Lopozisyon avek segonder Mosyon.

E zot pa'n konvenk nou avek largiman solid pou nou anil sa S.I. alor Mr Speaker, parey mon'n eksplike, nou pou anmenn sa bann...

(Interruptions off-mic)

HON JOHN HOAREAU

...ekoute, les mwan koze. Nou pou anmenn - nou pou demande pou nou anmenn bann dimoun, bann teknisyen ki pou kapab anmenn en leksplikasyon pou nou.

E Mr Speaker, anba *Order 84(1)* mon pe demande ki Lasamble i *resolve itself into a Committee*. Kot nou ava apel sa bann teknisyen, CS Mohideen avek PS Tamatave,

ki a donn nou lenformasyon e repons lo bann kestyon ki neseser pou ganny kestyionnen.

Mr Speaker, avek sa, i ava donn nou lespas pou ou kapab pran en *technical adjournment* - ekri sa bann dimoun dan Lasanble. E *constitute the Assembly to resolves itself* pou...

(Interruptions off-mic)

MR SPEAKER

Order!

HON JOHN HOAREAU

...en *Committee Stage*, ok? So se sa ki mon pe move anba 84(1) non pa anba 23(1). Mersi Mr Speaker.

MR SPEAKER

Mersi Onorab. Silvouple prezant Mosyon ki oule met devan Lasanble; repete.

HON JOHN HOAREAU

Mr Speaker, mon pe prezant en Mosyon la anba 84(1) ki mon pe demann ou pou *resolve the Assembly into a Committee of the whole Assembly*. Kot nou ava kapab demann kestyon avek bann teknisyen dan sa bann *field*, ki nou ki, ki konsern sa size ki nou pe koz lo la, la.

So sa bann dimoun ki bezwen lenformasyon, i a kapab ganny tou

lenformasyon. Parey nou dir dan lentere latransparans; dan lentere anmenn lenformasyon pou piblik so sa bann dimoun i ava kapab demann okenn kestyon ki zot bezwen demande.

E Lasanble i ava satisfe e dimoun deor i ava satisfe. Mersi.

MR SPEAKER

Mersi Onorab. Hold on.

HON SEBASTIEN PILLAY

(comments off-mic)

MR SPEAKER

Ki *point of order* oule fer Onorab Pillay? Yes.

HON SEBASTIEN PILLAY

Wi, mon war ou pe konsider son Mosyon ki Mosyon ki'n ganny *move* la. Mon annan en Mosyon ki *legitimately* ganny aksepte e mwan as *mover* Mosyon mon propriyeter sa Mosyon. Ki Mosyon pou *move* lo en *Committee Stage* lo mon Mosyon ki pe *move*??

He doesn't know what he os doing.

MR SPEAKER

Order. Order 84 "whenever in any matter, other than matters considered under the Procedure on a Bill, or Financial Procedure, a Member desires that the matter be considered in the Committee of

the Whole Assembly. The Member may move, without notice, that the Assembly shall immediately or on a future sitting day, resolve itself into a Committee of the Whole Assembly to consider the matter. ”

HON SEBASTIEN PILLAY

Ok, napa problem. Be vi ki mwan ki ansarz mon Mosyon, annou al dan en Komite, mon a vin devan mon a eksplik mon Mosyon. This is what's gonna happen. Ou napa okenn, ou napa okenn, okenn lotorite pou ou aksepte sa Mosyon.

MR SPEAKER

Non.

HON SEBASTIEN PILLAY

Sa Mosyon can only be accepted on a matter which relates to a Bill, en statement Minis.

MR SPEAKER

No, no, no.

HON SEBASTIEN PILLAY

Ou pa pou kapab fer sa! Mr Speaker ou pe..!

(Interruptions)

MR SPEAKER

Order! On – order!

HON SEBASTIEN PILLAY

(Off-Mic)

MR SPEAKER

Onorab Pillay, silvouple, silvouple ou bezwen arete kestyonn lotorite Speaker. Mon pe dir ou, Onorab Pillay mon pe demann ou gard *order silvouple!* Ou en Manm Lasanble e ou bezwen respekte lord dan Lasanble.

HON SEBASTIEN PILLAY

(Off-Mic)

MR SPEAKER

Napa point of order ankor the Motion is in line with the Order 84. Si Manm i anvi prosede, en Manm i bezwen segonn sa Mosyon e nou a vot lo la. Onorab Naidu.

HON SATHYA NAIDU

Mon le segonde Mr Speaker.

MR SPEAKER

Nou a vot lo Mosyon.

(comments off-mic)

MR SPEAKER

Sorry? Yes, right.

HON SEBASTIEN PILLAY

Mosyon i bezwen move under Order 23 pou suspend pou adjourn debate lo mon Mosyon. That is the order of procedure...

(comments off-mic)

MR SPEAKER

Order!

HON SEBASTIEN PILLAY

...ki ou'n swiv Mr Speaker.
That is the procedure ki ou'n set! You are violating the Standing Order Mr Speaker!

(APPLAUSE)

MR SPEAKER

Onorab Pillay.

HON SEBASTIEN PILLAY

Ou ki set sa prosedir. *You set the procedure Mr Speaker!*

(Interruptions off-mic)

HON SEBASTIEN PILLAY

... you did! You did! There has to be a Motion ...

MR SPEAKER

Onorab Pillay.

HON SEBASTIEN PILLAY

...under Order 23.

MR SPEAKER

Onorab Pillay, mon demann ou pou sorti dan lasal, sorti. Sorti!

HON SEBASTIEN PILLAY

Mon pa pou sorti non!

(Interruptions)

HON SEBASTIEN PILLAY

Non, ou pe vyol mon drwa koman en Manm Lasanbl...

(Interruptions)

MR SPEAKER

Sergeant, ou a tir Onorab Pillay dan lasal. Tir li.

(Interruptions)

MR SPEAKER

Non, i kapab.

(Interruptions)

MR SPEAKER

Mon krwar sa ki'n arive dan Lasanble i *amount to gross disorder in the Assembly.*

Order 84 i dir "whenever in any matter, other than matters considered under the Procedure on a Bill, or Financial Procedure, a Member desires that the matter be considered in the Committee of the Whole Assembly.

Savedir letan ou pe demande ki Komite ki nou al dan Staz Komite, ou pe demande pou konsider sa *matter* ki lo *Floor* deza. Alor i neseser ki anba *Standing Order 23* ou demande pou sispann, pou *postpone consideration on the matter*, pou permet Lasanble pran en *matter* dan *Committee Stage*.

Alor ou bezwen fer sa Mosyon dan de servi sa de *Standing Order*.

HON JOHN HOAREAU

Mersi bokou Mr Speaker. Si oule mon servi sa *de Standing Order*. mon kapab servi mon napa problemm pou mon servi tou lede. Me mon santi ki 84(1) i kapab reponn bezwen. Me ok, mon kapab fer li anba 23(1) kot mon pe demande ki “*the debate be now adjourned.*”

MR SPEAKER

Yes.

HON JOHN HOAREAU

E anba *Order 84* nou ava anmenn sa deba dan en Staz Komite. Mersi.

MR SPEAKER

Mersi. Sa Mosyon i a ganny segonde prezan? Onorab Naidu.

HON SATHYA NAIDU

Mosyon in ganny segonde Mr Speaker.

MR SPEAKER

Mersi. Nou, nou ava pran deba lo sa Mosyon avan nou vote. Eski i annan Manm ki anvi koz lo sa Mosyon? Onorab Naidu.

HON SATHYA NAIDU

Zisteman Mr Speaker. An relasyon avek sa prosesis ki nou pe swiv, i pa fer premye fwa ki nou pe fer sa legzersis.

Nou pe fer li lo baz latransparans e nou le fer sir ki pep Seselwa i ganny en konprenezon byen kler.

Pli boner ozordi non Madanm Mohideen ti'n ganny mansyonnen, an relasyon avek bann desizyon vizavi sa antite. E i toutafe normal pou donn sa teknisyen, sa eksper parey in ganny rekonnnet pli boner, sa loportinite pou vin devan pou klarifye lo bann diferan eleman ki relye avek *Cleaners Corporative*.

Pou nou ganny en konprenezon kler lo rezondet e rasyonnel par deryer sa desizyon ki'n ganny pran. Mersi.

MR SPEAKER

Mersi. Okenn lot Manm ki le adres lo sa Mosyon? Byen Manm a adres lo sa Mosyon. Manm ki an faver lev lanmen silvouple? Mersi. I annan Manm ki vot kont? Napa. Lo Mosyon anba *Order 23* pou *adjourn debate the session to a further session*.

E pou pran en *matter* dan Komite of the Whole Assembly under *Order 84 - 17* Manm in vot pour, 0 kont e 0 in *abstain*. Alors ou Mosyon in aprouve par Lasanble.

Bon Lasanble i ava *adjourn* e avek Mosyon ki'n ganny aprouve, mon demann Madanm Clerk Sekretarya pou apel bann zofisye konsernen

ki'n ganny nonmen dan sa Mosyon pou vin dan Lasanble pou fer en *statement*.

E reponn kestyon bann Manm. Nou ava *adjourn* ziska 11 er avek bann zofisyen dan Lasanble.

(BREAK)

MR SPEAKER

Bon avan nou repran dan Staz Komite de pti lanons. Premye letan mon demann en Manm pou kit lasal mon devret dir li kan ki i devret retournen, mon'n evite dir li.

Vi ki sa i Mosyon *Leader Lopozisyon*, mon kapab permet li pou retourn dan lasal apre sa, apre demann li pou sorti pou retournen i kapab repran son *seat*. Lo kote *Standing Orders* ki nou'n servi e 84 ek 23 - mon krwar i annan en lenterpretasyon 84 ki permet sa kalite prosedir.

Me selman mon pou bezwen pran letan pou egzamin sa de *Standing Order* e osi konsilte. E apre mon pou donn en *ruling* lo lenterpretasyon sa de *Standing Order*. Mon pou evite fer li, akoz mon ti a prefere met mon *ruling* an ekri avan mon delivre li.

HON GERVAIS HENRIE

(Off-Mic)

MR SPEAKER

Mersi. Bon Onorab Henrie ki ou pwen?

HON GERVAIS HENRIE

Mr Speaker, anba *Order 40* mon le lev en *matter of privilege* ki fek *arise*.

MR SPEAKER

In *arise* la?

HON GERVAIS HENRIE

Wi. Mr Speaker, an relasyon avek...

MR SPEAKER

Normalman Onorab Henrie, mon pa donn *matter of privilege* lo - napa nanryen ki'n *arise* la. Ou bezwen dir mwan an ekri. Donn mwan ou pwen an ekri e mon a regarde ki *matter of privilege*. Mersi.

HON GERVAIS HENRIE

Mersi.

MR SPEAKER

Bon, nou pou pas dan Staz Komite pou permet zofisyen ki'n ganny apele pou enterakte avek Manm. Alor bonzour e byenveni Madanm Shella Mohideen *Chief Secretary* pou *Public Service Bureau*.

E Ms Astride Tamatave *Principal Secretary* pou Finans. Madanm Mohideen e Madanm Tamatave. Lasanble in apel zot pou adres kestyon *S.I. 106* dizolisyon *Cleaners Corporative*. Mon pou demann

zot pou fer en pti lentrodiksyon premye lo rezondet sa S.I. e apre Manm i a kapab poz kestyion.

Mon a donn laparol Madanm Mohideen.

CHIEF SECRETARY SHELLA MOHIDEEN

Mersi Mr Speaker. Mr Speaker, tou Manm Lasanble e osi tou dimoun a lekout mersi pou envit mon avek PS Tamatave pou donn nou loportinite pou nou eksplik rasyonnel par deryer sa S.I.

Mr Speaker, les mwan komanse pou mon eksplike ki sa S.I. ki nou pe demande pou *repeal* i pa reform ki Gouvernman pe fer an se moman. E sa reform parey plizyer fwa mon'n ganny loportinite pou mwan vin eksplike dan Lasanble i anba sa parasol ki nou apel *RBM*.

I enportan pou nou konpran ki *RBM* i sa *tool* ki nou pe servi dan Gouvernman pou nou fer sir ki tou larzan piblik ki ganny depanse, i annan valer *ok* sa ki angle i apel *value for money*. E letan nou pe get *value for money*, letan nou pe servi sa *RBM tool*, i enportan ki tanzantan nou kontinyen evalye bann servis ki Gouvernman pe donnen.

E osi nou evalye bann servis ki nou pe gannyen nou koman sa Gouvernman. E anba *RBM* i annan sa *tool* ki

nou apel *monitoring and evaluation* e *monitoring and evaluation* i servi, pou nou parey nou dir pou nou evalye, pou nou fer sir ki tou larzan ki nou depanse, nou pe ganny *value for money*.

Si prezan Mr Speaker, mon pou retourn kot *Cleaners Corporative*, an 2008 letan ti annan reform ekonomik ki Gouvernman ti pe fer an *partnership of with IMF*, ti annan en desizyon pou fer ki serten servis ki Gouvernman ti pe angaze ladan, par egzanp *cleaning* i ganny *outsource*.

E *Cleaners Corporative* ti ganny kree e parey nou konnen in egziste ziska Desanm lannen pase. *Cleaners Korperativ* - pa zis li tousel, i osi annan lezot servis ki nou'n *outsource* in ganny evalye, in ganny *assess*. E i annan en *assessment* ki'n ganny fer e sa *assessment* in ganny fer *obviously* par teknokrat dan Gouvernman.

E baze lo rezulta bann *assessment* ki nou gannyen, nou kapab fer bann rekomandasyon avek *Cabinet*. E la sa diskisyon ki nou annan avek *Cabinet*, nou kapab fer bann desizyon.

So an 2022 ti trou *Cleaners Corporative* pou ganny *assess* sa ti apre ki nou ti'n fer *assessment* par egzanp lo *Security Services* dan bann

distrik e osi *Burial Services* ki nou ti'n fer *assessment* lo la.

E mon pou apre envit mon koleg *PS*, ki akoz sa *assessment* ti ganny *lead* par departman Finans pou li eksplik en pti pe ki zot ti fer dan sa *assessment* e en pti pe bann *findings*.

Letan *assessment* ti'n fini ganny fer ki rekomandasyon ti ganny prezante avek *Cabinet*, *Cabinet* ti donn nou go ahead.

E apre i annan tou en seri travay ki'n ganny fer pou nou kapab fer ki bann *housekeepers* nou pe apel zot bann *housekeepers* preznan. Ti sorti avek *Cleaners Corporative* pou vin avek Gouvernman.

Mon pou pran en pe plis letan apre pou mon eksplike ki nou'n fer pou nou re abzorb bann *cleaners*. Me avan mon fer sa les mon envit *PS Tamatave* pou li eksplik en pti pe lo kote sa *assessment* ki'n ganny fer.

Akoz nou ti fer sa *assessment* ki bann rezulta ki nou'n gannyen e ki bann rekomandasyon nou ti fer avek *Cabinet*. Mersi Mr Speaker.

MR SPEAKER

Mersi. *PS Tamatave* ou kapab pran laparol.

PS ASTRIDE TAMATAVE

Mersi Mr Speaker. Bonzour Mr Speaker. Bonzour tou Manm Onorab e tou dimoun ki a lekout. Mr Speaker, parey *CS* in dir revizyon pou tou bann *outsourcing* i form parti *ongoing* legzersis ki Gouvernman i fer. Pou nou rewwar efikasite tou bann *outsourcing* e tou bann servis ki Gouvernman i ofer an servan larzan piblik.

An 2021 letan Bidze 2022 ti ganny prezante Minis pou Finans dan *Budget Address* 2022 ti'n deza inisyale ki i annan en legzersis pe ganny fer pou rewwar *Cleaners Corporative services*.

E i ti endike dan Ladres Bidze 2022, ki sa legzersis ti pou ganny konplete ver lafen 2021. Me par kont sa legzersis in enn ki'n al pou en pe plis letan. An Zen 2022, nou nou ti prezant en Premye Papye avek *Cabinet of Ministers*.

Kot nou ti met nou bann *findings*. E i enportan pou note sa bann legzersis, i Minister Finans ki *initiate* sa bann legzersis lamazorite de fwa, pou nou rewwar lefikasite Bidze.

E sa i osi annan pou fer avek par egzanp sekirite, *cleaning*, *burial* anmenn en *maintenance contract*. Zis pou nonm enn de ki Finans in *initiate*, avek en sel bi pou nou regard efikasite.

E nou ti fer *further* legzersis avek baze lo premye prezantasyon ki nou ti fer ek *Cabinet*, nou ti ganny serten lezot keksoz pou nou al en pe pli o profon ladan. E nou ti prezant nou 2enm Papye an Septanm 2022.

E dan Bidze 2023 ki ti ganny fer an 2022, Minis pou Finans ti'n deza endike ki lentansyon sete pou ferm Korperativ Zanyve 2024.

E Bidze ti deza ganny fer pou ki konpansasyon e tou bann *dues* bann *cleaners* ti ganny *factor in* dan Bidze 2023 e tou bann *cleaners* in ganny peye zot *dues*.

Mr Speaker, petet zis pou *in terms of Cleaner' Corporative over the years*. *Cleaners Corporative* letan i ti ganny konstitiye, ti fer provizyon pou annan apepre 250 *cleaners* inisyalman.

Apre pli tar in monte in ganny 500 *cleaners* e ver lafen 2024 letan nou fini avek nou get dernyen *payroll* Desanm 2023, letan nou get dernyen *payroll*, kont *cleaners* dan Korperativ i 671 ki annan - *both in terms of prive* avek Gouvernman.

So *Cleaners Corporative* ti annan de fonksyon. Ti annan en fonksyon kot ti donn servis bann departman Gouvernman. *At the same time*, i ti annan en fonksyon kot i ti donn servis bann

antrepriz prive; swa bann *SOEs*, oubyen bann lorganizasyon totalman prive e i ti sarz sa bann antite prive.

Lentansyon pou Gouvernman *outsource Cleaners Corporative* an 2008, ki ti ariv an 2010, sete pou fer bann departman Gouvernman *focus* lo zot *core function*. Avek lentansyon ki *cleaning* i vin en *support services*.

Me ki nou'n war, letan nou'n fer en *assessment*, ki *over the years* in annan en mankman kontrol lo lorganizasyon *over* bann *cleaners*.

Annou get en senp legzanp, par egzanp letan ou pe fer *recruitment* en legzanp. Bann antite publik ki bezwen *cleaners* zot pa form parti *the recruitment process*. Savedir sa ki *Cleaners Corporative* i *recruit*, i sanmenm bann dimoun ki antite publik i gannyen.

Ki an prensip i en defayans akoz en antite publik i annan serten- par egzanp mon pou get en legzanp par egzanp kot Finans kekfwa, kot *Foreign Affairs*, i annan en serten sansib i annan lenformasyon konfidansyel ki dan bann biro i annan.

Oubyen *even* i annan en standar ki ganny etabli. So i enportan ki administrater sa bann antite *it was part of the interview process*. E letan

nou'n fer sa legzesis an 2022, nou'n war ki bokou lorganizasyon ti eksprim zot konsern *in terms of the lack of oversight* lo bann cleaners.

Nou annan nou sel de antite ki pran lamazorite gro, sa se Lasante avek Ledikasyon ki zot, zot ti annan serten rezervasyon. Akoz naturelman letan ou pe al donn Lasante 200 an plis resours imen pou li travay avek, pou vin ek son *additional workload*.

Me ti napa sa kontrol, me selman son sel lenkyetid sete ki mannyer nou donn li sa *administrative support*, pou li fer sir ki i kapab *manage* sa bann cleaners.

And as part of the phase out, nou'n asire ki Lasante i annan *administrative structure*. Kot i annan kat travayer ki ti avek *Cleaners Corporative*, ki'n al kot Lasante pou donn sa sipor.

So si nou pou get en pe Bidze Korperativ *over the years* Mr Speaker, an 2012 par egzanp Bidze Korperativ ti R22.8 milyon - Bidze pou *Cleaners Corporative*. Lafen 2021 Bidze ti'n arriv R71 milyon *so these are bann trend* ki nou ti war i *worrying and we need to come in*.

E fer ki sa Bidze i soutenab e revwar sa servis. Petet lentansyon letan ti ganny fer sete ki ou konnen i annan diferan *mode* ou kapab

fer *cleaning*. Petet nou, nou'n kontinyen avek sa, sa *static* dimoun 8 er-4 er ki *at one point* in vin 8 er-12 midi.

Me dan plas rod lezot fason ki netwayaz i ganny fer ki ti pou fer li vin pli efikas ki petet ti enportan reform an 2008. Me, me petet sa pa'n ganny-i pa'n ganny fer dan sa fason totalman. Akoz nou'n *still* war nou, nou'n *increase* lakantite cleaners dan bann antite Gouvernman.

So from sa legzesis ki nou'n fer, nou ti fer trwa senaryo, nou ti prezant trwa senaryo avek *Cabinet*. Enn kot nou, nou ti pe rekomande ki *the complete phase out of Cleaners Corporative*; ki Gouvernman in ti pou fer en *savings* aepre R5 milyon. Me pa zis *savings* R5 milyon, me kot Minister ti pou annan kontrol lo zot bann cleaners.

Zot ti pou santi en *sense of belonging* e lefikasite ti pou ogmante. Nou dezyenm senaryo sete ki nou fer *Cleaners Corporative focus* zis lo Lasante ek Ledikasyon e larestan i reste dan departman Gouvernman.

Nou ti war ki sa i ti pou anmenn en pti *savings* aepre R2 milyon. Me selman *still* ti pou annan serten eleman, kontrol ki ti pou *still* manke savedir nou pa ti pou *improve basically*.

E trwazyenm senaryo nou ti pou *status quo* e nou konnen *status quo* nou ti pou kit li parey, nou Bidze ti pou kontinyen reste pa soutenab.

Avek lagrandisman lekonomi, nou *GDP* in monte *bringing back Cleaners Corporative* son lenpak lo nou *GDP* i only 0.02percent, *bringing back Cleaners Corporative* lo *payroll*.

E sa i en diskisyon ki nou'n fer an 2022 ansanm ek *IMF*, kot nou'n met lo lentansyon kot nou pe *bring back cleaners* lo *payroll*. E in en desizyon ki'n ganny aksepte from the outset. Avek sa petet Mr Speaker, mon ti ava aret lanmenm e CS i ava azout.

MR SPEAKER

Chief Secretary, ou annan okenn keksoz pou azoute avan nou move lo kestyon?

CHIEF SECRETARY SHELLA MOHIDEEN

Yes, Mr Speaker, mersi. Petet prezan sa transformasyon (*sorry*) sa tranzisyon plito, sa tranzisyon ki'n arive, anba *Cleaners Corporative* bann *housekeepers* ki'n antre dan Gouvernman zot ti pe travay anba bann *MDAs*.

Par egzanp, ti annan ki ti pe travay kot Departman Finans; i annan ki ti pe travay kot *Public Service Bureau*; i

annan ki ti dan Ledikasyon, i annan ki ti dan Lasante. E basically tou le bomaten letan zot ti desann pou al travay se laba kot zot ti ale.

E letan nou, nou'n fer desizyon pou *phase out Cleaners Corporative*, nou'n war ki sanzman ki ti pou arive vreman se lekel ki *the employer of the housekeeper*?

So instead of being *Cleaners Corporative*, the employer becomes the Government. E parey mon koleg in eksplike, sa i pou fer ki i anmenn en benefis pou Gouvernman akoz i pou annan savings ki nou pou fer.

So the *housekeepers* zot kontinyen al travay kot zot ti pe travay, akoz nou ti ofer tou *housekeepers* lanplwa. Mon a donn en pti pe plis detay apre ki mannyer nou'n fer sa. Be solman se the management ki ti pe sanze.

So already Gouvernman ti pe ed Korperativ pou manage bann *housekeepers*.

So dan Gouvernman ti deza annan bann *administrative officers*, bann zofisyen HR, ki ti pe oversee travay bann *housekeepers* ti pe ede par egzanp ek zot *performance contract* pou fer zot *performance appraisal*.

Me solman nou ti war ki on top of that nou ti pe pey *administrative cost*, ki pou mon letan mon'n analize, letan

nou, nou'n analize, nou'n war petet i larzan ki ou pe pey de fwa.

Ou pe pey en antite pou *oversee housekeepers* e dan Gouvernman ou osi annan lankadreman pou *oversee housekeepers*. E ou pou war parey mon koleg in mansyonnen, letan ou koup sa bann lezot depans par lannen ou pe fer en *saving 5 milyon*.

E pou mwan pou nou *save 5 milyon larzan piblik*, i en desizyon ki ou bezwen fer. I pa en desizyon difisil letan ou pe fer, en desizyon pou ou *save larzan servis piblik*.

Mr Speaker, prezan ki mannyer nou ti fer sa? Letan desizyon ti'n fini ganny fer par *Cabinet*, i annan en group dimoun ki ti zwenn avek bann *housekeeper*. Avan nou ti zwenn ek bann *housekeeper* Departman Finans ti zwenn avek, avek *Cleaners Corporative*, pou eksplik pou prezant zot *findings*, pou eksplik zot sa sanzman.

E apre sa nou ti osi zwenn avek bann *housekeeper*. *Actually*, pou zwenn ek bann *housekeeper* an premye, ti mwan menm koman *Chief Secretary*, ti annan *Secretary of State* e apre ti annan en lot tim dimoun ki ti la pou donn nou sipor.

E nou ti eksplik zot ki *Cleaners Corporative is going*

to be phased out. E a sa pwen Mr Speaker, tou *housekeeper* ti ganny ofer sa ki nou ti apel en *expression of interest*. *Expression of interest* ti basically pou zot dir nou si zot ti a kontan travay avek Gouvernman.

E sa ti ganny fer pou Gouvernman osi komans prepare pou nou kapab *welcome bann housekeepers back into the Government*. Miting in ganny fer lo Mahe, lo Praslin e La Digue letan nou ti fini fer sa premye miting ti annan sa lot miting ki nou ti bezwen fer.

Akoz pou nou kapab re abzorb bann *housekeepers* dan Gouvernman zot ti bezwen ganny met *redundant*. E *redundancy* i annan en process ki ganny servi, ki Lanplwa i *oversee*.

Nou ti osi annan sipor legal par *Attorney General's Office*. E tou keksoz in ganny fer dapre *advice* ki nou'n gannyen; *advice* legal pou fer sir ki bann *housekeepers* i ganny *welcome back* dan Gouvernman.

Mr Speaker, *in terms of* diskisyon, mon krwar sa ti en bout miting ki mwan ki ti *lead*. Ki nou ti eksplik bann *housekeeper* se ki letan zot retourne dan Gouvernman zot pou ganny ankadre anba striktir Gouvernman.

Housekeeper i annan son striktir, son striktir administrativ e Gouvernman i annan en striktir administrativ. Nou bezwen ankadre travayer ki vin dan Gouvernman anba administrasyon Gouvernman.

I annan en Gouvernman; nou pa kapab annan detrwa *administrative structure*. E ki mon pe *mean* par sa? Par egzant lamazorite *housekeepers*, was required pou travay depi 7 er ziska 3 er e sa nou ti eksplik zot.

E letan nou ti pe fer sa legzersis Mr Speaker, nou ti war ki i annan en group travayer. Mon'n *actually note* konbyen en total 128 travayer *Cleaners Corporative* ki ti pe travay depi 7 er ziska 12 midi e zot ti pe ganny menm saler avek lezot *housekeepers* ki ti pe travay depi 7 er ziska 3 er.

Sa i en *practice* ki mon pa'n kapab war zistikasyon par deryer. Mon pou mon bann travayer ki pe travay 7 er ziska 3 er i pa kapab pe ganny menm peye avek sa group travayer.

Sa i en group travayer ki nou'n zwenn ki nou'n eksplik zot pou nou dir zot ki letan zot retourn dan Gouvernman sa laranzman ki zot ti pe travay 7 er ziska 12 midi e ganny saler parey zot koleg ki ti pe travay 7 er ziska 3 er pou arete.

Sa i en keksoz byensir, ki letan en group travayer i abitye avek zot laranzman travay avek en serten saler, in en pe difisil pou zot pran sa an kont. E byensir petet pou zot apre midi ti annan serten travay ki zot ti al fer pou zot ganny *additional income*.

Mon pou dir wi, sa in en *disruption*. Me pou mwan i pa en *practice* ki nou'n kapab tolere dan Gouvernman. Pou mwan sa i en *anomaly* e si mon pou go plis Mr Speaker, i petet osi en lenzistis pou bann ki ti pe travay depi 7 er ziska 3 er ki zot ti pe ganny menm saler, avek bann ki ti pe travay 7 er ziska 12 midi.

E wi, Mr Speaker, dan miting ki mon'n fer, sa ti en konsern ki bann *housekeepers* ti met devan e mon'n bezwen eksplik zot akoz i pa en *practice* ki nou pou kapab tolere.

En lot keksoz ki'n sanze letan zot in vin dan Gouvernman, i peyman bann *allowances*. I annan *allowance* ki ti pe ganny peye ki ti napa zistikasyon pou sa bann *allowances*.

Any allowance ki napa zistikasyon, i bann *allowance* ki nou'n bezwen aret peye, ziska ler nou ava konpran. Ouswa si napa ditou zistikasyon; par egzant i annan bann *responsibility allowance* par egzant.

Si mon pe *go back* pou sa group 128 ki zot travay depi 7 er ziska 12 midi. E apre si zot reste dan Gouvernman zot travay, zot ganny en *responsibility allowance*. Ou pa kapab donn en *additional responsibility* en *allowance* en travayer ki ti sipoze pe travay depi 7 er ziska 3 er.

E zot, zot osi sa group travayer zot in war ki zot in defavorize. Mr Speaker, e zot osi zot ti annan konsern e konsern in ganny adrese. *In terms of basic salary* wi letan mon ti fer mon miting avek bann *housekeepers* mon ti eksplik zot ki zot *basic salary* pa ti pou sanze.

E mon kapab met lo rikord la ki napa okenn *cleaner* ki'n antre dan Gouvernman ki zot *basic salary* in sanze. Ki *housekeeper* pe dir - mon pou repete se bann ki ti pe travay depi 7 er ziska 12 midi zot santi ki zot saler in ganny koupe, akoz zot pe travay plis erdtan ki zot pe travay letan zot ti dan Korperativ.

Be selman zot ti pe ekspekte travay depi 7 er ziska 3 er pou sa saler ki zot ti gannyen. E pou mwan sa Mr Speaker, nou pa'n sanz kondisyon travayer - mwan, mon krwar nou pe koriz en *anomaly*.

E parey mon'n dir dan en serten sans, i en lenzistik pou

bann ki ti pe travay depi 7 er ziska 3 er. En lot keksoz Mr Speaker, ki nou'n fer se, *overtime* Gouvernman i annan son lankadreman ki mannyer i kalkil *overtime*.

E sa lankadreman in la dan Gouvernman pou plizer lannen. E i en *mechanism* ki nou war li pe marse, nou kontinyen pe servi. E nou pa'n war ki mannyer bann *housekeepers* zot *overtime* ti ganny kalkile.

E pou nou osi fer sir ki *housekeepers* akoz letan ou zis pou mon *guess* en *value* ki ou pey en *housekeeper*, ou kapab pe *overpay* be osi ou kapab pe *underpay* bann travayer.

So ki nou'n dir pou sa premye 3 mwan, sa Zanye, Fevriye avek Mars, nou'n demann lorganizasyon pou *log overtime* ki bann travayer in fer e pou pey zot.

E letan nou ava war *the trend of overtime* la, ki nou kapab fer nou kapab servi sa lenformasyon pou nou travay pou fer en *commuted overtime allowance*. Akoz *commuted overtime allowance* ou pa guess.

I i en travay HR ki ou fer. Ou *log* ou war *trend* e letan ou war *trend* ou fer en kalkilasyon, pou ou kapab dir zot konbyen zot pou ganny peye.

Mr Speaker, petet osi zis pou mon dir letan nou ti pe fer

rekonsilyasyon *payroll* Zanvye avek *payroll* Fevriye, nou ti war ki i annan serten *housekeepers* ki pa ti'n ganny peye zot *long service allowance*.

Akoz letan mon ti zwenn avek zot mon ti dir avek tou *housekeepers* - akoz sa ti en desizyon ki Gouvernman ti'n fer - ki zot pou kontinyen ganny peye zot *long service allowance*. So letan zot sorti dan *Cleaners Corporative* zot vin dan Gouvernman, *whatever long serving allowance* ki zot ti pe gannyen zot ti pou kontinyen gannyen.

E nou ti war ti annan detrwa zot apepre, apepre 61 (mersi PS), apepre 61 ki pa ti pe ganny peye. Nou'n fini donn lenstriksyon savedir bann *housekeepers* ki pa'n ganny peye zot *long service allowance* Zanvye, Fevriye zot pou ganny sa ansanm avek zot saler an Mars.

E sa se, se lanons ki'n ganny fer Mr Speaker. Mon krwar mon ava aret la. E si i annan okenn *further leklersisman* nou ava fer sa *through question*. Mersi.

MR SPEAKER

Mersi *Chief Secretary*. Bon, wi, Onorab Loze.

HON JOHAN LOZE

Mersi Mr Speaker. Mon annan *point of order*, en *point of order*

anba *Order 8* lo fason ki ou conduct biznes Lasanble. Mr Speaker...

MR SPEAKER

Sa *point of order* pa'n ariv la an se moman donk,

(Off-Mic)

MR SPEAKER

...Non, non dan se moman.

HON JOHAN LOZE

(Off-Mic)

MR SPEAKER

Ale, ki ou pe dir?

HON JOHAN LOZE

Mersi Mr Speaker, pou ou lendilzans. Mr Speaker, *from what* Madanm Mohideen pe dir, in evok bokou *issues* avek *management* e serten Manm *Board* Korperativ li menm.

Alors ki mon pe sey *find out* mwan, eski *Board* Korperativ in refiz lenvitasyon Sekretarya, pou vin lo *panel* devan. E ki leskiz eski zot in donn Sekretarya, pou zot pa vin lo *panel* devan, pou donn leksplikasyon Lepep Seselwa lo tou sa bann keksoz ki pe ganny met devan la?

MR SPEAKER

Mersi Onorab. Napa *matter of privilege* ladan. So napa *point of order* ladan. *Order* in

prosedir ki nou'n swiv i annord. Mersi.

HON SEBASTIEN PILLAY
(Off-Mic)

MR SPEAKER

Onorab Pillay mon pe demann ou pa enteronp Lasanble, avek *point of order* ki pa annan en fondasyon valab.

Selman mon a ekout ou la.

HON SEBASTIEN PILLAY

Mersi Mr Speaker. Mr Speaker *Standing Order* i prevwar ki ler mon met en Mosyon lo latab e mon'n *move* mon Mosyon i vin propriete Lasanble. Mon Mosyon i demande ki S.I. 106 i ganny *quashed*.

Mon pa'n ganny prezantasyon lo mon Mosyon. Mon'n reganny en lot prezantasyon ki Gouvernman pa'n kapab fer lo S.I. 106 ki ti'n devret fer. Prezan mon pe demann ou atraver ou koman en Manm Lasanble, kote ki mwan, mon pou ale pou mon reklanm mon drwa koman en Manm Lasanble ler mwan, mon *move* en Mosyon.

Akoz Gouvernman ti'n kapab fer sa *at any time* ki i anvi; vin fer en *statement* i annan tou veikil pou li fer. So mon bezwen met devan ou Mr Speaker. E petet as en *matter*

of privilege mwan, mon pran lofans.

Taler ou'n met mwan deor akoz mon ti annan mon rezon pou en prosedir ki ou, ou'n etabli.

(*Interruption*)

MR SPEAKER
Order!

HON SEBASTIEN PILLAY

E ou'n fer egzakteman sa ki mwan, mon ti pe dir i devret ganny fer. So mon pa konnen ki mannyer mon pa - mon pa avans travay Lasanble? Mon pe zis fer travay pli kler pou mon ek mon lekip se tou. Mersi.

MR SPEAKER

Mersi. Mon war sa ki nou pe fer i reste annord avek sa ki *Standing Orders* i *provide* i kapab ganny fer dan Lasanble. Alor nou pou kontinyen nou pou pran kestyon pou larestan sa peryod.

Mon war plizyer Manm in deza lev lanmen, mon espere mon kapab pran tou. Me selman Speaker, i annan touzour lotorite pou li limit kestyon lo okenn size.

E mon annan plizyer Manm *LDS* ki'n lev lanmen ; nou pou, nou pou pran otan kestyon ki posib. Selman mon a dir si pa akoz zot tou zot in

lev lanmen avan, ki si en Manm Lopozisyon in annan en kestyon, ki mon pa pou permet en kestyon sorti kot Lopozisyon.

Savedir i - mon krwar zot osi zot pou annan drwa e mon pa kapab zis akoz tou Manm in lev lanmen, zis blok letan. So sa i mon diskresyon lo ki mannyer kestyon i kapab ganny pran. Mon demann zot tou pou konpran.

Nou a komans avek Onorab Esparon.

HON REGINA ESPARON

Mersi Mr Speaker. Bonzour tou dimoun a lekout. Bonzour Ms Mohideen avek Ms Tamatave. E dabor mon ti a kontan felisit Ms Tamatave pou sa pozisyon koman PS nou war poudir bann madanm pe fer perse.

(APPLAUSE)

HON REGINA ESPARON

E osi egalman felisit Ms Mohideen pou *Chairperson Board Pension Fund* ki in ganny apwente. Mersi dabor pou onor nou demann pou vin fer sa leksplikasyon devan Lasamble.

Mr Speaker, mon ti ava kontan demann *panel* konbyen travayer ki ti pe ganny peye sa R1500 *location allowance* ki'n ganny re

abzorbe dan bann Minister o departman?

E konbyen ka ki ti annan sa, ki ti napa zistifikasyon?

Dezyenm, eski apre sa legzersis *monitoring* ki bann Minister ou departman pe fer, *overtime* pou ganny konsidere pou bann departman ki annan sa bezwen eski ziska prezan in annan demann? Mersi.

MR SPEAKER

Mersi. *Panel*, si enn antre zot i pare pou reponn silvouple zis sinyal mwan.

CHIEF SECRETARY SHELLA MOHIDEEN

Ok Mr Speaker. Location allowance pou bann *housekeepers* anba *Cleaners Corporative*, nou kapab zis re verifye, me selman to my knowledge ti napa okenn *housekeeper* ki...

Ok, Ms Astride ava reponn sa en pti kou. Me solman zis petet Mr Speaker, pou enformen ki la letan ki'n abzorb bann *housekeepers*, nou pe fer en lankadreman spesyal pou bann travayer bann *housekeepers HCA*, kot *Health Center* an zeneral.

Akoz nou war ki zot travay i en pti pe pli spesifik zot, en? Zot *deal* avek bann *risks* ki petet, petet dan zot bann landrwa travay napa. E anba nou annan en *scheme* spesyal ki nou'n travay lo la

pou zot e zot in ganny sa *location allowance*.

Kot i konsern *overtime*, sa nou pe adres li *case-by-case*. Savedir tou landrwa travay ki pe war ki zot *housekeepers* i bezwen fer *overtime*, an se moman ki zot pe fer zot pe *log so zot in log Zanvye*, Fevriye zot pou *log osi Mars*.

E dapre sa *log* i annan peyman ki pe ganny fer. Sa lenformasyon ki nou pe anmase pandan sa 3 mwan ki nou pou fer nou pou get *trend* pou nou regarde si nou kapab *convert* sa *into an allowance*; sa ki nou apel *commuted overtime allowance*.

Commuted overtime allowance i en *average*. Annandler ou travay an plis, annandler ou travay an mwens. Me selman ou ganny sa *average*.

So i en *case-by-case* kot tou antite ki pe war ki i annan nesesite pou *housekeeper* ganny *overtime*, zot pe fer sa travay apre zot pou lyez e *Public Service Bureau* ek Finans pou nou travay lo sa *commuted overtime*.

E Astride?

MR SPEAKER

Mersi. Ms Tamatave.

PS ASTRIDE TAMATAVE

Mersi Mr Chair. Pou *location inducement* ki ou kestyon

spesifik, ti annan 13 *housekeeper* 2023 ki ti annan *location inducement* ki zot pa'n gannyen an Zanvye. Me selman sa nou pe travay avek lorganizasyon. Akoz i zis en antite spesifik pou nou regarde si tou travayer dan sa landrwa i ganny *location inducement*, then nou pou fer rektifikasyon. Mersi.

MR SPEAKER

Mersi. Onorab Henrie?

HON GERVAIS HENRIE

Mersi Mr Chair. Bonzour *panelist*. Mon premye kestyon, eski a sa pwen *panel* i kapab re asir nou poudir lefe ki *Cleaners Corporative* in fermen, bann dimoun in ganny re abzorbe, zot pa dan en pozisyon pli *worst off* ki zot ti ete avan zot ti dan *Cleaners Corporative*? Si zot kapab reasir nou sa?

E dezyenmman a sa pwen la, eski i fer sans pou nou reetabli *Cleaners Corporative*? Mersi.

MR SPEAKER

Panel silvouple zis lev lanmen pou reponn. PS?

PS ASTRIDE TAMATAVE

Mersi Mr Chair. Mr Chair parey CS in dir, napa okenn travayer ki'n *worst off in terms of zot saler*. Be o kontrer i annan travayer ki zot *basic*

salary in ogmante. Me par kont i annan sa bann *allowances* ki i annan travayer ki'n perdi.

Me selman laplipar sa in ganny rektifye; pou ganny rektifye dan saler an Mars. E i kapab annan bann enn de ki nou ava regarde lo bann *case-by-case basis* pou nou regarde si i annan okenn diferans.

In terms of si nou pou re institute Cleaners Corporative, Mr Chair, Gouvernman in pran en desizyon pou li recruit son prop cleaners lo payroll Gouvernman, pou nou asire lefikasite i ogmante.

So si nou *re institute Cleaners Corporative* i pou bezwen al rod son bann prop *cleaners* pou li fer son prop fonksyonnman. Akoz dezormen Gouvernman pou nepli pe donn *Cleaners Corporative* okenn larzan.

Akoz nou pa pou bezwen *cleaners from Cleaners Corporative* nou. Nou *cleaners* nou'n fini anploye lo *payroll* Gouvernman. In fini ganny ankadre lo striktir Gouvernman. Mersi.

MR SPEAKER

Mersi. Onorab Poris.

HON DOYACE PORIS

Mersi Mr Chair. Bonzour CS avek PS. Mon kestyion i koumsa; letan ki zot ti zwenn avek sa bann *housekeeper*, sa

bann *cleaners*, ki reaksyon sa bann travayer? E konbyen *cleaners* ki ti aksepte ki sa Korperativ pe fermen e pare pou travay dan Gouvernman? Mersi.

MR SPEAKER

Mersi. *Panel?* Yes, *Chief Secretary?*

CHIEF SECRETARY SHELLA MOHIDEEN

Mr Speaker, letan nou'n zwenn avek *Cleaners* Korperativ, bokou kestyion ti ganny demande lo bann *dues-zot* bann *exit dues* ki zot pou ganny peye, kan ki zot pou ganny peye.

Ti annan osi zot ki ti annan sa ki nou apel *sub assignment* letan zot annan en *loan* par egzanp avek bann labank ouswa avek *housing*. Zot ti pe regarde si nou, nou kapab fer sa entermedyer avek bann labank ki pa sezi zot larzan.

Zot osi ti pe demande si zot kapab ganny zot *letter of appointment* en pe boner, akoz sa osi ti a ede ki letan zot ti anmenn kot zot bann labank pou zot ganny zot bann larzan. Ti osi annan konsern parey mon'n dir bann ki ti travay depi 7 er ziska 12 midi pou regarde si...

I annan zot, zot rezon akoz zot ti pe demann sa kestyion i valab Onorab. Akoz

zot al fer sa pti louvraz ekstra. E baze lo sa lenformasyon ki zot ti donn nou, nou'n dan sa *scheme* ki nou'n devlope pou bann *housekeeper*, nou'n fer provizyon ki zot kapab kontinyen travay depi 7 er ziska 12 midi. Me solman saler ki zot gannyen i en saler ki *prorated* parey nou dir. Zot pa ganny *the full salary*.

E i annan bokou zot ki nou ti demann zot pou fer sa diskisyon avek nou. E i annan ki letan nou'n al analiz zot ka si zot pran sa *prorated salary* apre zot al fer sa bout travay extra, zot *actually ganny plis*.

E sa i en *practice* ki si sa lorganizasyon kot zot travay i kapab *entertain*, i en *practice* ki nou'n ankouraze.

So sa i ti en pti pe plito zot bann konsern Onorab.

MR SPEAKER

Mersi. Onorab Loze, ou kestyon?

HON JOHAN LOZE

Mersi Mr Speaker. Avan mon poz mon kestyon, mon le zis ganny en konfirmasyon avek PS, si mon'n byen tann li dir ki i annan serten sa bann *allowances* ki pou ganny restitye an Mars? Wi?

Mr Speaker, pwen nou largiman nou in tre senp, dan lamazorite bann *phasing out, repeal*, ferm lorganizasyon ki'n pase i annan en *grandfather*

clause, en continuation clause ki'n ganny mete dan tou Lalwa, konmkwa ki benefis bann dimoun pou ganny prezerve *at conditions of no less than existing*.

Pa'n dir dan okenn sa bann Lalwa *basic salary at no less than existing*; i dir *conditions* ki enkli ou bann *allowances* – enkli ou bann *allowances*.

Now, akoz ki sa menm baz, sa menm lazistis pa'n ganny aplike avek *housekeeping* ki nou'n aplik pou APDAR, ki nou'n aplik pou National Aids Council, ki nou'n aplik pou Agricultural Agency? Eski i annan en kondisyon spesyal, ouswa en kondisyon an mwens avek *housekeepers* ki defavoriz zot, fer zot ganny konsidere en lot fason mwen ki tou lezot?

Se sa ki nou pe rode, lazistis. Nou pa pe rod restitisyon lazans la nou.

Mon 2ennm kestyon, Mr Speaker, mon adres li to the *Chair of the House*, eski *Board Cleaners Corporative* in ganny en lenvitasyon pou vin asiz la lo sa *panel*, pou eksplik Lasanble tou sa bann keksosz misterye ki *Chief Secretary* in balans lo zot an di-z-an ki li *Chief Secretary* i pa kapab eksplike? Mersi Mr Speaker.

MR SPEAKER

Mersi. *Board* oubyen *Chairman Board* pa'n ganny lenvitasyon akoz sa pa ti dan Mosyon, ki ti ganny prezante par Manm ki ti demann sa Mosyon. Mersi. Lo lot kote *panel* lo premye kestyon, eski zot annan en repons? Yes, *Chief Secretary*.

CHIEF SECRETARY SHELLA MOHIDEEN

Mr Speaker, sa Gouvernman i valoriz tou travayer e mwan koman *Chief Secretary* mon en dimoun ki valoriz tou travayer.

(APPLAUSE)

CHIEF SECRETARY SHELLA MOHIDEEN

Mon krwar si nou memwar i bon, sak fwa ki mon'n vin la kot zot pik lo en serten group travayer ki zot demande, si pou aranz *scheme* isi laba, mon toulstan dir i enportan pou get tou travayer.

Tou travayer i enportan, *regardless* si sa dimoun i en *cleaner*, i en *driver*, e sa ki konn mwan ki konn mon filozofi, petet pou konnen ki mon annan respe pou tou travayer e tou dimoun mwan.

(APPLAUSE)

CHIEF SECRETARY SHELLA MOHIDEEN

E alor dan travay ki nou'n fer... Mr Speaker, mon ava re

eksplike, konmsi i annan bann *scheme* ki annan ki la pou plizer lannen, i annan ki nou pe regarde en pti pe ki mannyer nou bouz devan - tou konponan e saler i ganny donneen dapre sa *scheme*.

Par egzant si ou'n nonm par egzant *Aids Council*, letan mon pou regard bann konponan saler ki bann travayer *Aids Council* pe gannyen, tou sa konponan i tonm anba *scheme*, i ganny zistifye.

E i pli fasil letan ou pe fer sa tranzisyon pou ou tir zot pou ou anvoy zot. I fasil.

Ki nou pe fer la, nou pe dir letan *cleaners* i *transit into* Gouvernman, nou pa kapab anmenn bann *anomaly* dan sistèm. Se sa ki nou pe dir.

E i annan en travay ki nou bezwen fer parey *PS* in dir, si i annan bann serten *allowance* ki nou pe vwar, ki letan nou pe travay ki zistifye, ki nou devret fer retournen, nou a fer retournen.

Me solman mon pa kapab par egzant Mr Speaker, pou regarde pou dir i annan en *housekeeper* ki pe ganny en R3 mil par egzant en *commuted overtime*, e letan ou regarde oli *log*? Ki mannyer in ganny kalkile?

Mon pa dir i pa'n fer, me solman sa lenformasyon pa ariv kot mwan, pou nou kapab fer sa desizyon avek. I nou

devwar bann teknokrat pou nou fer sir larzan ki larzan piblik ki nou peye, i ganny peye dapre zistifikasyon.

E se sa legzersis ki pe ganny fer an se moman, pou nou fer sir ki tou konponan saler ki ganny peye i ganny zistifye.

E Mr Speaker, mon ava dir ki si letan nou fer sa legzersis, i annan bann konponan ki bann *housekeeper* ti devre ganny en zot ava ganny zot *backpay*.

Me si i annan konponan ki zot pa ti devret gannyen, nou pa kapab kontinyen peye si zot napa zistifikasyon pou peye.

E mwan mon krwar nou pe fer sa dan en fason pou fer sir ki i annan ekitab. Nou annan bann lezot travayer dan Gouvernman, bann drayver ki par egzanp zot saler i en pe parey ek bann *housekeepers*; nou pa kapab favoriz en group e defavoriz en lot group.

I en travay ki nou pe fer i transparan e ki nou pe anmenn *equity* dan fason ki nou pey bann saler. Mersi Mr Speaker.

MR SPEAKER

Mersi. Onorab Loizeau, ou kestyon?

HON NORBERT LOIZEAU

Mersi Mr Speaker. Bonzour Ms Shella, PS Tamataave. Mr

Speaker, mon ti annan 3 kestyon me 2 in ganny demande. Wi, 2 in de-z-an ganny demande, me selman mon annan en pti lesplikasyon mon anvi gannyen; lo kote ler zot sa bann *cleaners of Korperativ* ti ganny zot *dues*, eski ti ganny detaye byen?

Par egzanp i annan en fiy i dir mwan in ganny R32 mil e si ti detaye kwa sa R32 mil. Sa i pou sa, e si sa ti ganny fer pou zot konpran kwa sa larzan ki zot pe gannyen?

Apre 2enm, ler zot travay dan prive, mon panse ki prive osi i pey Korperativ en larzan. E sa larzan ki prive i peye, eski Korperativ li, eski i vin dan kont Gouvernman vi ki Gouvernman i enzekte bokou larzan dan Korperativ. Esaki sa larzan i vin dan kont Gouvernman, ouswa i al kot Korperativ e zot fer sa ki zot zot panse zot anvi fer avek? Mersi.

MR SPEAKER

Mersi. *Chief Secretary?*

CHIEF SECRETARY SHELLA MOHIDEEN

Mersi Mr Speaker, mon a reponn sa premye bout apre mon ava envit mon koleg PS pou reponn sa 2enm bout.

Mr Speaker, pou bann *exit dues, actually Service Bureau* ti travay in partnership

avek Korperativ, pou donn zot sipor pou kapab fer sa travay.

E letan nou ti rann *files* avek sa kalkilasyon avek Korperativ, wi nou ti'n detaye tou kan mannyer zot pou gannyen, zot konpansasyon zot accrued leave.

I annan zot ki'n ganny pey *prorated gratuity*. Tousala ti'n ganny detaye e nou ti donn responsabilite avek *Cleaners Corporative* pou zot ekri tou bann travayer pou donn detay zot bann *dues*.

E *Cleaners Corporative* in fer sa, me selman i annan enn, de mon dakor avek ou - i annan enn de *housekeepers* ki osi pe pran kontak avek mwan ki pe dir zot pa'n ganny zot let.

Me petet mon a profit sa lokasyon la pou mwan dir, *any housekeepers* ki pa ankor ganny son detay - akoz nou'n kit en rikord kot *Public Service Bureau*, akoz *Cleaners Corporative* in dissolve kekfwa zot pa pou ganny bann staff Korporativ pou ganny zot let, zot kapab pran kontak avek mon lofis, mon a fer sir ki zot ganny zot let.

Me solman tou *Cleaners Corporative* ti sipoze ganny zot let, pou zot ganny detaye ki zot bann *dues*. Mersi. PS ou azoute.

PS ASTRIDE TAMATAVE

Mersi Mr Speaker. Mr Speaker, wi tou bann reveni ki

Cleaners Corporative ti fer pou son *private function* ti al dan en kont komersyal. E sa bann reveni ti al anver depans ki ti siport depans loperasyon *Cleaners Corporative*.

E even Bidze ki Gouvernman ti donn *Cleaners Corporative*, nou ti transfer larzan from Bidze Gouvernman to *Commercial Bank Cleaners Corporative* laba e la kot li i ti fer tou son bann depans. Mersi Mr Chair.

MR SPEAKER

Mersi. Onorab Bastienne?

HON DESHEILA BASTIENNE

Mersi Mr Speaker. Bonzour Mr Speaker, bonzour tou manm Onorab e bonzour PS e *Chief Secretary*.

Mr Speaker, mwan mon kestyon i al koumsa;

Eski *Chief Secretary* ou kapab eksplik nou, vi ki *Cleaners Corporative* i ti en lorganizasyon ki ti provide *housekeepers* dan bann Minister, enkli lezot travay piblik, eski *Cleaners Corporative* sa letan i ti ganny en Bidze pou li kapab aste son bann lekipman, tel ki *Uniform* bann *cleaning items*, dezenfektan, ouswa eski sa i ti en norm, kot ti zis provide *housekeepers*, me selman sa bann Minister malgre ti pe pey zot, zot ti bezwen provide zot prop lekipman? Mersi.

MR SPEAKER

Mersi. Panel?

CHIEF SECRETARY SHELLA MOHIDEEN

PS, i ava pran sa enn.

MR SPEAKER

PS?

PS ASTRIDE TAMATAVE

Mersi Mr Speaker. Mersi Onorab. *In terms of Bidze Cleaners Corporative*, spesifikman pou uniform, letan nou Minister Finans nou donn *Cleaners Corporative* son Bidze, i annan 2 konponan; i annan konponan saler ki kouver saler bann travayer ki dan sekter piblik e saler administrative bann staff ladministrativ *Cleaners Corporative*.

Prive sa i ganny son reveni *through* son *private function*. E nou donn li en konponan pou son *operational cost* e ladan i enkli *uniform*.

Savedir *Cleaners Corporative* ki ti donn tou *cleaners uniform* pou servi e par kont i kapab ki i annan sekter prive ki zot, zot in rod zot bann *uniform* spesifik.

Mon pa tro konn tou detay me selman Gouvernman i annan pre R300 mil tou-le-z-an ki nou donn *Cleaners Corporative* ki al anver *uniform*.

In terms of cleaning expenses, non, Cleaners Corporative pa provide okenn antite ki netwaye cleaning expenses, me par kont se sa lorganizasyon ki bezwen asire ki bann cleaners pe ganny resours pou zot travay avek pou netwaye.

Se pa *Cleaners Corporative* ki ti donn resours pou travay avek. Se sa antite piblik oubyen sa antite prive ki ti donnent. Mersi.

MR SPEAKER

Mersi. Onorab Spiro?

HON RACHEL SPIRO

Mersi Mr Speaker. Premyerman les mwan koman en madanm felisit PS pou son lapwentman e osi Madanm Mohideen. *The sky is the limit* parey nou dir, kontinyen lo sa bon semen ki ou'n komanse.

Mr Speaker, mwan mon anvi konnen, letan nou pe koz lo bann *cleaners*, napa en dimoun ki anvi *worst off* letan i ganny son saler. E sa bann *cleaners most of them* ti'n fini abitye ek zot take home pay – sa final larzan ki zot antre avek lo sa ki zot ti pe gannyen.

E letan nou pe get sityasyon letan nou ti fer sa lodit ki zot pe dir, ti annan 3 opsyon e zot in swazir sa opsyon petet dapre zot i pli fasil mon mazinen, akoz tou-le-z-an ki odit in ganny fer dan

nenport ki lenstitisyon, i bezwen *point out* kote ki annan *discrepancies*.

E mwan mon anvi konnen sa *role oversight* pou sa enn lenstitisyon ti tonm lo lekel? E a ki moman ki in avans devan pou sey travay avek sa bann dimoun kot *Corporative* pou dir ou *deficiency* i la?

E lala fason ki nou pe sizere, parey i ganny fer letan bann antite i vin la dan Lasanble, nou sizere ou adrese pou ki sa Korperativ ti a kontinyen egziste. Konmsi mon ti anvi konpran sa dinamik la?

MR SPEAKER

Mersi Onorab. *Panel?*

CHIEF SECRETARY SHELLA MOHIDEEN

Mr Speaker, mon a pran premye bout apre PS a pran 2enm bout.

Onorab, mon konpran ou premye bout kestyon kot ou pe koz en pe lo *empathy*, en? Me solman kot mwan mon asize as *Chief Secretary*, annandler i annan bann desizyon en pe difisil ki nou bezwen fer.

Ki solisyon letan ou annan ou en *group housekeeper* ki pe travay zis 5 erdtan par zour i pe ganny menm lapey avek en lot group travayer ki pe travay –

HON RACHEL SPIRO

(Off-Mic)

CHIEF SECRETARY SHELLA MOHIDEEN

Espere Onorab. So pour mwan pou nou pa koriz sa *anomaly*, nou ti pou anmenn pou mwan en lenzistis. So mon pe *emphasize* avek sa *housekeeper* ki li i ti pe ganny son saler i pe travay depi 7 er ziska 12 – mon *emphasize*. Me solman – *this is all I can do. I can emphasize* me solman mon pa kapab fer en desizyon ki pou anmenn en *anomaly* dan sistenm.

So *empathy*, yes, me solman *tough decision had to be made*. Mersi Mr Speaker.

MR SPEAKER

Mersi. PS ou ava adres lot pwen?

PS ASTRIDE TAMATAVE

Mersi Mr Speaker. Mr Speaker, i bon osi pou note ki petet ler nou pe fer en *statement*, an krwayan lamazorite *cleaners* i ganny defavorize, ki pa le ka. Lamazorite *cleaners* pa'n gannyen defavorize. O kontrer laplipar *cleaners* in mentenir *status quo* oubyen i annan ki'n ganny plis.

Sa detrwa pti *anomaly* parey CS in dir i annan pou fer avek *long service allowance* ki sa in en *oversight* lo antite

piblik, ki'n fer sa *oversight* e nou'n *pick up*, nou'n fer zot korize.

Travayer Lasante zot *scheme* in ganny aranze e i napa sa *anomaly* signifikan ki petet ki nou pe dir. I pa le ka.

In terms of oversight, in terms of oversight, Cleaners Corporative, son parent Ministry i Minister Finans e Minister Finans tou-le-z-an as part of the budget process nou fer diskisyon avek Cleaners Corporative e nou'n war sa trend. Nou'n war li depi lontan, sa worrying trend of Korperativ as an outsourcing function.

E Mr Speaker, petet si mon kapab *divert* en pti gin zis pou met keksoz dan perspektiv, en? Cleaners Corporative i sipoze an prensip parey en lorganizasyon prive letan nou pe get li - i en Korperativ li.

Me over the years, tou benefis ki Gouvernman in donn travayer sekter piblik, ki enkli *long service allowance*, ki enkli logmantasyon saler, ki enkli *performance rating* pou 13enm mwan, tousala i aplikab avek en travayer Cleaners Corporative.

Alors kwa ki fer zot diferan avek en travayer sekter piblik? I ti zis en klasifikasyon. Sa letan, nou ti pe redwir *wage bill*, so cleaners ti ganny konsidere koman en *outsources function*. Me

solman letan ou regard en *cleaner* i pa'n zanmen ganny defavorize par rapor avek en travayer sekter piblik.

Me par kont parey CS in dir in annan sa *anomaly* ki'n arive kot Si ou pou get *hourly rate*, ki ou pey en *cleaner*, konpare avek en *hourly rate* ki ou pey *cleaner* konpare avek en *hourly rate* ki ou pey en *office assistant*, ki ou pey en drayver ti annan sa *variance*. Ki nou ti pou fer, eski nou ti pou aziste saler tou drayver, tou *office assistants* fer li ogmante?

Once ou ogmant saler sa group dimoun, ou bezwen ogmant saler tou dimoun, akoz i annan en *ripple effect* lo saler tou dimoun. Oubyen ou aranz sa pti group dimoun ki apepre en 100ten - en 100ten koumsa ou aranz sa saler sa pti git dimoun, pou fer sir ou kre sa lazistis back. Mersi Mr Chair.

MR SPEAKER

Mersi. Onorab Andre?

HON CLIFFORD ANDRE

Mersi Mr Speaker. Bonzour CS avek PS. Felisitasyon dan zot bann novo rol. PS Tamatave in pran en pti bout mon kestyon, me selman mon pou expand lo la.

Letan ou annan en Korperativ, i sipoze en groupman manm sa antite ki'n

ganny formen e zot travay – letan mon'n get definisyon zot travay pou zot par zot. Eski Gouvernman ti en manm Korperativ e si i ti en manm, ki benefis li in gannyen avek Korperativ, oubyen son kontribisyon, se zot pou donn en Bidze tou le lannen e en Bidze endefini? Sa i premye.

2enm Mr Speaker, i annan en *savings* ki'n ganny fer – CS in dir nou aepre R5 milyon, eski i posib si kekfwia i demann en pti pe plis letan ou avan les nou konnen – pou ou kapab donn nou en pti pe detay an term kwa sa *savings* ki'n ganny fer pou kategoriz li, pou nou kapab *at least* vwar en pti pe ki nou a kapab analize.

E an prenan kont sa – sa 7 erdtan ki - *sorry from* 5 zot in al 5 erdtan dan plas 8 erdtan ki sa 128 dimoun ti ganny – ki mannyer sa 128 dimoun ti ganny kategorize ou ganny swazir pou zot benefisye avek sa? Mersi.

MR SPEAKER

Mersi. Nou a demann bann Manm pou reste lo 2 pwen akoz nou le permet lezot Manm osi demande. *Panel?*

PS ASTRIDE TAMATAVE

Mersi Mr Chair. Pou mwan reponn premye kestyon Onorab, eski Gouvernman ti en manm Korperativ? Non, se

bann *cleaners* ki en manm – tou *cleaners* ti en manm sa Korperativ.

Eski Gouvernman in benefisye *anything from* sa Korperativ? Non. Me eski bann *cleaners* in benefisye ek keksoz? Sa mon pa pou konnen, me selman an prensip *let's say* tou le lafen lannen ou fer en profi, an prensip sak profi i sipoze pe ganny redistribye anver ou bann manm. Si sa ti'n arive mon pa pou konnen.

Ou dezyenm kestyon *in terms of breakdown* en pe lo *savings* ki'n ganny fer *out of* sa *demerger*, konmsi *out of* sa *phasing out of* sa Korperativ. Par egzanp par an nou ti pe *pey office building rents* 651 mil so ki sa i tonbe. Nou ti pe *pey lasirans* lo bann travayer aepre R334 mil.

Ti annan peyman pou zot *utilities* ki R84 mil ; ti annan peyman *uniform* ki R300 mil, ti annan peyman ki larzan nou ti donn zot par egzanp pou *training* R60 mil, zot ti annan en transpor, lasirans transpor, bann *office equipment* ki zot aste e osi saler bann *staff administrativ*.

Cleaners Corporative by the time i fermen, ti reste li 7 travayer administrativ e sa ti pe kout nou aepre R138 mil par mwan pou sa 7 *staff administrativ*. So this is en pe

breakdown of savings ki nou'n fer.

MR SPEAKER

Mersi. Yes, nou a pran kestyon Onorab Roucou.

(Off-Mic)

MR SPEAKER

In reponn 2 kestyon Onorab.

HON MICHEL ROUCOU

Mersi Mr Speaker. Si *panel* i kapab dir nou - bomaten nou'n tann dir ki dan lentervansyon Onorab Spiro, ki bann *cleaner* i annan ki pe pas martir.

Si zot kapab dir nou ki zot ti'n ganny okenn konplent apre sa 3 mwan la ki'n pase, si i annan okenn konplent ki bann *cleaner* in vini pou dir bann landrwa travay - oubyen fason ki Gouvernman in fer sa sanzman ki si zot pe pas martir?

Apre mon lot kestyon, zot in dir poudir *Cleaners Corporative* ti annan li 671 manm travayer. Si zot kapab dir nou konbyen parmi sa 671, konbyen zot ki'n antre dan bann departman ouswa dan bann Minister ki zot, zot in plase? Mersi.

MR SPEAKER

Mersi. *Panel?*

PS ASTRIDE TAMATAVE

Mersi Mr Speaker.
Lankadreman *Cleaners Corporative* pandan sa tranzisyon Mr Speaker, i tonm anba Lofis *Public Service Bureau*.

E mon pe annan en *oversight* en pe direk, pou fer sir ki keksoz i tonm an plas e apre la nou pou desantralize ki tou bann MDAs pou pran responsabilite zot *housekeepers*. Keksoz in al pli byen ki petet ki mon ti pe ekspekte. Tou keksoz i pe tonm an plas.

I annan enn de *housekeepers* ki petet zot, zot annan en pti problem latitud.

Actually an se moman zot ek mon lofis nou pe travay avek zot met zot lo *performance improvement plan* pou sey travay avek zot. Akoz nou ti a kontan tou bann travayer ki anvi travay i kontinyen travay. En bon pe zot i bann *mère de fanmir* e nou, nou'n pouse pou fer sir ki zot tou zot dan lanplwa.

Mr Speaker, menm pou dir ki Zanye letan nou'n retour travay ti annan bann *housekeepers* ki pa ti'n fer prosedir pou zot retour dan lanplwa. Nou'n *actually call* sa bann *housekeepers*, pou rode kote zot ete pou kapab fer zot retour dan lanplwa.

E an se moman i annan 615 *housekeepers* ki pe travay avek Gouvernman. Mersi.

MR SPEAKER

Mersi. Mon a pran - Onorab Aglae, Onorab Aglae ou ti'n lev lanmen ou? Mon a donn ou laparol.

HON EGBERT AGLAE

Mersi Mr Speaker. Bonn apre midi. Dabor mon a felisit Ms Astride pou ou nominasyon *PS* e osi mon rekonnet *Chief Secretary*.

Mon kestyon, akoz mon'n ekout zot byen la, mon war poudir i annan serten kontradiksyon avek serten bann larepons ki pe ganny donnen, *ok?* E mon oule etablir byen fe, *ok?*

Premyerman letan zot in reponn serten kestyon, ou'n fer resorti poudir i annan serten *anomaly*, *ok?* E osi ou rekonnet poudir i annan pti group travayer dan sa kategori, ki pa pe neseserman al kot zot avek sa *take home pay* ki zot ti pe gannyen i kler sa.

Akoz i annan ki'n demann kestyon ki'n fer resorti poudir konmsi napa - tou dimoun pe sorti parey ti ete letan zot ti dan Korperativ. I pa korek sa.

So baze lo sa *Employment Act* i fer resorti anba 49(1) ki ou pa kapab san kondisyon sa travayer si ou pe ofer li en lot kondisyon lanplwa, ki si i pa aksepte pou li *worsen off*

either i pou bezwen aret travay anba 49(3) ouswa si li i aksepte, ou donn li sa ki ou pe ofer li.

So baze lo sa mon ti a kontan premyerman konnen, eski dan sa formil ki zot ti pe travay lo la, tou travayer ti aksepte sa ki zot ti pe ganny met devan zot, *ok?* Ouswa eski zot ti fors zot lekor pou servi lezot kad legal, pou zot arive *achieve* sa ki zot ti pe demande? Sa i enn?

Dezyenmman Ms Astride -*PS* ou'n fer resorti - i enteresan sa, poudir *GDP* sa ki *Cleaners Corporative* baze lo sa ki rekomandasyon *IMF* i 00.2poursan *it's minim*.

So akoz ki ou pa ti war li neseser, vi ki i en pti poursantaz parey nou dir - ki sa pti group dimoun; menm si i ti kapab annan 10 ladan, akoz nou, nou pou lager pou sa 10 akoz nou krwar dan lazistis sosyal nou.

Menm si ti annan 10 a 15 ki pe ganny defavorize, ou ti a *bring zot onboard at par* avek bann lezot ki swadizan pe ganny sa benefis, ki ou'n dir pa *worsen off* ki zot ti a anmenn zot *at par* avek. Akoz zot pa ti fer sa? Zot ti kapab fer sa. Mersi.

MR SPEAKER

Bon, permet *panel* reponn silvouple. CS, wi?

CHIEF SECRETARY SHELLA MOHIDEEN

Mr Speaker, petet zis pou mwan re eksplike ki letan *Cleaners Corporative* in ganny dissolve, i ti annan process ki nou apel *redundancy*.

E apre *redundancy*, travayer i ganny reganny anploye. E i zis parey si ozordi la mwan mon annan en saler, mon aret travay. Mon pa pou kapab servi *Employment Act* kot mon pou al travay dan en nouveau lorganizasyon, pou mwan dir donn mwan sa saler akoz *Employment Act* i dir fer mwan mwen defavorize.

So i enportan pou konpran byen ki *cleaners was employed by the Cleaners Corporative*. In annan en *redundancy process* ki'n ganny fer e apre zot in ganny re anploye. Sa process *reemployed* parey mon'n eksplike, tou *cleaners* ti ganny sa ki nou apel en *expression of interest*.

Dan sa *expression of interest*, zot ti siny en dokiman - i la lo *file*, lo tou *file housekeepers* ou pou vwar sa dokiman, ki zot ti sinyen ki zot ti dir ki zot dakor pou zot vin travay dan Gouvernan anba lankadreman Gouvernman.

Gouvernan pa ti pou sanz son lankadreman pou anmenn lankadreman Korperativ dan nou lankadreman Gouvernman.

Sa i pa en keksoz ki nou ti dir nou pou fer e sa ti ganny eksplike tre byen avek bann *housekeepers*.

E letan zot in ganny zot dokiman ki nou apel sa *expression of interest* ki zot ti dakor pou antre dan Gouvernan anba lankadreman Gouvernman, se la ki apre nou ti fer prosedir pou anploy zot. Mersi Mr Speaker. Sorry Mr Speaker. dezyenm bout kestyon. Sorry Mr Onorab zis *remind* mwan? Ok.

MR SPEAKER

Mersi. Onorab Larue kestyon.

CHIEF SECRETARY SHELLA MOHIDEEN

Sorry Mr Speaker. dezyenm bout kestyon. Sorry Mr Onorab zis *remind* mwan? Ok.

HON EGBERT AGLAE

Lefe ki sa poursantaz ou'n dir 0.02 *it's minim, it's nothing, why not?* Konsidere.

MR SPEAKER

Mersi. Wi, CS.

CHIEF SECRETARY SHELLA MOHIDEEN

Sa statistics ki mon koleg in donnen, i ki mannyer sa pou afekte *GDP*. Sorry pou afekte nou *wage bill*. Nou *wage bill* i increase by 0.02percent.

MR SPEAKER

Mersi.

HON SEBASTIEN PILLAY

(Off-Mic)

MR SPEAKER

Onorab Pillay ou a esper ou trou silvouple. Onorab Larue ou kestyon. Silvouple annou sey al vit, i reste nou apenn 20 minit.

HON FLORY LARUE

Mersi Mr Speaker. Mr Speaker, mon ti a kontan demann *panelist*, si zot in regard sa Rapor Oditer Zeneral, akoz zot in nonm zot odit ki zot in fer entern, me eski zot kapab dir nou ki mannyer rapor Oditer Zeneral in asiste zot?

E enn bann keksoz ki zot in koz lo la osi, i ki bann travayer in ganny en konpansasyon, eski zot kapab dir nou an total konbyen konpansasyon ki Gouvernman i peye pou ferm Korperativ? E ladan si zot kapab donn nou en nide bann konpansasyon pli o ki serten in gannyen? Mersi.

MR SPEAKER

Mersi. *Panel.*

PS ASTRIDE TAMATAVE

Mersi Mr Chair. Mr Chair, letan Oditer Zeneral in fer son rapor, in komans son rapor si

mon pa tronpe an 2023, oubyen tar 2022 e a sa letan nou Minister Finans, nou ti'n fini konplet nou legzersis. E dan Rapor Oditer Zeneral in resorti ti annan en keksoz ki nou menm nou, nou ti'n *pickup* dan nou bann *assessment* ki nou'n fer.

Actually in siport nou desizyon, oubyen nou rekomandasyon. Akoz zot bann *findings* i ti bann keksoz ki nou osi nou ti'n vvar, oubyen bann konsern ki nou osi nou ti annan.

In terms of konpansasyon. Total konpansasyon in arriv R29.4 milyon. E petet *in terms of amount* ki'n ganny peye, pli gro sonm peyman i apepre, ti 300, mon zis anvi donn sa sif egzakt i ti R322 mil pli gro sonm konpansasyon ki ti ganny peye.

E ladan *on average*, laplipar *cleaners* in ganny ant varye ant R50 a R100 mil. Ou annan bann ki'n ganny par anba R10 mil *very minimum*, me sa i bann in antre dan korperativ tar lannen pase. Mersi Mr Chair.

MR SPEAKER

Mersi. Onorab Adelaide kestyon.

HON FRANCOIS ADELAIDE

Mersi Mr Speaker. Dabor mwan osi mon oule felisit lekip

pou zot bon travay ki pe fer. Zis parey Onorab Spiro in felisit zot, me selman avan in kraz zot en kantite ki zot in mal fer sa travay.

Mr Speaker, mwan mon kestyon le mon'n tann sa zafer konpansasyon in arriv R300 mil petet pou en dimoun, me mon oule demann zot son CEO konbyen larzan ki i ti pe gannyen?

E bann lezot larzan en pe pli o pour ki sa Korperativ ti pe peye ? E enkli bann *allowance* osi bann ki en pe pli o, si mon ti kapab ganny sa larepons.

Apre mon ti a kontan demann ek *panel*, si sa S.I la parey i ete i ganny *repeal*, eski i annan bann *dues* ki sa bann dimoun in gannyen ki zot pou bezwen re rann, akoz vi ki sa i larzan piblik? Mersi.

MR SPEAKER

Panel.

CHIEF SECRETARY SHELLA MOHIDEEN

Mr Speaker, premye bout kestyon mon krwar ban lenformasyon petet en pe personnel, en pe difisil pou nou donnen. Anr...

(comments off-mic)

MR SPEAKER

Ou kapab evite *Chief Secretary* si ou santi i delika. Yes, okenn lot pwen?

CHIEF SECRETARY SHELLA MOHIDEEN

Si S.I pa ganny *repeal*, mon krwar parey mon koleg in eksplike, letan Gouvernman in fer en desizyon ki i pou anploy son bann *cleaner*, Gouvernman i anploy son bann *cleaner* e nou, nou kontinyen fonksyonnen. Mersi.

MR SPEAKER

Mersi. Mon a pran kestyon Onorab Cosgrow.

HON WALLACE COSGROW

Mersi bokou Mr Speaker. Bonzour Ms Tamatave. Bonzour Mrs Mohideen.

Mr Speaker, mon krwar lesansyel bomaten, i annan en pwen esansyel e en pwen kardinal ki nou bezwen adrese e ki mon war nou pe fer letour otour sa pwen. I annan en lasirans ki ti ganny donnen, ki zot pour - tou bann *cleaners or housekeepers* parey nou apel li la, zot *take home pay* pa ti pou sanze.

Sa pwen kardinal. Zot *take home pay* pa ti pou sanze e sa lasirans ti ganny donnen par *Chief Secretary* dan miting. Now nou kapab nou'n fer miting nou'n koze nou'n dir en pake keksoz.

Sa ki mon anvi demann *Chief Secretary*, eski letan zot ti pe prepare pou fer sa re

abzorpsyon bann *cleaners* dan Gouvernman *proper*, eski zot in a size e konpar striktir saler Korperativ *cleaner* avek striktir *cadre housekeepers* dan Gouvernman *proper*, pou zot ganny en nide pou dir, be mon pa ti pou kapab anploy sa bann dimoun lo sa bann saler sa bann *allowances* ki annan, akoz i pa ti pou parey, i pa ti pou *match*.

Si zot ti'n fer sa legzersis *proper*, plito zot ti'n fer, zot ti devret war poudir nou pa ti pou kapab marye sa bann saler ek sa bann *allowances*, hence nou pa ti pou kapab fer en komitman dan en miting ki ou *take home pay* ti pou reste parey.

Nou ti ava donn zot en larepons fran, wi ou pou antre dan Gouvernman, ou pou bezwen re ante dan *public service* me malerezman sa striktir saler ki ou ti lo la kot *Cleaners Corporative*, i pa pou parey sa enn dan *public service* anba *housekeeper cadre* so ou pou bezwen pran serten *pay cut*.

Mon pa pe dir saler, mon pe koz *pay cut*. E avan ou siny sa dokiman ki *Chief Secretary* in dir nou in sinyen, sa dimoun ti ava annan *informed decision* e i ti a kapab pran en desizyon baze...

MR SPEAKER

Onorab, silvouple!

HON WALLACE COSGROW

Mr Speaker, sa *issue* i delika, les mwan eksplik en pti git.

MR SPEAKER

Wi, me selman...

(*comments off-mic*)

HON WALLACE COSGROW

Be nou kapab ale ziska tanto.

MR SPEAKER

Wi, be ou pe fer en largiman – ou pe fer en argiman avek *panel*. Silvouple.

HON WALLACE COSGROW

Be nou pa kapab vin demann bann kestyon ki zis par bout, bout! Sa i bezwen ganny eksplike.

MR SPEAKER

Wi, be demann byen; demann byen kestyon. Mersi.

(*comments off-mic*)

HON WALLACE COSGROW

Ok. So si *Chief Secretary* i kapab dir nou si zot in fer sa legzersis e si zot ti'n war *anomaly* ant *Cleaners Corporative pay structure*, avek *housekeepers cadre structure*, e si zot ti'n war akoz zot in fer sa kalite lasirans avek bann *cleaners*? Mersi.

MR SPEAKER

Mersi. *Chief Secretary*, ou ava adrese silvouple.

CHIEF SECRETARY SHELLA MOHIDEEN

Mersi Mr Speaker. Mr Speaker, lo kote kondisyon travay dan Gouvernman, wi, Mr Speaker se mwan ki ti *meet* ek bann *housekeepers*, pou mwan dir zot. E napa okenn *deviation* lo sa ki mon ti dir bann *housekeeper* e ki mannyer nou pe enplimante.

Mon ti eksplik zot ki zot saler debaz pa pou sanze. *If anything*, i annan zot ki'n ganny en pti *increase* dan zot saler debaz. E mon ti eksplik zot ki bann lezot *allowance* ki zot pou gannyen i pour anliny avek *Scheme* Gouvernman. Sa ti ganny eksplike.

Dezyenm parti kestyon Mr Speaker, si letan nou ti fer analiz pou nou regard *Scheme of Service Housekeepers* avek Gouvernman? Mon krwar nou pa pou kapab osi blyie, ki letan nou fer sa analiz nou bezwen regarde ki se Gouvernman ki ankor - mon pou repete se larzan piblik. I *public fund* ki ti pe ganny servi pou pey sa *Scheme of Service Housekeeper*.

E si nou vvar ki i annan en *scheme of service* ki pe vin en *stress* lo Bidze Gouvernman, en Gouvernman responsab i bezwen regard sa e i bezwen fer analiz e i bezwen

fer sir ki sa larzan ki ganny *entrusted* ek nou, i larzan piblik i bezwen ganny depanse dan en fason ki annan *value for money*. E lo sa desizyon ti baze. Mersi Mr Speaker.

MR SPEAKER

Mersi. Onorab Zialor.

HON NADDY ZIALOR

Mersi Mr Speaker. Bonn apre midi Mr Speaker. Bonn apre midi PS avek Ms Shella.

Ou'n nonmen dan ou prezantasyon, ki ou annan 2 gran group bann *housekeeper* ki dan 2 gran Minister, sa i Minister Ledikasyon avek Minister Lasante. Eski ou annan sif pou konbyen *housekeeper* total ou annan dan sa 2 Minister? Mersi.

MR SPEAKER

Mersi. PS, ou pou kapab.

PS ASTRIDE TAMATAVE

Mersi Mr Chair. Mr Chair, petet mon ava rod sa lenformasyon apre mon ava reponn i ansanm avek repons en lot kestyon silvouple. Mersi.

MR SPEAKER

Ou ava rod sa lenformasyon. Bon, *ok*. Nou a pran kestyon Onorab Romain.

HON GEORGES ROMAIN

Mersi Mr Speaker. Mr Speaker, mon kestyon i al

koumsa, eski panel i kapab dir nou, si zot ti fer en *survey* avek bann MDAs, pou regarde si zot ti satisfe avek Korperativ? Sa i mon premye kestyon.

Mon dezyenm kestyon, an vi nou koken sa S.I. 76/2010 ki ti vin dan Lasanble pou *increase* zot *quota* pou 500 e la ler nou'n ganny dir ki i annan 658 travayer ki ti dan Korperativ, mon anvi konnen lekel ki donn permisyon vreman pou zot kapab *increase* sa kantite dimoun, e an vi ki ti napa okenn amannman lo sa S.I. Mersi Mr Speaker.

MR SPEAKER

Mersi. Panel nou annan 2 kestyon la.

PS ASTRIDE TAMATAVE

Mersi Mr Chair. Mr Chair, wi, nou ti fer en *survey as part of* nou *analysis*, pou nou regard *feedback of* bann antite Gouvernman i pe ganny servis avek *Cleaners Corporative*.

E ladan nou ti tous diferan kestyon nou ti demande. I ti get *in terms of* efikasite, *service delivery, involvement* ki zot annan avek *the recruitment process*, kontrol ki zot annan avek lo bann *cleaners* an zeneral. Nou ti tous tousala.

E baze lo bann rezulta *survey* i ti fer nou pran rekomannde ki *it's better* ki

Cleaners Corporative i ganny phase out akoz rezulta *survey* ti montre ki i annan plis petet *the lack of control* lo departman over the cleaners. And lefikasite vreman pa ti pe ogmante.

In terms of lekel ki donn permisyon pou *Cleaners Corporative increase* son bann manm over the years. An prensip *Cleaners Corporative* ki mannyer process ti marse, bann antite piblik ti'n met request avek *Cleaners Corporative* lo *cleaners* adisyonnel ki zot ti annan.

E *Cleaners Corporative* li i soumet son Bidze avek Minister Finans tou le lannen. E Minister Finans li i *review* sa Bidze e i donn *Cleaners Corporative* en sonm larzan. E depi letan nou'n *pickup* ki in annan sa ogmantasyon ki an deor avek Lalwa, *this is where* ki nou dir be nou bezwen fer en legzersis.

Pou nou revwar ki mannyer *Cleaners Corporative* in grosi sa kantite e ki bann antite respektif ki'n *request cleaners* anplis. So lekel ki donn permisyon? An prensip indirectly ou pou dir Minister Finans, akoz nou donn larzan *Cleaners Corporative* baze lo Bidze ki submit e son lalis *cleaners* ki i demande. Mersi.

MR SPEAKER

Mersi. Onorab Pillay ou kestyon.

HON SEBASTIEN PILLAY

Mersi Mr Speaker. Mr Speaker, pou montre ki mon pa'n zis reve pou vin ek sa Mosyon dan Lasanble *just for the sake of* annmenn en Mosyon, *ok?* Mon'n fer mon resers. I annan 257 mon krwar *cleaners as of December 2022* ki ti kot Minister Lasante *which was the highest.*

The next one was 58 e mon krwar that was Minister Ledikasyon e apre i annan detrwa i annan 28. So i annan 56 Minister Ledikasyon, 28 Departman Kiltir - bann ki pli gro 28 bann community center.

Mr Speaker, mon'n fer mon resers e mon konnen ki kantite *cleaners* ki pe dir poudir ki zot kondisyon pa parey i sipoze ete. E nou pe fer tou sa letour Mr Speaker, *there is one point* ki nou bezwen sible lo la e mon ti a kontan ki mon ganny klarifikasyon lo la.

Pou Lepep Seselwa ki pe ekout nou, pou zot konpran nou pe konplent lapey en *cleaner* e i enportan nou konpran krwar ki nou pe konplent la anndan, ki mon pe war lot kote pe defann e mon war *Chief Secretary adamant* pou protez larzan Gouvernman.

Basic salary en cleaner i R6 mil 206 dapre Rapor Oditer Zeneral. 5.18 sa Rapor Oditer Zeneral ki Finans in demann li pou li fer, ok? Following a review of Korperativ an 2019, ok, ti annan en R1500 ki ti ganny azoute.

So ler nou regard *source* Rapor Oditer Zeneral, en *cleaner* i ganny li R8 mil e R8016.30sou, R8016.30sou sa i en *cleaner* ki dan bann *normal MDAs* e en *cleaner* ki dan *Ministry of Health portfolio* i ganny li R8065.

Prezan sa *cleaner* ki dan *Ministry of Health portfolio*, Oditer Zeneral in dir ki akoz Minister Lasante i bezwen bann dimoun spesifik e annan serten leksperyans, alors i annan sa adisyonnell ki zot in gannyen. E sa adisyonnell ki fer ki en *cleaner* kot Minister Lasante i al kot li dan plas al kot li ek en R8 mil i ti pe al kot li avek en R10,985.

Now, setou ki nou pe konplent la nou. En Minis in ganny li en allowance zis pou ledan R10 mil.

MR SPEAKER

Sorry, sorry mon pa krwar nou devret al dan bann lezot ka Minis, sorry Chief Secretary. Mon pa konnen si Onorab Pillay i kapab fer son pwen lo sa size kestyon, me selman pa pran tro bokou letan.

HON SEBASTIEN PILLAY

Mersi Mr Speaker. Mr Speaker...

MR SPEAKER

Fini poz ou kestyon.

HON SEBASTIEN PILLAY

Mr Speaker, mon'n ekout *Chief Secretary* e mon'n regard bann eleman ki Oditer Zeneral in souleve dan son rapor.

Mon pa pe war sa bann *anomaly* ki mon'n tann menm Prezidan koz lo la. Sel keksoz ki Prezidan in, ki Gouvernman in pran se en desizyon Polisi pou *phase out Cleaners Corporative* baze lo son Polisi son *wage to GDP ratio*.

Be dan sa *phasing out*, Oditer Zeneral in fer kler poudir par egzanp *Cleaners Corporative* ti aplik tou bann sirkiler ki ou predeseser *DPA* ti met an plas e ozordi *PSB* i anvoye.

In fer tou bann lezot peyman ki si poze ganny fer, in napa okenn iregilarite vizavi bann peyman. Mon tann lot kote pe sot anler lo lapey en *CEO*. Nenport *CEO* i fini dan Gouvernman i ganny *at least* R500 mil, i annan ki'n ganny menm R600 mil dernyerman la, *ok?* Mr Speaker,

MR SPEAKER

Permet CS reponn.

HON SEBASTIEN PILLAY

...Mr Speaker, mon kestyon pou *Chief Secretary*.

MR SPEAKER

Prezan ki ou pe demann kestyon?

HON SEBASTIEN PILLAY

Be yes, Mr Speaker...

MR SPEAKER

Be *ok*.

HON SEBASTIEN PILLAY

...ou'n anmenn li pou reponn mon Mosyon dan Lasanble.

(comments off-mic)

HON SEBASTIEN PILLAY

I'm the owner of the Motion.

(Interruption)

MR SPEAKER

Order! Order! Silvouple annou avanse Onorab.

HON SEBASTIEN PILLAY

Mr Speaker, sa ki mon pe dir avek *Chief Secretary* *ok*, Lalwa i prevwar ki ler en *S.I* in fini pase napa personn ki pou al rann son *dues*. Sa ki'n pase anba sa *S.I* in fini, sa ki zot in ganny peye in fini. Personn pa pou ganny revwar.

So Onorab Hoareau i bezwen get *IGPA* pou li konpran ki savedir. Mon kestyon pou *Chief Secretary*, tou senpleman ki mon pe

demann ou, ou pe fer sa ki ou pe fer *ad hoc*, ou pe al *house to house* pou ou aranz sa bann sa.

Ki mon pe demann ek ou, retourne *back to* sa S.I e retourne menm provizyon ki ou'n met dan bann Lalwa *which is* sa bann *cleaners* i re benefisye menm kondisyon ki zot ti benefisye avan ki ou ti ferm Korperativ!

(comments off-mic)

MR SPEAKER

Mersi.

(comments off-mic)

HON SEBASTIEN PILLAY

This is what it is Mr Speaker. Se sa Mr Speaker. Mr Speaker...

(comments off-mic)

MR SPEAKER

Onorab, mon krwar ou'n ase long, ou'n fer en kantite largiman. *Chief Secretary*, ou annan en repons oubyen nou kapab *move on*?

CHIEF SECRETARY SHELLA MOHIDEEN

Mr Speaker, petet mwan an konklizyon, mon pou dir ki *any proposal* ki ganny met a mon latan..., konmsi ki demann mwan pou fer aksyon, ki pe *endorse* en *anomaly*,

mon pa pou fer. Mersi Mr Speaker.

MR SPEAKER

Mersi. Ou *point of order* Onorab Adelaide.

HON FRANCOIS ADELAIDE

Yes, Mr Speaker, mon ti'n demann en kestyon *panel*, akoz i enportan pou mon fer mon deba taler. Kantmenm nou pa nonm non, *at least* donn nou sa *wage bill* pou nou konnen kantite larzan in ganny depanse, anvoy kot Lasanble nou, nou a gannyen pou sa deba apre midi. Mersi.

MR SPEAKER

Anfen *Chief Secretary* in deza reponn sa kestyon. Mon a pran dernyen kestyon Onorab Samynadin.

CHIEF SECRETARY SHELLA MOHIDEEN

Mr Speaker, eski i *ok* pou nou pa anonse, me solman nou ava fer ban Manm Lasanble ganny kopi?

MR SPEAKER

Wi, *ok*. Onorab Samynadin.

HON KELLY SAMYNADIN

Mersi Mr Speaker. Bonzour CS Mohideen e PS Tamatave e felisitasyon pou nouveau *post*.

Mon premye kestyon, letan nou pe konsider striktir *accountability* *Cleaners*

Corporative, mon ti ava kontan konnen how frequently ki bann annual general meetings ti ganny fer, ensi ki eleksyon pou nouvo Manm Komite Management?

E dezyenmman, mon ti a kontan konnen ki mannyer odit ti ganny fer lo *Cleaners Corporative* e eski sa ti ganny fer dan latransparans? Mersi.

MR SPEAKER

Mersi. *Panel.*

PS ASTRIDE TAMATAVE

Mersi Mr Chair. Mr Chair, *in terms of accountability*, ki mannyer bann - si mon'n ganny ou premye kestyon byen, ki mannyer zot bann manm frekans ki zot ti fer AGM.

Mon pa pou kapab konfirmen, me selman mon krwar zot ti fer AGM en fwa tou-le-z-an kot korperativ ti zwenn bann manm. Dapre Lalwa i sipoze fer en fwa tou-le-z-an.

Son kont ti ganny odite par en *audit firm* par en *audit firm* Moustache & Associates. Wi Moustache & Associates ki ti odit kont *Cleaners Corporative* e sa ti ganny fer lo en baz anyel.

Me selman *in terms of* Oditer Zeneral, i ti fer sa legzersis an 2022 ki rapor in ganny pibliye dan ansanm avek Rapor 2022. Mersi.

MR SPEAKER

Mersi. Bon, nou'n al ase vit lo sa. Onorab Hoareau ou kestyon.

HON JOHN HOAREAU

Mersi Mr Speaker. Mr Speaker, mon ti zis anvi konnen si par egzant en group dimoun, en group *cleaners* i anvi re konstitye zot lekor koman en Korperativ? Si zot kapab pran sa linisyativ pou zot al anrezistre zot anba *Companies Act* pou zot fer sa louvraz?

Oubyen si okenn dimoun par egzant lo lot kote latab, ki ti ava anvi fer en Korperativ i ti kapab. I annan tou sa drwa pou li kapab rod sa bann dimoun met ansanm e fer sa korperativ anba *Companies Act* e lans sa dan en biznes? Mersi.

MR SPEAKER

Mersi. Permet *panel* adrese. Selman - *ok. Panel.*

PS ASTRIDE TAMATAVE

Mersi Mr Chair. Mon pe *hope* - mon pou pe reponn ou kestyon.

Si en group manm *cleaners* zot anvi fer zot Korperativ e al endividelman lo zot menm kot Rezistrar, fer zot Korperativ zot kapab. Me selman sa pou napa naryen pou fer avek Gouvernman e

Minister Finans pa pe *endorse* okenn anrezistreman, okenn Korperativ li. Mersi Mr Chair.

MR SPEAKER

Bon, nou'n al tre vit lo sa 2 dernyen. I reste mwan zis en Manm, Onorab Gill, so mon a pran son kestyon.

HON CHURCHIL GILL

Mersi Mr Speaker. Mr Chair *rather*. Bonzour *panel*. Nou'n ganny eksplike bomaten ki rezon prensipal se pour *savings*, hmm? E me selman ler striktir pou *MDA* mannyer i ete avek pou *corporative* i diferan.

An menm tan nou'n ganny dir, ki i annan serten *anomaly* kot serten *allowance* pa'n ganny peye ek *overtime*, ki nou'n ganny dir la sa pou ganny peye Mars ek Avril.

Eski sa sif pou *savings* ki nou'n gannyen vi ki nou pe al pey sa, i vreman lezitim sa sif? Akoz striktir pa ti parey, me la selman ou dir nou bann *anomaly* ki'n arive Zanvye/Fevriye pou ganny peye an Mars. Mersi.

CHIEF SECRETARY SHELLA MOHIDEEN

Mersi Mr Chair. *Savings* sa 5 milyon ki mon'n donnen, i pa sorti dan *wage bill*. Nou pa ankor dir ki kantite *savings* nou pou fer dan *wage bill*.

Nou'n plito vwar sa *savings* dan bann *operational cost*. Par egzanp peyman *rent*, elektrisite, delo, liniform, eksetera. Letan nou fini fer sa legzersis, la nou ava konnen konbyen *savings* nou pou fer dan *wage bill*. Mersi.

MR SPEAKER

Mersi. Mon leskiz si mon'n mank okenn Manm. Mon war Onorab Bistoquet in lev son lanmen - i sanble mwan mon pa'n not son non. Mon demann li son leskiz, me selman nou pou termin sesyon kestyon la.

Mon pou remersye *panel* Mrs Mohideen e Ms Tamatave pou zot partisipasyon e mon swet zot bonn kontinyasyon.

Nou a pran poz la e Lasanble i a repran 2er pou deba. Nou a retourn dan Staz Lasanble pou nou kapab pran poz. Ok, Madanm Clerk pe demann mwan *remind* manm *Assembly Business Committee* ki nou annan miting 1er 15. Mersi. Nou a pran poz.

(BREAK)

MR SPEAKER

Bonn apre midi tou Manm Onorab e tou zofisyen Lasanble e nou piblik. Nou a repran deba lo Mosyon.

I pour neseser ki mon demann bann manm ki oule koze, montre mwan zot

lentansyon la, akoz mon bezwen *manage* letan ki nou annan apre midi.

Onorab Vidot in deza met - lev son lanmen pou ganny laparol. (En pti pe pasyans, gard lanmen anler akoz annandler mon manke.)

Permet mwan, lo sa kote mon annan Onorab Vidot, Onorab Loze, Onorab Uranie e Onorab Aglae. *Ok pa ankor antre, non mon a eksplik sa.* Lo kote isi mon annan Onorab Romain, Onorab Henrie, Onorab Espanon, Onorab Porice, Loizeau, Bastienne, Naidu, Samynadin, Bistoquet, Larue, Adelaide, Monthy.

Mon annan 16 Manm. Mon annan apepre 180 minit apre midi. So, mon a met 10 minit par Manm pour permet nou kapab fini dan en letan rezonnab, pour permet *staff* osi al se zot bann rezon koumsa.

Donk, tre byen nou a komans deba. Apre byensir mon annan 16 plis *Leader Lopozisyon* avek *Right of Reply*. So sa i pran totalman letan ki nou annan. Bon, mon a komans avek - kote isi mon a komans avek Onorab Romain.

HON GORGES ROMAIN

Mersi Mr Speaker. Bonn apre midi Mr Speaker. Bonn apre midi tou koleg Onorab e tou dimoun a lekout.

Mr Speaker, mon ti a kontan dir enn de parol lo sa Mosyon ki Onorab Pillay in anmennen pou *quash* sa S.I. 106. Dan en lot mo i pe demande ki Gouvernman i fer retournen Korperativ, ki ti regroup bann *cleaners* e i ti pe ganny zere par sa korperativ.

Mr Speaker, avan mon kontinyen mon ti a kontan remersye tou sa bann travayer ki ti dan sa Korperativ ki'n donn tou dan zot travay.

Parey ou okouran Mr Speaker, sa Korperativ ti vin an egzistans atraver S.I. 89 an 2009 ler Gouvernman a sa letan ti pe rod fason pou redwir kantite travayer dan sekter piblik atraver en restriktirasyon.

Tou bann *cleaners* ki ti travay dan Biro Gouvernman ek bann lezot antite Gouvernman a sa letan, ti kapab antre anba sa korperativ e vin en manm. E la baze lo kondisyon sa S.I, sa Korperativ ti kapab annan en maksimonm 250 travayer ki ti pou ed li donn sa servis.

Mr Speaker, me zis 1 an pli tar an 2010 nou ti vwar en lot S.I. 76 ki ti vin dan Lasable Nasyonal pou rod en logmantasyon maksimonm pou 500 travayer dan plas sa 250.

Savedir dan lespas zis 1 an zot in double 100pourstan

la kantite travayer dan sa Korperativ.

Mr Speaker, apartir le 01 Zanvye 2004, Lalwa ki gouvern sa Korperativ, ti ganny dizourd e sa bann travayer in ganny sans anploye direkteman dan Gouvernman.

E dan sa 658 travayer, 615 zot in deside pou re ante dan lanplwa ek Gouvernman, larestan in ganny sans pou al fer lezot travay dan lezot sekter prive. Savedir zis 43 travayer ki pa'n deside pran lanplwa dan Gouvernman.

Mr Speaker, ler Gouvernman ti'n pran desizyon pou frenm Korperativ, i ti fer li ek en lentansyon pou prensipalman, redwir labi ki ti'n komans antre dan sa Korperativ e ki ti'n fer ki ti nepli deservi son manda ki ti'n ganny kree lo la.

Mr Speaker, premyerman, bi kree sa Korperativ sete akoz ti annan tro bokou travayer dan Gouvernman a sa letan e alor en sistem korperativ ti pou ede pou partaz resours avek bann diferan Lazans Gouvernman, pou ede anmenn plis lefikasite.

Mr Speaker, ler zot ti komans zot manda ti pour 250 travayer e zis apre 1 an pli tar nou'n vwar zot pe demann lamannman pou ogmant sif pou vin 500, zot in double.

An vi ki Gouvernman ki ti pe pey zot, eski dan lespas 1 an sekter Gouvernman ti'n agrandi sa kantite ki ti bezwen 100poursan servis pou *cleaners?* Se sa kestyon ki nou pe demande.

Oubyen, eski sa ti en fason pou donn lanplwa bann travayer, an vi ki nou konnen ti annan eleksyon an 2011?

E alor ti enportan pou donn lanplwa dimoun menm si i pa ti neseser. Akoz nou tou nou konnen sak fwa ki en eleksyon ti pe aprose anba sa ansyen Gouvernman, larzan ti ganny donnen gos, dwat.

E la zot pa pe kapab fer li ankor, zot pe dir tou kalite keksoz. Menm si sa bann keksoz ki zot pe dir pa ni menm fer sans Mr Speaker.

E Mr Speaker, lannen pase annou pa blyie ki ler Korperativ ti frenmen ti annan 658 travayer. Sa i par lao zot kota ki zot menm zot ti vote pou anmenn par 158 travayer. I kler ki ti annan en dezord e labi e kontrol ti'n perdi.

Lekel ki ti pe vreman benefisy'e avek tou sa labi? Eske sanmenm ki Parti US atraver zot *Leader Lopozisyon* i anvi fer retournen ankor?

Annou pa blyie ki Gouvernman lannen pase in pey R29.4 milyon pou tou sa 658 travayer pou zot bann benefis pou zot letan ki zot in travay.

E si *Leader Lopozisyon* i anvi *quash* sa *S.I.*, eski i pe dir nou ki sa bann larzan ki mon koleg in fer resorti pli boner, ki ti ganny peye pou bezwen ganny rann? Annou pa blyie, ki ti osi annan lenzistis antre zot bann travayer dan sa Korperativ.

Nou'n aprann ki ti annan en bann ki ti travay 7 er ziska midi e ki ti pe tous menm saler ek bann ki ti pe travay ziska 3 er. E nou'n ganny dir ti annan 128 travayer ki ti pe ganny sa fasilite. Mr Speaker, i byen menm sa? Eski sa bann ki ti'n fini midi i ti en group dalon ki ti pe byen pase?

Mr Speaker, ti annan bokou landrwa travay kot sa bann *cleaners* pa ti oule pran lord ek sa bann landrwa travay e konfli ti leve akoz zot ti dir zot pran lord. Zot pran lord zis avek Korperativ.

E tousala Mr Speaker, i ti montre ou ki sa sistenm Korperativ ti nepli pe desarz son manda. I ti'n perdi kontrol e pe fer sa ki i oule.

Mr Speaker, mon'n ganny sans enterakte avek enn de travayer ki ti dan Korperativ e ki ozordi zot pe travay dan Gouvernman.

Zot in fer resorti avek mwan ki zot vreman kontan ozordi, akoz zot santi zot ganny rekonnet koman en travayer ek sa lorganizasyon e zot partisip dan bann aktivite

ki ganny organize e zot santi zot form par dan en tim e pli an sekirite dan zot travay.

Mr Speaker, mon pa pou long la. Me avan mon terminen, mon ti a zis kontan fer resorti dan Liv Oditer 2022, ki ladan oditer in fer resorti ki in dir ki ti annan - mon kapab dir sa bout "*significant variance in revenue*" ki'n fer resorti ki;

An 2018 R48 milyon

An 2019 R61 milyon e

An 2020 R63 milyon ki zot bann rapor finansyel pou sa 3 lannen an 2018, 2019, 2020 pa ti *reliable* e pa ti konplet.

Mr Speaker, e alors mon ti a kontan atraver ou, dir mon koleg Onorab Spiro, se sa ki ou apel en *anomaly*. Eski parey ki Lopozisyon i abitye dir ki toulstan nou pa koz laverite, eski zot pe dir avek oditer ki sa rapor i pa laverite, ki sa ki 2022? Mon poz sa la Mr Speaker.

E alors Mr Speaker, mon pa pou siport en tel Mosyon ki pou fer retournen dezord ek labi, akoz Gouvernman *LDS* i enn ki pe aranze e i oule fer sir ki sak Roupi ki ganny depanse, i ganny fer dan en fason ki byen. Mersi Mr Speaker.

MR SPEAKER

Mersi Onorab. Bon, Onorab Vidot ti'n lev lanmen boner.

Donk, mon sipoze i prese pou fer son pwen. Onorab ou annan laparol.

HON AUDREY VODOT

Mersi Mr Speaker. Bonn apre midi ankor enn fwa tou dimoun ki a lekout.

Mr Speaker, ler en Manm Onorab i dir mersi en group travayer, apre sa menm Onorab i komans fer lakizasyon labi e dezord avek sa bann travayer, se sa ki Kreol nou apel lipokrizi dan tou son splander. Pa vre mon koleg Onorab Romain?

MR SPEAKER

Eskiz mwan ou pe akiz Onorab Romain letan ou dir li pa vre, li?

HON AUDREY VODOT

Mon pa'n nonm non personn mwan. Mon'n dir li si pa vre, akoz Onorab Romain ki'n dir.

MR SPEAKER

Ok, annou evite akoz kanmarad. Mersi.

HON AUDREY VODOT

Mr Speaker, atraver ou, mon oule dir avek Onorab John Hoareau ki wi mwan Audrey Vidot, mon pou kontinyen fer li avek son ladministrasyon rapel tou promes Eleksyon Oktob 2020 ki zot ti fer pou anbet pep Seselwa.

Espesyalman kot zot ti koz pou fer pli byen ki Gouvernman US. Mr Speaker, letan ladministrasyon LDS i pran en desizyon pou frenm Lazans *Cleaners Corporative*, eski zot ti annan aker byennet sa plis ki 600 *cleaners* avek zot fanmir? Non.

Eski zot ti reflesir byen ki konsekans e lenpak lo zot desizyon ti pou annan lo Bidze sa bann zanfan Sesel avek zot fanmir? Eski zot realize ki olye onor zot promes pou met larzan dan pos Seselwa, zot in tir plis larzan ki i antre dan pos sa bann *cleaners*?

Mr Speaker, oli lazistis sosyal pou sa group travayer par Ladministrasyon LDS? Napa en sou.

Si depi 2021 Ladministrasyon LDS in pran desizyon pou frenm sa Lazans, akoz zot pa ti kapab konsider lapros pou abzorb tou sa bann *cleaners* dan zot landrwa travay ek tou zot bann benefis ki zot ti pe anmennen kot lakour ler zot ti avek sa Lazans?

Mr Speaker olye vin koz lo koriz lazistis saler sa bann *cleaners* pou sa ki zot ti pe gannyen, akoz zot pa vin donn Seselwa ki lazistis ki ler zot, zot ti pe dir Minis ek tou politisyen i bezwen pran tou sa ki pou zot?

Ladministrasyon LDS i prefere les sa bann *cleaners*

viv dan lensertitud ek presyon, apre vini an 2023 dan lafen lannen vin met plis presyon ankor lo sa bann travayer.

Apre ki nou tann sa bann komanter derogatwar lo bann *cleaners* par Prezidan Larepublik ek son ladministrasyon, in fer sa bann travayer i kler ki zot napa konpasyon pou *cleaners*.

Ki sa bann travayer sa bann mm zanfan Sesel ki *LDS* ti donn langazman pou defann zot e met larzan dan zot pos. *LDS* in pas zot letan kritik Gouvernman *SPPF* lo viktimizasyon. Be la ki zot pe fer avek *cleaners*?

Onorab Spiro, i annan parfetman rezon dir ki zot pe viktimiz sa bann travayer. Mr Speaker, les mon a donn legzant ankor zot inefikasite koman en ladministrasyon pou diriz sa pei.

E sa in ganny konfirmen bomaten par komanter ki'n ganny fer par Onorab John Hoareau, kot in dir 120 *cleaners* ki ti pe ganny en *allowance* pou ziska 3er e zot ladministrasyon pe koriz en lenzistis. Zot prefere pini plis ki 600 *cleaners* olye adres sa swadizan 120 ki Onorab John Hoareau ti'n vin koz lo lenzistis bomaten.

E *Chief Secretary* in menm koriz sa sif ki Onorab in dir, in dir nou i annan 128. Atraver ou Mr Speaker, eski sa

i fason ki zot pe vin fer pli byen? Sa kestyon i pou Onorab John Hoareau.

Mr Speaker, lala rezon akoz sa madanm Anse Aux Pins ti dir avek sa menm Onorab atraver ou Mr Speaker ki *LDS* i lalang, si levidans pa la, pa ase pou zot, Seselwa a montre zot dan bwat vote 2025!

Mr Speaker, Seselwa pe obzerv tre pros sa bann desizyon ki ladministrasyon *LDS* pe pran e ki pe fer bokou fanmir Seselwa soufer. Depi ki pep Seselwa in met konfyans dan zot pou diriz sa pei, zot pe zis les tonbe travayer Seselwa.

Resaman travayer *IOT* avek zot trezyenm mwan saler e bann *cleaners* ansyen Lazans Korperativ i osi aparet parmi lalis viktim sa ladministrasyon.

Les mon a fer zot rapel akoz ; pa blye letan zot ti pe demann Seselwa pou kontinyen travay dir e fer sakrifis e pran zot responsabilite, Ladministrasyon *LDS* pa ti pe met an pratik sa ki zot ti pe prese.

Koman zot ti antre dan Gouvernman ni pour donn legzant fer sakrifis e ni pou onor zot bann promes sa fame Ladministrasyon *LDS*, zot bann Minis ti blyi konpletman lekel ki ti met zot la e zot ti

byen kontinyen aranz zot lekor avek zot gro larzan.

Aprezan zot annan lolas trouv bann leskiz e alegasyon ki pa fonde, zis pou zot vin zistifye zot desizyon. Zot aksyon iresponsab i fer ki sa bann ansyen travayer *Cleaners Corporative* i vwar zot pe al dan lakour avek environ R2 mil an mwens ki zot ti pe gannyen avan desizyon pou zot frenm sa Lazans.

Bomaten Onorab Pillay in fer legzant kot bann ki ti pe ganny mwens, ki'n al ek mwens ki 1500, mwan mon konn dimoun ki'n al ek mwens ki R2 mil.

Nou'n tann dir a plizyer repriz dan Lasanble ki i annan labi e lenterpretasyon ki'n ganny donnen se ki i annan *mismanagement*.

Me selman, sa ki pli enteresan se sa bann travayer ki ti dan sa lazans ki ti pe ganny peye pli byen ki zot pe gannyen ozordi, zot kondisyon travay i bokou plis ankor ki sa ki zot pe gannyen ozordi. Sanmenm sa zot fason fer pli byen.

E ler mon pe fer resorti sa pwen Mr Speaker, lo kondisyon sa bann travayer, mon oule fer konnen sa ladministrasyon iresponsab ki sa bann travayer pe vwar zot pe return avek, pe santi zot pe troun kot zot avek en opresyon swivan bann

desizyon enkonpetan ki zot Gouvernman pe fer.

An plis, i annan sa bann *cleaners* pa ni menm konbyen ki mannyer zot kondisyon finansyel pou été, zis apre sa 6 mwan probasyon ki zot ki zot in ganny mete lo sa.

Pa fini la Mr Speaker, i annan zot ki fer mon konpran ki zot pe ganny louvraz anplis e saler ki zot pe gannyen i pli ba ki sa ki zot ti pe gannyen.

Eski en pti R3 milyon monte, desann lo zil pa apel labi ek *mismanagement*?

Eski sanmenm sa ki mon bann koleg lo lot kote latab, i apel zot ladministrasyon en ladministrasyon responsab? Enn ki annan konpasyon pou son sitwayen?

Eski sanmenm sa en ladministrasyon pozitiv ki zot sant laglwar lo la? Non !

Be pour ki zot krwar zot pe pran travayer Seselwa ki'n met sitan konfyans dan zot pou en pli meyer standar lavi? Lekel ki zot krwar ki zot pe sey anbete?

Mr Speaker, mon'n deza dir e mon pou redir ankor avek *LDS*, zot en ladministrasyon iresponsab e zot napa okenn konpasyon pou sa pep ki'n elekte zot. Olye fer pli byen zot pe fer tou mal e nou pep ki pe soufer.

Ki mannyer sa bann travayer, zot fanmir pou kapab blyie ki presyon sa

ladministrasyon i met lo zot e ler sa bann dimoun i annan *loan*, bil elektrik ek delo ki'n monte e sa bann dimoun pe al an mwens ek sa ki zot ti pe gannyen, eski sa ki zot apel le meyer pou sa bann dimoun?

Mr Speaker, prezan sa ki pli vilenn ankor ler Prezidan i denigre bann *cleaners*. Dan enn son bann Kominike Lapres eski *LDS* i krwar ki Seselwa pou kontinyen met konfyans ek zot ek zot Prezidan? Ki pas son letan zis maltret dimoun? Non!

Seselwa ki swiv e i tann zot i vvar zot pa pou aksepte sa! Pa nou tou ki krwar dan zot. E diskour ki sa bann, degré zot in dir ki pa zis bann *cleaners* ki zot in denigre annou pa bliy sa bann zournalist e in annan menm bann lezot travayer servis piblik.

E ki mannyer nou pe gete, sa lapros ki zot pe pran zot ki pe *rule border* - mon krwar pa! Dimoun i vreman fristre la deor. Nou bann *cleaners* ki *LDS* in les tonbe, par tir larzan dan zot pos. Si vreman zot ti annan en leker zot ti solider avek pep Seselwa, espesyalman sa bann *cleaners* zot ti pou lev zot lanmen pou zot zet anba sa *S.I.*

Mr Speaker, mwan mon'n enterakte avek bann *cleaners* espesyalman bann ki reste dan mon distrik. I annan

ki'n enform mwan ki zot ti kapab al fer lezot pti louvraz apre ki zot ti'n fini zot zournen e sa ankor ti konplimant en kontribisyon anplis pou zot anmenn kot zot lakour.

Ankor en lot rezon akoz zot lot kote zot ti merit lev zot lanmen pou siport sa bann *cleaners*.

MR SPEAKER

10 minit Onorab.

HON AUDREY VODOT

Mr Speaker, pou konkliir.

Promes Prezidan kot in dir pou sakouy pye met larzan dan pos travayer Seselw;a promes pansyoner pou ganny zot R10 mil, promet travayer ki zot pou ganny zot trezyenm mwan parey zot bann politisyen i ganny gratwite, me tou fason *United Seychelles* i annan en pti mesaz pou pas ek bann Dirizan *LDS*, espesyalman zot tou lo kote *Management LDS*.

Definisyon sa mo "lalang" ki egziste dan diksyoner leksik Kreol bann Manm Lopozisyon pou kontinyen dir a sak fwa ki sa ladministrasyon i kontinyen koz lalang avek pep Seselwa. Toultan zot pa donn nou tou laverite nou pou kontinyen dir zot.

Alors si Ladministrasyon *LDS* pa pare pou ranvers son

desizyon konsernan sa S.I, aret met retar lo lavi Kreol.

Prepar zot pou zot al tir plis pikan ankor lo poto akoz Seselwa in fini dir 2025 *LDS OUT* akoz *US* i sel opsyon pou Sesel! Mersi Mr Speaker.

(APPLAUSE)

MR SPEAKER

Mersi. Mon bezwen demann bann Manm pour pa antre ankor dan sa bann soz lalang, veye. I annan en mannyer ou dir, me selman akiz en dimoun direkteman i mal e i kont lareg Lasanble. Nou a kontinyen. Onorab Samynadin ou annan laparol.

HON KELLY SAMYNADIN

Mersi Mr Speaker. Bonn apre midi tou dimoun a lekout.

Mr Speaker, *Cleaners Corporative* ti ganny etablir avek bi pou antreprann bann latas netwayaz dan bann lofis, batiman ek lezot lenstitisyon e osi pou angaz dan bann travay an relasyon avek bann lofis, batiman ek lezot landrwa.

I enperatif pou fer resorti ki bann prosedir konsilitatif avan dizolisyon *Cleaners Corporative*, ti komanse an Novanm 2023.

Zournal *NASYON* date le 25 Novanm 2023 i dir ki tou bann partener neseser prensipalman bann travayer sa korperatif ki enkli bann

cleaners, ward assistants, supervisors, CEO ek bann staff administratif ti ganny konsilte e enformen lo sa bann diferan sanzman, ki byensir ti anliny avek Lalwa Lanplwa.

Ki fer li drol pou mwan, pou vvar ki ozordi parti minoriter dan sa Lasanble, pou anmenn en Mosyon pou *quash S.I. 106/2023* anba ki *Cleaners Corporative* ti ganny dizourd.

Pandan sa bann prosedir konsilitatif, kot ti annan bann reprezantan Minister Finans, *National Planning* ek Komers, bann zofisyen *Public Service Bureau* ensi ki Lofis Attorney Zeneral bann travayer ti ganny met okouran lo rezondet desizyon Gouvernman pou dizourd sa antite e osi lo bann opsyon lanplwa ki zot pou annan, apre ki sa transformasyon in arive, ki ti pou prensipalman zot abzorbsyon dan sekter piblik.

I enportan pou note ki zot ti osi ganny met okouran lo bann diferan metod peyman konpansasyon ki sakenn ant zot ti pou benefisyen, swivan dizolisyon Korperativ e sa i enkli akimilasyon konze, gratwite, trezyenm mwan saler, ensidswit. E zot ti ganny enformen ki tou peyman pou ganny fer avan le 31 Desanm 2023.

Mr Speaker, sa ki osi enportan se ki dan sa prosedir

konsiltativ, bann travayer Korperativ ki ti la prezan ti ganny sans pou ganny klarifikasiyon lo plizyer size, ki enkli akoz ki zot pe ganny transfer otomatikman *package* zot saler, *long service allowance*, peyman trezyenm mwan saler, bann orer travay, sanzman dan bann term ek kondisyon travay e osi lo ki pou arive avek bann ki ti pe travay dan sekter prive ek parastatal.

Tou sa bann kestyon ti ganny reponn e ganny ekliersi Mr Speaker. Ki fer mwan war li drol ki ozordi parti minoriter pe konplent, pe dir sa bann travayer pe *call* zot, zot in perdi zot saler, eksetera. Selman zot pa fer Lepep Seselwa konnen ki kantite *anomaly* ti pe annan dan peyman saler sa group travayer anba zot *watch* e menm dan zot orer travay.

An 2019 ler travay ti sanze sorti 7 er ziska midi pou vin 7er ziska 3 er, ti napa okenn ogmantasyon dan saler; *commuted allowance* zis en bann ki ti gannyen. Sa bann dimoun ki'n swadizan kontakte zot, pa'n met zot okouran sa? Oubyen zot pe prefere kasyet, dan plas fer nou konnen ki se zis zot Sekreter Seksyon ki'n *call* zot.

Mr Speaker, annakordans avek *Cleaners Corporative Establishment*

(Amendment) Order 2010 - S.I 76 of 2010 anba paragraf 5, Korperativ ti ganny mandate pou annan li en maksimonm 500 manm sorti lo 250.

Me dapre Rapor Oditer Zeneral pou lannen 2022 ant 2018 a 2022 sa antite ti'n ariv en total plis ki 650. Ki ti byensir an deor regilasyon ki ti'n ganny etablir. E fodre note ki pis ki 90poursan Bidze Gouvernman ti al ver peyman saler sa Korperativ.

Sa i reflekte enn bann senaryo gaspiyaz e mon apresye ki nou Gouvernman in kapab fer sa desizyon brav e responsab, pou dizourd sa Korperativ, avek bi pou permet sa bann travayer ganny anploye dan en kad kler e transparan.

Mr Speaker, mon oule osi fer resorti ki dapre sa menm rapor Oditer Zeneral, *Cleaners Corporative* ki ti osi *outsource* sa bann biznes avek bann biznes prive, kot zot ti sarz 30poursan *commission* lo sak *cleaner*, ti annan en rediksyon dan koleksyon reveni ki ti ganny kolekte avek sa sekter.

Pandan lannen 2021 ek 2022, Korperativ ti *invoice* en total R10.2 milyon a bann biznes prive anba ki 5.7 milyon ti pou lannen 2021 e 4.5 milyon pou lannen 2022 ki reflekte en rediksyon 20poursan ant sa 2 lannen.

Dan sa ka nou kapab dir ki *Cleaners Corporative* ti pe *run at a loss*, an vi ki demann pou servis ti pe redwir gradyelman sirtou dan sekter prive.

Mr Speaker, mon pa pou long, me avan mon terminen mon anvi zis dir avek *Leader Lopozisyon* atraver ou Mr Speaker, si ou pe koz demisyonnen, mon krwar se ou ki bezwen demisyonnen e sed laplas avek en lot ki pour pli byen kapab deservi pou pozisyon pli byen ki ou. Akoz ou pas ou letan zis *feed* sa Lasanble e Lepep Seselwa avek mansonz e fer fo alegasyon.

(APPLAUSE)

MR SPEAKER

Onorab! Onorab!

HON KELLY SAMYNADIN

Cleaners Corporative i en...

MR SPEAKER

Onorab! Onorab! Arete, arete, arete. Mon pe demande ki zot pa akiz kanmarad mansonz, lalang.

HON KELLY SAMYNADIN

In fer li selman Mr Speaker.

MR SPEAKER

E osi bann zofisyé Gouvernman. Onorab, zis retir sa mo silvouple.

HON KELLY SAMYNADIN

Mon retract Mr Speaker.

MR SPEAKER

Silvouple, mon bezwen gard sa lord, sanson mon pou donn tou dimoun, ou pou tann tou dimoun pe ganny akize. Silvouple kontinyen Onorab.

HON KELLY SAMYNADIN

Mr Speaker, *Cleaners Corporative* i en antite ki malgre ki o kour bann lannen in grandi an term nonm travayer, sa pa'n reflekte dan son performans finansyel, akoz i pa ti pe ganny byen *monitored* par son *parent Ministry* ki Minister Finans.

Kot par egzanp sa Minister ti'n *fail* pou rod klarifikasiyon lo omision bann *funding* signifikan dan Bidze; bann *fixed assets* dan *financial statements* sa Korperativ ensi ki koleksyon reveni sorti kot bann *outstanding debtors*.

Mr Speaker, Korperativ ti napa en bon striktir rankont an plas. Dernyen miting zeneral anyel ti ganny fer 5an pase an Novamm 2019. Komite Zesyon sa Korperativ ti'n dan lofis pandan 3 an, kontrerman avek sa ki Lalwa i sertifye ki zot sipoze pe okip zot pozisyon pou en peryod 1 an.

I osi enportan pou note ki se menm oditer ki ti pe odit zot

travay finansyel sa Korperative bann *statements* finansyel anyel ek bann laspe operasyonnel, pa ti ganny sibzekte pou ganny *scrutinize* par son *parent Ministry* malgre ki zot ti pe ganny *fund* anba Bidze Nasyonal pei.

Se pour sa rezon Mr Speaker, ki mon dezole, mon pa pou kapab siport Mosyon *Leader Lopozisyon* pou *quash* sa *S.I.*, akoz malgre ki i pe dir ki i pe koz lo lazistis pou sa bann ansyen travayer *Cleaners Corporative*, mon plito krwar i i pe lager pou en serten group dimoun, ki li ek son parti pe sey proteze e non pa pou *Cleaners Corporative* an antye. Avek sa Mr Speaker mon dir ou mersi.

MR SPEAKER

Mersi. Onorab Naidu.

HON SATHYA NAIDU

Mersi Mr Speaker. Mosyon ki devan nou i enn ki enportan pou nou sensibiliz nou pep, lo sa ki'n pase avek sa antite pou nou met laverite devan.

E mon apresye ki safwasi Lopozisyon in ganny sa kouraz pou asiste sa Staz Komite, kot zot osi zot in met devan kestyon e zot in ganny repons.

E sa bann repons i demontre en keksoz, ki Mrs Mohideen ansanm avek Mrs Tamatave, i pe debrouy byen pour sa pei e zot lo en bon

semen parey Onorab Spiro ti'n dir. Me selman son kestyon i lekontrer, kot i pe sey fer en bann politik ki pa fer sans.

E ler ou'n regard bann lezot kestyon ki zot, zot in demande in annan repons ki'n montre ki zot kestyon ouswa zot fason regard keksoz se zis mansonz, i zis bann fo lenformasyon e Mr Speaker.

MR SPEAKER

Onorab *ok* - bann, nou pa kapab vin en Lasamble kot tou manm i leve i dir mansonz ou lalang, mansonz ou lalang, i bezwen arete.

E mon pe averti bann manm si zot kontinyen servi sa, an relasyon avek en dimoun ki dan sa lasal, oubyen an relasyon avek en zofisyen Gouvernman, Prezidan oubyen Minis mon pou koup zot laparol. Silvouple reviz zot speech ki zot in fer. Mersi.

HON SATHYA NAIDU

Mr Speaker, an relasyon avek sa *S.I.* i kler ki Gouvernman lo kote Egzekitiv in pran sa desizyon e lo baz la transparans nou lo kote *LDS* nou ti'n santi pou anmenn bann zofisyen responsab vizavi zeson sa *S.I.* pou met devan lenformasyon ki kredib e kler.

Nou, nou krwar dan prensip ki anliny avek latransparans. E an menm tan, nou'n war ki lafason ki

Cleaners Corporative ti pe ganny zere, pa ti dan en fason ki ti responsab. E nou koman en Gouvernman ki responsab kot nou krwar dan zesyon finansyel ki byen, e ki korek nou ti'n bezwen kapab pran sa desizyon neseser.

An sa ki konsern depans ki ganny fer vizavi *corporative*, aepre 323 milyon in ganny depanse pandan en peryod 5 an dapre Rapor Oditer Zeneral. E ler nou pe koz sa kantite larzan nou bezwen fer sir nou bezwen depans li dan en fason ki efikas, ki pa donn en bon *output* an sa ki konsern travay ki sa bann travayer dan *Cleaners Corporative* i fer.

E souvandfwa i annan bann diferan departman, mon kapab donn en legzanp, lasante par egzanp kot dimoun i met bann konsern devan pou dir i pa neseserman prop. Me ankor enn fwa lekel ki vreman *monitor* travay sa bann travayer lo kote *Cleaners Corporative*?

Dapre leksplikasyon ki Mrs Mohideen in dir, *appraisal* i ganny fer lo en baz entern pou kapab evalye travay. Alors, akoz eski i annan en lot brans apar?

An 2009 ler sa desizyon ti pe ganny pran, tou bann travayer, bann *cleaners* ti anba Gouvernman. E prenon kont *IMF* ti'n met devan bann propozisyon neseser zot ti'n

sey kas sa *wage bill*. E alors zot ti'n santi konmkwa i pa ... *business of Government* e alors zot in kre *Cleaners Corporative*.

Me *Cleaners Corporative* lo lafason ki in opere, *ok*, zot in osi rann en servis dan sekter prive, me selman retonbe, nou pa pe war dan en fason ki pe pouse pou fer sir ki *Cleaners Corporative* dapre son manda, dapre son lobzektif i ti sipoze vin en antite ki endepandan.

Endepandan e mon panse non selman lo kote zesyon, me par lao tou osi lo en kote finansyel. E sa pa ti leka avek *Cleaners Corporative*. Sa servis ki zot ti pe ran dan prive, sa larzan ki zot ti pe gannyen ti pe senpleman al ver konpansasyon.

E parey mon koleg Onorab Samynadin in soumet avek Lasamble, zot i dir ki zot pa pe fer okenn profi. E mon panse ki ler sa lorganizasyon ti'n ganny kree, se avek en bon bi. Me *comme d'habitude* parey zot ti fer avek FA4JR, parey zot in fer avek tou bann *scheme* in annan bann labi.

E ler ou regard *Cleaners Corporative* ler nou pe koz lo labi, wi nou pe koriz en lenzistis ozordi. Ler dan 650 sote travayer, ou annan 128 ki pe ganny plis ki lamazorite dimoun kwa ki nou bezwen fer?

E par lao tou, Onorab in avans bann largiman pour dir ki mannyer *APDAR* ler zot in bouz *DSAPTR* zot saler isi laba ; tou sort kalite politik i ti'n fer. Me selman nou bezwen realize poudir ki *Cleaners Corporative* zot, zot ti annan zot prop *wage structure*.

E alors ler Gouvernman pe abzorb zot, nou bezwen fer sir ki sa saler ki zot pe resevwar i baze lo standar ki an plas e non pa le kontrer. E byensir i pour ede pou donn, pour kit li koumsa si nou pe mazin vot annefe mon panse se eski zot ti'n fer an 2019.

Toultan ler zot pe pran en desizyon i baze lo si i annan eleksyon, ki mannyer ki nou kapab protez nou bann vot; ki mannyer eski nou kapab abiz resours pou protez la kantite vot ki nou resevwar.

Rezon ki mon pe dir sa se akoz desizyon ti'n ganny pran 2019 1 an avan eleksyon, kot bann travayer ki ti pe travay midi ziska 7 er ti pe ganny en lapey ekivalan pou en dimoun ki pe travay 7 er ziska 3 er.

So alors oli problemm ler en desizyon pe ganny pran kantmenm i pa en desizyon ki pou popiler parmi bann ki pou resevwar benefis dan tou zot totalite, i enportan ki nou fer keksoz byen Mr Speaker.

E ler nou pe regard AGM, si i pa'n ganny fer pandan sa peryod 3 an selman ou annan

en Komite ki'n ganny etablir ki pa pe al an konformite an relasyon avek lafason ki sa lorganizasyon sa *Board* i bezwen ganny zere.

Sa dan li menm i montre en mankman lavolonte lo kote latransparans e bon zeson sa lorganizasyon.

Sepa si bann dimoun ki pe travay koman bann *cleaners*, ti konnen ki kalite benefis bann dimoun ki enplike lo nivo *management* ti pe resevwar.

Eski sa bann rapor ti'n ganny met devan, pou dir ki i annan en group ki travay 7 er -midi zot pe ganny plis ki bann ki pe travay 7 er a 3 er atraver bann AGM? Eski i annan bann rapor fiskal pou montre bann disparite, ki i annan ant travayer dan *Cleaners Corporative*?

E alors ler nou pe koz lo *quash S.I.*, be nou'n fek - Gouvernman in depans R29.4 milyon pou pey bann konpansasyon an konformite avek Lalwa Lanplwa.

Annefe dan sa miting konsiltatif ki ti'n ganny fer ant sa bann travayer Departman Finans ansanm avek Mrs Mohideen ek lezot *stakeholders* tou bann keksoz, tou bann fe ti'n ganny met ater.

E an menm tan, tou bann prosedir an term lanplwa in bezwen ganny swiv, akoz

mon rapel kan Direkter Zeneral lo kote lanplwa ti'n dir konmkwa ki tou bann prosedir ki pe ganny swiv se dapre lankadreman legal pour fer si ki tou keksoz i al byen.

E mon oule felisit sa lekip, pou sa bon travay ki zot in fer kot zot in al non selman Mahe, Praslin, La Digue, kot zot in rankontre bann travayer kot zot in bezwen sansibiliz bann travayer an sa ki konsern desizyon ki Gouvernman in bezwen pran.

E atraver sa desizyon, nou pa pou bezwen annan en *management* 8 dimoun finalman ki pe ganny en benefis bokou plis ki en *cleaner*.

An plis ki saler nou pe regard lo kote *office expenses* plis ki 54 mil i pou nepli en depans ki pou bezwen ganny fer, akoz tou bann travayer i pou tonm anba bann diferan *departmental heads*. E si i annan bann lezot aktivite ki sak departman i fer, parey Mrs Tamatave in fer resorti, *they will have a sense of belonging*.

E alors menm sa *work culture* dan sa landrwa travay, kot tou sa bann dimoun pe travay i ava amelyore.

E alors mwan, mon pa war okenn problem avek desizyon ki Gouvernman *LDS* in pran; en Gouvernman ki responsab, en Gouvernman pa regarde ki si i annan eleksyon

dan kontour pou pran bann desizyon.

E si nou bezwen pran bann desizyon serye, pou fer sir ki nou pep ek nou pei i bouz devan ver en bon direksyon, nou, nou ava fer li. Mersi Mr Speaker.

MR SPEAKER

Mersi Onorab. Mon apel bann manm ki piblik i espekte ki zot respekte kanmarad e nou pe donn legzanp. Onorab Loze.

HON JOHAN LOZE

Mersi Mr Speaker. Mr Speaker, kot ASP Lazans Proteksyon Sosyal. I annan en *cleaner or housekeeper* ki pe netway 21 lofis - 21.

Se sa zot Gouvernman responsab, se sa bann *cleaners* bann *housekeepers* ki pa'n ganny defavorize, akoz komela nou donn zot mwens larzan me nou donn zot tit. Zot nepli cleaner zot vin *housekeeper* me selman zot al lakaz en mwens larzan. Ou vwar lozik la Mr Speaker.

So en *housekeeper* i netway 21 biro li tousel, avan ti annan bann ki ti vini apre ler, zot ti fer parti mon krwar sa bann ki nou or dir ti travay en ler apre ti al fer en debrouy mon krwar lo zot menm apre be la komela sa in *phased out*. So ou annan ou sa madanm pe netway 21 lofis li tousel.

E son sityasyon in aranze li *from what* zot tou zot pe dir nou. E sa i enn ki nou konnen. I annan ankor, i annan bokou plis. Ki nou, nou ti anvi fer nou? Dir Gouvernman *repeal* sa *S.I.*, repran ou *S.I.* retourne avek kot ou, ou kapab retourne avek demen bomaten reprezant li demen bomaten a en kondisyon.

Ou fer parey tou sa bann lezot Lalwa ki ou'n *repeal* dan lepase e ou fer en lensersyon ladan, ki sa bann dimoun ki ti travay pou sa Antite zot pou ganny re anploye avek *conditions of no less* ki zot *existing*.

Mr Speaker, Onorab John Hoareau i konn sa bokou pli byen ki ou. *Bills Committee* konbyen fwa sa *clause* in vin devan nou, konbyen fwa nou'n diskite; konbyen fwa nou'n koz lo sa sityasyon nou'n poz kestyon, eski dimoun pa pou ganny defavorize ler antite i ganny fermen par *repeal* Lalwa dan Lasamble?

E nou'n ganny dir non akoz i annan sa *continuation clause* sepa *grandfather clause* la ki, Onorab Naidu osi i lo *Bills Committee*, nou'n la dan sa bann diskisyon. Onorab Deputy Speaker lo *Bills Committee* konbyen fwa nou'n diskit sa *clause*? La mon vwar Onorab Andre pe sorti, li ki Chair *Bills Committee*.

I bann diskisyon ki nou'n fer sa, *every time* nou'n *repeal* en antite nou'n fer tonbe en Lalwa nou'n fer en ensersyon ki garanti en dimoun ki son *net take home* i pa mwens ki i ti ete avan. Kan mannyer ler i ariv pou *cleaners* nou santi ki nou kapab pyetin zot?

Ki i fer pou sa *cleaner* si AGM pa'n fer depi 2019, ki i fou li? Ou'n fer desann son *net take home*, ou'n defavoriz li e apre ou vini ou dir li koumsa AGM pa'n fer depi 2019.

Prezan zot, zot anmenn Mosyon, zot *move* en Mosyon, zot apel en *panel* la ki konpri Minister Finans avek *Chief Secretary* apre zot menm zot, zot kestyonn Minister Finans ek *Chief Secretary* lo ki dernyen fwa Korperativ ki fer AGM?

Be non, be zot pa ti ava apel Korperativ la pou li reponn ki dernyen fwa in fer AGM? Pa ti ava kre balans dan sa bann kestyon?

Akoz Onorab Naidu pli boner Mr Speaker, ti dir non *Chief Secretary* in ganny leve bomaten, zot in nonm son non e la prezan nou bezwen apel li pou fer li vini pou vin reponn.

Apre zot, zot asize zot nonm tou dimoun dan Korperativ, zot nonm Korperativ depi a ziska z selman zot pa apel Korperativ. Zot sit *mismangement* be apel sa bann dimoun zot ava asiz la

zot ava defann zot lekor zot a dir nou, eski nou'n ganny larepons lo akoz Korperativ ti pe pey en dimoun tan? Non nou pa'n gannyen.

Akoz nou'n anmenn devan nou en dimoun ki dir nou li i pa konnen i pa'n gannyen i pa konnen, so nou anmenn pa konnen pou eksplik nou e nou kit konnen deor.

E la nou, nou dir nou'n byen ganny enformen. Lepep Seselwa in byen ganny enformen par pa konnen.

Non, mon pa konnen akoz pe ganny *overtime*. Non, mon pa konnen akoz mon pa'n ganny leksplikasyon akoz pe pey sa R1500.

Be zot in anmenn pa konnen pou edik nou, pou enform nou pou edik sa pep Seselwa e la nou dir pep Seselwa, ou pli konnen ki ou ti ete avan edike par pa konnen.

Be zot pe pran lekel? Seryezman ki annan mal ek zot, zot?

Mr Speaker, nou ganny dir nou'n fer en *savings* R5 milyon get sa ou. Minister Finans i asiz la. Minister Finans ni en fwa pa'n nonm *saving* R5 milyon. *Chief Secretary* pros en 10zenn fwa in nonm nou *savings* 5 milyon, Minister Finans in trankil lo la li.

Apre *Chief Secretary* i dir nou *savings* pa'n fer lo *payroll*.

Mon ti espekte li domin *payroll*. Non i pa domin *payroll* li. I pe domin *savings* ki in fer *other than payroll*. Finans ki sipoze domin sif *other than payroll* - trankil li, in asiz la; i pa nonm nou R5 milyon li *Chief Secretary keeps harping on about* en *savings* R5 milyon.

Anyway mon poz sa la mwan. So nou fer en lenzistis ek dimoun pou nou fer en *savings* R5 milyon ki dan *between* konnen ek pa konnen enn i dir nou sa, lot i reste trankil.

So nou'n fer en lenzistis dimoun. Dimoun in soufer. E dimoun in soufer depi Desanm en? Akoz zot menm la zot in dir nou, Minister Finans in dir nou poudir an Mars pou annan pou annan rektifikasyon pou ganny fer.

An Mars. Depi Desanm dimoun pe soufer. Nou pa dir dimoun pe soufer depi Desanm prezan pe al rektifye an Mars ; pe dir nou poudir Minister Lasante in bezwen fer serten rektifikasyon, pa'n dir nou kan ti fer.

In kapab in fer yer ouswa avantyer selman depi Desanm nou konnen *cleaners* Minister Lasante pe kriy lasasen. Zot in *disrupt* lavi dimoun! Zot pa'n onor zot parol. E zot pa'n anmenn sa avek tou fransizm, lefikasite avek laverite ki ti'n

devret ganny anmennen. Zot in fer dimoun soufer.

Prezan rod nou tou sa ki zot anvi - Rapor Oditer Zeneral. Be Rapor Oditer Zeneral pe pey *loan* sa madanm li? Rapor Oditer Zeneral pe nouri zanfan lekel? Lekel sa *cleaner* ki pou pran Rapor Oditer Zeneral pou al pey son kredi kot Aya Tanbi demen bomaten? Lekel?

Mr Gabini pou al pey *juice* pou en *cleaner* anvoy son zanfan lekol? So ki mannyer eski zot largiman i valid, i relevan, fas avek soufrans ki dimoun in pas atraver mon oule konnen? Ki mannyer sa bann keksoz ki zot pe di ri reste debout fas avek dimoun la deor?

E zot dir nou pou en *savings* R5 milyon. R5 milyon sa bann *cleaner* pe fer 98 mil, pe fer 10 mil! Konmsi pou en bann dimoun ki nou saler nou *take home* i 25mil *we are forking people* 8 thousand rupees, 10 thousand rupees.

Be ki i annan mal avek nou? Ou tandé Mr Speaker ki Onorab Larue i dir mwan, li i pa en *cleaner*. Bravo Onorab Larue, bravo. *Cleaner* i kapab soufer akoz ou, ou pa en *cleaner* Onorab Larue. Mr Speaker, eski ou vwar zot problemm latet kot i *reside*?

Mr Speaker, mank respe pou *cleaner* in komans avek Sef D'Eta. Problem saler

cleaner in komans avek Sef D'Eta. Sef D'Eta pou defann son gro logmantasyon prozekte e la mon dir prozekte, akoz ti'n ganny prozekte a logmantasyon R100 mil pou li. Koman son defans i ti demande eski ou kapab *run* pei ek *cleaners*?

Mon konpran akoz *cleaners* pe ganny pyeten ozordi, akoz zot, zot *downstream of* sa problemm in koman lo latet pei. *The buck stops at the top.* Sa ki pe arive ek *cleaner* ozordi, koman en pei nou bezwen rekonn sa. Ler Sef D'Eta i mank respe pou tout en group dimoun, *this is the result.* Vwala rezulta.

Zot pe dir nou *savings* R5 milyon; R5 milyon *savings*, en? Mr Speaker, semenn pase zot anmenn en swadizan teknisyen la ki'n les nou konpran poudir li in depans R200 milyon, R300 milyon dan 2 an.

Ti annan larzan pou li depanse, e in antre zot in depanse *like some kind of drunk uncle* mon sipoze. 200 milyon dan 2 an. La nou pe *fault*, nou pe dir nou pe fer *savings* 5 milyon, en?

5 milyon *savings*, lot laba li i pe depans 200 milyon e li osi son sekirite lo por pe dir zot pa pe ganny peye parey zot ti ganny peye avan. I annan son lasasen li osi li, byen *proud* in

dir nou in depans 300 milyon dan 2 an.

I ok sa ! Napa *savings* pou ganny fer laba. Zot dir nou poudir i annan *anomaly* dan fason ki *cleaner* ti pe ganny peye, pa kapab pran *anomaly* anmenn anba striktir Gouvernman. Pran zot met anba striktir Minis, akoz i deza annan *anomaly* laba, met zot anba *allowance* Leta!

MR SPEAKER

10 minit, 10 minit Onorab.

HON JOHAN LOZE

Mersi Mr Speaker. Mr Speaker, an terminan mon oule zis dir n keksoz, nou'n fer en *savings* R5 milyon. Apre nou'n fer, nou'n kontribye dan en koripsyon R217 milyon dan 2 an kot ACCS.

Nou larzan ki'n al pey Mersener Angle ki'n travay san *GOP* dan Sesel. Kan mannyer *cleaner* ozordi pe soufer kan nou, nou kapab depans 217 milyon pou fer mersener antre, donn zot zarm, fer zot aret nou nasyon. Kan pou arete sa bann koripsyon ki nou *cleaners* ozordi pe bezwen peye?

E se sa bann kestyon ki nou pe demande koman en Lasanble. Parske mwan mon'n asiz la anndan, mon'n kontribye pou pas Lalwa pou kre en *Management Unit* anba Minister Finans, pou *manage*

seized assets, apre somehow Angle in kre en lakonpannyen zot in vin *manage seized assets* e zot in donn bal dan assets, zot in vole.

E nou pou pey lepo kase. Prezan zot a dir mon problem i ek *cleaner*, nou menm nou isi anndan nou pe kontribye ver sa bal koripsyon ki annan dan nou pei. Problem pa ek *cleaner*. Nou anvi *solve* problem? Komans avek nou isi anndan.

Annou fer remordkonsyans nou e ler nou fini ek nou annou al *State House* nou al fer remordkonsyans laba avek li. Mersi Mr Speaker.

MR SPEAKER

Onorab Bistoquet.

HON ROSIE BISTOQUET

Mersi Mr Speaker. Mr Speaker, *Cleaners Corporative* ti ganny etablir par S.I 89/2009 le 9 Novanm 2009 par Mr Danny Faure - Minister Finans sa letan. E i ti ganny dizourd par S.I 106/2023.

Letablisman sa Korperativ ti ganny kree avek bi pou redwir *wage bill* Gouvernman anliny avek reform ekonomik rekomande par *IMF*, pou tir Sesel dan sa kriz finansyel ki ti'n met lanmen lo nou pei dan sa lepok, akoz move zesyon nou

lekonomi par Gouvernman Parti Lepep sa letan.

Cleaners Corporative ti sipoze endepandan avek Gouvernman. Me avek serten sibvansyon o komansman, tou *cleaners* anploye par Gouvernman, ti zwenn sa Korperativ e bann departman, Minister e Lazans Piblik ti pou rod sa servis netwayaz avek korperativ.

Kreasyon bann tel Lazans ti sipoze ed Gouvernman redwir son Bidze lapey e sa ti sipoze ed Gouvernman ganny led finansyel avek *IMF*, *World Bank*, *Paris Club* e lezot lenstitisyon, akoz zot ti sipoze war poudir Gouvernman pe desarz son responsabilite pou redres nou lekonomi.

Cleaners Corporative ti anrezistre koman en lasosyasyon avek en *Board*, ki Gouvernman ti apwente pou sa premye lannen son legzistans. *S.I 89/2009* ti nonm premye *Board* Korperativ comme swivan;

Marie-Ange Denis, Helene Jeannine Nicette, Marie-Nella Azemia, Lina Hoareau, Rose-Mary Lagrenade.

Apre premye lannen sa Korperativ atraver son *AGM*, ti kapab elekte son prop Komite Egzekitiv enkli son CEO. O komansman sa Lazans ti pou kapab anploy 250 *cleaners*

koman manm, me an 2010 e sanzman dan Lalwa ti permet li anploy en maksimonm 500 *cleaners*.

Rapor Oditer Zeneral 2023, i dir ki an 2022 *Cleaners Corporative* ti pe anploy plis ki 600 *cleaners*. E ki ti napa okenn rankont son *AGM* depi 2019 ki ti met li an deor son ankadreman legal.

An plis ki sa, sa Korperativ ti trouv li avek en gro aryeraz dan peyman, ki bann lorganizasyon ki ti annan kontra netwayaz avek korperativ ti sipoze peye pou sa servis. E sa aryeraz ti'n desot R3 milyon, i paret ki ti napa ase zefor pou kolekte sa larzan e sa ti pe met en fardo finansyel lo Gouvernman pou ed sa Korperativ.

Letan alor ou regard regilasyon ki gouvèrn sa Korperativ e lafason ki zot ti pe kas Lalwa, mon plito krwar ki se a sa moman ki Gouvernman *United Seychelles* ti devret ferm sa Korperativ. Me nou konnen ki pou rezon politik, savedir pou kontinyen fer sir zot dimoun i byen pase, zot ti zwe pa war naryen.

Parske Mr Speaker, letan mon'n ekout serten komanter lo lot kote latab, zot pe lager lebra kase pou bann Manm *Board* tel ki bann saler R37 mil 784, R31 mil 485, R18 mil 286; bann *allowance* R10 mil

784, R6 mil 586 e sa 128 *cleaners* ki ti pe travay 7 er - midi e benefisyé lo sa lezot 543 *cleaners* ki ti pe travay 7 er - 3 er.

Mr Speaker, ozordi rezondet sa Korperativ i nepli egziste.

Anba ladministrasyon LDS an 2022, nou *GDP* ti'n depas R23 bilyon. E Gouvernman ti kalkile ki dan sa novo klima ekonomik favorab, i ti pou kapab anploy bokou sa bann *cleaners* koman zot prop *staff* ankor enn fwa a en kou ki mwens ki ti pou koute si i ti kontinyen *outsource* sa servis avek Korperativ.

Alors Mr Speaker, si rezondet pou sa Korperativ i nepli egziste, kwa ki en ladministrasyon serye ki pe diriz Gouvernman i fer? Larepons i senp, i pran en desizyon ki regard dan lentere pei ek travayer.

Sete sa rezon alors ki Gouvernman ti deside dizourd *Cleaners Corporative* an Desanm 2023. Mr Speaker, mon'n osi ganny serten mesaz sorti kot *cleaners* ki travay kot Lopital Sesel e zot in dir mwan envit Onorab Spiro, pou pas lopital e regard fason ki novo *management* pe adres sityasyon.

Ozordizour en levanter dra in ganny fer e napa dra ki ti manke. Sete en mannev

politik ki ti pe fer sa bann travayer kasyet sa bann dra, avek en bi travay pour tir li 2025 ki an retour bann pasyan ki ti pe pey le konsekans.

Mr Speaker, e la mon felisit Mrs Dorothy Valmont Raforme pou son bon *management* menm avek bokou defi, parske se li ki pe ansarz loperasyon Lopital Sesel.

Mr Speaker, vi ki 3 mwan pe al fini depi klotir sa Korperativ e vi ki laplipar sa bann *cleaners* in fini ganny en plas travay dan Gouvernman e sekter prive, mon pa vwar ki bi pou ganny akonplir par re kree sa Korperativ a sa moman. Akoz i pou napa ase manm pou fer li rantab koman en lorganizasyon, vi ki i ti pe *fail* deza kan i ti pli larz.

Mr Speaker, sa Mosyon napa okenn sans. I pe senpleman rod repar en masin ki pe marse. Alors en gaspiyaz letan ek lenerzi. Mon pou ankouraz tou bann *cleaners* pou delivre meyer servis posib, akoz lo sa kote latab nou apresye zot e nou rekonné tou lenportans ki zot zwe dan nou bann landrwa travay.

Avek sa detrwa mo Mr Speaker, mon pou fer parey mon ti fer semenn pase e vot kont sa Mosyon. Les LDS travay. Mersi Mr Speaker.

(APPLAUSE)

MR SPEAKER

Onorab Adelaide.

HON FRANCOIS ADELAIDE

Mersi Mr Speaker. Bonn apre midi tou dimoun.

Mr Speaker, lo Mosyon ki *LOTO* in anmennen pou *quash* *S.I* mwan lo mon kote mon pe get li koman en Mosyon ki en pe - ki vreman iresponsab ler ou pe gete ki Lopozisyon minoriter, pe servi febles zot pe fer bann politik sansasyonnel, zis petet pou zot mazinen zot a ogmant zot vizibilite e petet zot a ganny en pe plis manm pou vot pou zot 2025.

Tou zot latak i vize ver Eleksyon 2025 e byensir nenport ki keksoz zot pour vin avek *be it* iresponsab, *be it* pa popiler, be solman zot pou vin avek zis pou zot kapab fer krwar ki zot pe travay kan salerla zot pe zis met Sesel otaz.

Mr Speaker, Gouvernman *LDS* mon konnen poudir i annan byennet lepep aker. E pour bann *cleaners* osi, sa pa zanmen en leksepsyon. Parey nou'n dir Sesel i pour tou son zanfan. Ladministrasyon i kontan tou son zanfan, me i oule ki ler i met resours a dispozisyon son bann zanfan

resours i ganny servi dan en bon fason e lepep i benefisyé.

Mr Speaker, sa *S.I* in vini pa akoz Gouvernman *LDS* i anvi pini bann *cleaners*, non. Se apre bann lenvestigasyon par bann profesyonnel ki'n *advice* Gouvernman pou get en kou lo sa kote *Cleaners Corporation*, akoz i trouve poudir larzan ki Gouvernman pe mete - *taxpayers money* ki Gouvernman pe mete i pa pe trounen *back*. E sa larzan se nou tou, nou tou ki nou mete.

E si ou annan en biznes ki ou dir li ou pe fer profi, me i pa pe fer profi so i pa vo lapenn ki ou annan en biznes ki i pa pe fer profi.

E ler nou get en Korperativ Mr Speaker, sa Korperativ i pa ti pou Gouvernman sa. Gouvernman ti pe ede - ti pe ede pour ki ler nou ti dir poudir *IMF* ti dir poudir si zot anvi ed nou, me i annan bann prosedir, i annan bann keksoz ki nou bezwen fer pou nou kapab akse bann finansman. E i ti donn nou konsey.

Bann keksoz ki i pa *core mandate* Gouvernman, Gouvernman i bezwen tire e se sa kot Korperativ ti vin annegzistans.

E en Korperativ se en group dimoun ki zwenn ansanm pou en bi komen. E zot ti zwenn ansanm pou zot ede. E profi i devret en

lorganizasyon avek en bi, ki pou annan en pti profi e sa profi pou ganny zenere avek bann manm. E bann manm sipoze tanzantan zot ganny en pti keksoz e sa i amelyore e Korperativ li osi i vin prodiktiv.

E sa pa ti pe marse e ler sa pa pe marse Mr Speaker, se Gouvernman ki bezwen kontinyen enzekte larzan. Mr Speaker, nou'n tande lapey R37 mil ekek. Mr Speaker ler ou pe ganny lapey koumsa, ou fer siny ou *run* sa biznes, ou *run* sa departman parey ou pe *run* en biznes.

Nou pe *invest* larzan dan lapey en dimoun pou *run* en biznes. E ki ou war, Korperativ pe fer pour li i pe administre avek sa larzan ki nou pe donnen nou annan nou'n trouve lo *payroll*. E an menm tan dan Gouvernman osi i annan dimoun ki bezwen ganny peye pou ed sa Korperativ pou li marse.

E Mr Speaker, nou pa kapab *run* en biznes koumsa e parey mon dir sa i *taxpayers money* e nou bezwen *accountable for*.

Mr Speaker, se pa Minis ki'n vini pou vin eksplik nou, akoz zot ava dir Minis i en *political appointee* i pou siport LDS. Nou'n fer bann teknisyen vini. Nou'n fer bann teknisyen vini vin eksplike. E zot tou zot konnen sa bann teknisyen Sesel napa naryen ki kasyet.

Me nou pa'n get okenn lopinyon politik. Nou'n fer sir sa ki responsab pou li anmenn, pou li fer sa travay, nou'n fer li vini dan Lasanble pou li kapab donn en leksplikasyon.

Akoz si vreman nou ti'n zis kit sa topik an deor leksplikasyon bann teknisyen, byensir petet zot ti a ganny war koman nou pe *cool bias* - nou pe servi nou mazorite, nou pa anvi lepep i konn laverite e nou anvi servi nou mazorite pou nou kapab *quash S.I* ki *LOTO* in anmennen, kan i pa leka Mr Speaker.

Mwan mon krwar en Gouvernman responsab parey ki nou'n fer, parey nou bann Manm Lasanble isi lo *LDS*, nou'n inovativ.

Se pa Prezidan ki'n dir nou, anmenn sa 2 madanm dan Lasanble Nasyonal, se nou fason inovativ, ki mon krwar depi ler ti annan, tou kou ti annan bann *query* lo bann keksoz ki nou ti anvi nou pep tann laverite, nou'n fer sir nou'n anmenn bann profesyonnel pou eksplike.

E Mr Speaker, byensir ler profesyonnel i eksplike, i fer ki i annan en lefe lo azanda parti minoriter.

Akoz zot, zot la pou fann fo lenformasyon, fo propagann. E si nou, nou pa fer sir ki nou *rise above* sa e

nou pa defann sa nou menm. Nou anmenn bann profesyonnel ki konn konte, ki konn analize e zot vini zot donn nou en desizyon, en bon desizyon ki kapab gid nou. E pa zis nou Lasanble e i enform laba ; i enform sa bann *carer*. I enform Seselwa ki mannyer keksoz pe deroule.

So byensir i pou annan diferan kote, diferan lopinyon e sa i en keksoz ki *LDS* i ankouraze. Be solman le bi se ki mesaz i ganny anvoye deor avek popilasyon e mesaz i laverite.

Mr Speaker, nou'n tann dir poudir en *cleaner* pe netway 24-25 lofis. Be Mr Speaker, be sa 21 sepa 24, be Mr Speaker, be si en *cleaner* pe netway 21 lofis, eski sa *S.I.* pou fer ki i pou netway pli pti git lofis? Be sa se *management* dan sa landrwa travay, ki trouve si *workload* i bokou i rod 2 *cleaner*.

Mr Speaker, be mon krwar nou pe konfiz, nou pe konfiz sa *S.I.*, nou pe anmenn tou bann keksoz sansasyonnel, ki pou fer? Zis pou fer sa bann *cleaner* vir kont *LDS*. Se sa ki nou pe fer.

E mesaz ki zot pe anvoy la deor e ki dimoun pe krwar ki tou *cleaner* in aret travay dan Sesel! Tou sa 600 ekek *cleaner* in arete zot in ganny met lo poz, zot in ganny met laba.

Be non Mr Speaker, se pa sa ki'n arive. Bokou plis *cleaners* i pe anploye, i pe travay. Bokou plis *cleaner* i pe anploye i pe travay. E sa ki pa'n anvi zwenn byensir i son swa. E i annan bokou swa Sesel si ou pa anvi travay ek sa ladministrasyon nou al rod en lot travay. E sa napa naryen ki apel labi drwa imen sa, sa set en pei demokratik. E keksoz i devret koumsa.

Mr Speaker, ou pa kapab dir mwan poudir nou tou lede nou dan *Cleaners Corporative*, mwan mon pe travay 7 er midi lot pe travay 7 er -3 er ouswa 8 er - 3 er ki i bezwen annan zot ganny saler parey. Mr Speaker, be sa kote ti egziste?

Be si ou pe travay 5 erdtan e Sesel i annan Lalwa ki diriz lapey dan Gouvernman. Si ou pe travay 8 erdtan ou ganny peye 8 erdtan, be si ou pe travay 4 erdtan - 5 erdtan ou ganny peye 5 erdtan.

E la ti annan en lenzistis. Bokou plis dimoun ti pe travay, me zot mannyer ou kapab dir zot reminerasyon i pa ti korek, akoz ou pa kapab dir mwan poudir mon travay pli mwens ki ou, me selman nou ganny peye parey.

So mon krwar sa osi i en *anomaly* ki bann profesyonnel in trouve e zot in adrese Mr Speaker. Mr Speaker, ler nou pe gete nou pe trouve ki petet

nou ti pou war en lot *Air Seychelles* ankor, kot zis larzan i ganny mete, i ganny mete, i ganny mete me napa reveni.

So mwan mon krwar dan sa Lasanble Nasyonal kot nou ete isi, mon krwar nou devret fer sa ki bon. Menm kantmenm desizyon i difisil, nou pou bezwen pran bann desizyon ki pou vreman annan benefis pou nou kominate, pou nou pei.

E nou pa anbet nou bann piblik. Annou donn piblik bann bon lenformasyon pour ki zot a fer en desizyon kler ler zot pe analiz keksoz Mr Speaker.

MR SPEAKER

10 minit Onorab.

HON FRANCOIS ADELAIDE

Mr Speaker, napa problem. Me solman an gro liny Mr Speaker, mon pa pou kapab siport sa Mosyon ki Onorab *LOTO* in anmennen, akoz i pa pou fer zistis e i a pou bouz nou pei kot nou *LDS* ki nou ti ganny sa mazorite pou nou fer pou bouz devan.

So mwan mon pou bezwen vot kont, mon byen eskize. Ler ou anmenn en bon keksoz mon ava vot pour, me ler ou anmenn en move keksoz mon pou vot kont. Mersi Mr Speaker.

MR SPEAKER

Onorab Uranie.

HON ROCKY URANIE

Mersi Mr Speaker. Bonn apre midi tou koleg Onorab. En bonn apre midi spesyal pour tou nou bann *cleaners* ki a lekout.

Lemonn in ganny kree avek diferan kreatir ladan e dimoun i enn bann kreasyon merveye mon kapab dir ki'n ganny kree. Mr Speaker, mon komans koumsa akoz si ti napa dimoun ti pou napa ni Prezidan ni Egzekitiv, ni Manm Parlman, ni peser, ni planter, ti pou napa ni *carer*, ni *cleaners* ki ti pou egziste.

E nou dan *United Seychelles* nou pa zanmen bliy okenn domenn, okenn travayer; nou'n toulstan lager pou tou travayer. Tou dimoun a en moman dan son lavi e menm ozordi, in bezwen en *cleaner*, in bezwen en *cleaner*.

Kantmenm ou en Manm Parlman ou bezwen pe netway se ou, petet ou annan nennenn, me selman ou bezwen pe netway se ou pour kit ou lakour prop, ou lanvironnman prop e akeyan pou kapab motiv ou e viv dan an lanvironnman konvenab prop e sen.

E nou, nou en pei ki sanpyon lanvironnman e nou toulstan pe dir nou bezwen netwaye. E pou netwaye sa i

osi bann *cleaners*. Me la nou pe koz lo bann *cleaners* ki ti ganny ankadre anba Korperativ pli presizeman Mr Speaker.

Mr Speaker, ou kapab mazinen si en zour bann *cleaners* i deside dir ozordi nou tou nou pa desann pou al travay, pou en zour ou 2 zour nou tou nou pa desann pou al travay, pou 3 zour nou tou nou pa desann pou al travay ki pou arive?

Ki pou arive avek nou pti pei Sesel? Menm dan bann lotel, nou lendistri, dan nou bann lekol ki pou arive si nou bann *cleaners* i deside fer sa? Ou konnen, nou pe rod zis en pti larzan pou nou bann *cleaners* sa bann boug pe tap koudpye ladan.

Nou pa ni pe demann 1 milyon pou *cleaners* nou, bann *LDS* pe tap koudpye dan sa pti larzan ki nou pe rode pou *cleaners*, pou fer sir ki *cleaners* i ganny sa *dues* ki zot merite, parey ki zot ti'n ganny promet pou zot kapab pey zot bann *loan*, zot bann keksoz byen pou zot lavi deroul ase byen.

Zis mazinen ou, ler zot ti pou'n servi zot *allowance* ledan, zot ti pou'n fer zot ledan byen prop, zot ti pou'n servi zot *allowance* linet, zot ti pou'n servi zot *allowance* palto oubyen paltolé, bann *LDS* byen vini dan zot gro palto tou

zafer zot ti'n vin la, bann *cleaners* kot Lasanble la pa ti'n netway ditou, ki zot ti pou parey? Ki zot ti pou parey dan ta salte dan zot gro palto?

So *cleaners* i vreman, vreman en group dimoun ki nou bezwen pran ka avek. E alors Mr Speaker, pou mwan mon war i vreman irresponsable Mr Prezidan Wavel Ramkalawan ti fer sa *statement* si i pou *run* pei avek *cleaners*?

Sa pou mwan i vreman irresponsable sa i bezwen fer en *apology* lo medya avek sa bann *cleaners*, akoz i bezwen donn valer *cleaners*. Akoz wi, *cleaners* i kapab *run* pei, akoz si zot deside pa al travay ditou pei pou tonm an rin avek salte ek kosonnyen. Wi *cleaners* i vreman en group dimoun ki enportan Mr Speaker.

Mon dir sa akoz mon manman in en labourer, in en *cleaner*, in netway semen e mwan tou mon lavi mon'n al donn li ler mon ti pe grandi, donn li lanmen netway semen.

Sanmenm sa mon konnen ki mon pe dir. Mon konpran soufrans en *cleaner* mwan Mr Speaker. Kekfwa i annan ki pa konnen.

Mr Speaker, sa irresponsabilite ki Sef D'Eta in fer sa i dekoul ziske la dan Lasanble tou sa, menm isi dan Lasanble ou vwar ki i annan sa

mankman sa iresponsabilite in ariv isi dan Lasanble.

E sa mank konpetans in ariv isi menm dan Lasanble kot *Standing Orders* pe ganny fou koudpye ladan; pa pe ganny respekte zot pa ni konnen ki *order* pou servi pou enn de keksoz.

MR SPEAKER

Onorab! Ou pe fer en lakizasyon kont Speaker?

HON ROCKY URANIE

Mr Speaker... Mr Speaker...

(*comments off-mic*)

MR SPEAKER

Onorab! Silvouple, sanz laliny kontinyen avek ou diskour. E ti a bon si ou retourn lo Mosyon.

HON ROCKY URANIE

Mersi Mr Speaker, pou ou gidans. Mr Speaker, mon pa pe fer lakizasyon kont ou, me selman mon pe koz lo sa iresponsabilite ki annan, akoz nou bezwen donn lenformasyon dimoun ki korek.

Akoz yer bomaten - yer bomaten aparaman ou ti vini ou ti lir en keksoz ki konmkwa mwan mon'n fer en alegasyon ki fo konsernan dimoun i bezwen peye pou antre Linyon Estate.

Mr Speaker, i pa lo poto kot ou al tir *sticker* Depite Henrie, en?

(*comments off-mic*)

HON ROCKY URANIE

Mr Speaker, mon dir iresponsab akoz mon napa okenn landrwa mon annan *verbatim* ek mwan, mon annan sa ki ou'n dir mon annan sa ki mon'n dir. Mon pa'n zanmen dir ki dimoun i peye pou antre dan Linyon Estate.

Mon'n dir dimoun i peye pou ganny en pti bout later nwanr o bor lans lo Linyon Estate, R1000 a R1500 e sa i en fe. Dimoun in ganny aprose zot pou bezwen peye.

So mon pa konnen lekel sa Lotorite ki'n donn ou sa, ki'n sey vin *deny* sa alegasyon, si i *Chairman Board* Linyon oubyen si i Mr David Ochelo ki *Managing Director* Linyon Estate.

Akoz mon'n koz ek li i ti dir mwan, mon'n koz ek li i ti dir mwan, be si i annan en dokiman fer sorti. I dir mwan i pa vreman annan en dokiman *per se* ofisyel, me savedir i annan en dokiman *un-ofisyel* me fer nou konnen.

So alors pa bezwen vin fer bann fo alegasyon pou *impute improper motive*, konmkwa mwan mon'n dir

Linyon Estate *entrance*
Seselwa i bezwen peye.

E sa Mr Speaker, ou ki ti lir e ler mon ti *raise* mon *point of order* - ou pa ti le les mwan ou ti oule mon fer an kasyet dan biro. Ekrir ou avan. Selman ou ti fer pou ou piblik. Dan piblik ou ti fer pou ou.

Parey mon dir tou, (Onorab! Onorab! Onorab Henrie, Onorab Henrie ou'n kopi *speech* ou, ou en move legzanz pou nou bann zenn la deor. Ok. Ou'n kopi *speech*.)

MR SPEAKER

Onorab, ou bann komanter ki ou'n fer anver Speaker i *out of order*. Mon pe toler ou - mon pe les ou fini ou diskour. Me selman ou bezwen evite fer sa kalite komanter e silvouple respekte osi lezot Manm. Mersi.

HON ROCKY URANIE

Mersi Mr Speaker. Mon krwar si ou kontrol lezot Manm, mon a respe lezot Manm. Mersi Mr Speaker, mon a swiv ou gidans.

Wi Mr Speaker, ki nou pe rode nou, nou pe rode pou anil sa *S.I.*, akoz nou pe get atraver sa *S.I.* nou bann *cleaners* pa'n gannyen sa ki zot ti pou dir.

Napa en *clause* ladan, i mank en *clause* parey bann lezot, ki pou fer pou asire ki bann *cleaners* i ganny tou zot *dues* parey ki zot merite.

Sanmenm sa nou pe rode pou anil sa *S.I.*

Zot in anmenn teknisyen la, teknisyen in eksplike wi, me eski i annan sanzman dan saler sa *cleaner*? Nou, nou pe rod sa pti mwenza pou sa *cleaner*. Nou pa pe fer politik bon marse, nou pe rod sa pti mwenza pou sa *cleaner* akoz nou, nou ganny nou gro, gro saler *ok*?

Egzekitiv ti pe rod son pli gro saler ki zot ti pe antisipe gannyen. E nou pa konnen si i pe vini dan *pipeline*, oubyen zot pe tenir akoz pangar zot a perdi Eleksyon 2025.

MR SPEAKER

10 minit Onorab.

HON ROCKY URANIE

Mersi Mr Speaker. Mr Speaker, yer mon non ti bokou dan ou labous, yer ti annan zis mon non, ozordi ou a krwar ou pa oule tann mwan koze.

MR SPEAKER

10 minit.

HON ROCKY URANIE

Wi. So alors mon pe senserman mon siport Onorab Sebastien Pillay pou anmenn sa Mosyon pou anil sa *S.I.* 106 Mr Speaker.

So Onorab Pillay, mwan avek mon bann koleg nou pou siport ou totalman lo sa Mosyon, akoz nou dan *United*

Seychelles nou serye nou toulstan en lavwa pou bann *cleaners* ki napa en lavwa. Mersi Mr Speaker.

(APPLAUSE)

MR SPEAKER

Onorab Bastienne, ou annan laparol.

HON DESHIELA BASTIENNE

Mersi Mr Speaker. Bonn apre midi Mr Speaker e bonn apre midi tou dimoun a lekout.

Mr Speaker, S.I. 106 i koz lo *phasing out* *Cleaners Corporative*. Me ozordi i la devan nou pou en lot *purpose* kot Onorab *Leader Lopozisyon* pe demande ki sa S.I. i ganny *quashed*. Pour li i enportan ki *Cleaners Corporative* i retourne operasyonnel.

Mr Speaker, *Cleaners Corporative* ti vin operasyonnel an 2010, dan lenstans kot Gouvernman sa lepok Gouvernman *SPPF* zot ti pe ganny ankouraze par *IMF* pli boner pou redwir lo bann depans pei serten group ti ganny kre dan sa lespri pou vin lotonomi; tel ki sa fame simityer, Group Sekirite, e osi *Cleaners Corporative* ki nou pe koz lo la ozordi.

Me ki dan plas redwir lo depans, i ti plito vin en pli gro depans an plis lo lebra Gouvernman.

Tel parey tou bann Lalwa, tou bann landrwa travay kot zot bann anplwayer i tonm direkteman lo zot *payroll*, pou *Cleaners Corporative* ti annan en lot fason fer.

Mr Speaker, mon konpran ki en Korperativ i vin en biznes dan li menm kot menm serten dimoun i konsider li konman en lasosyasyon; i ti ganny formen par en group dimoun ki sipoze annan son *full kontrol* tel ki lo son kote ekonomik, sosyal, e kiltirel e zot sipoze pe servi zot prop prodwir, sipoze kapab kontrol zot servis, zot depans osi kapab siport e fer fas avek *welfare* zot travayer e responsab pou zot prop aksyon.

Mr Speaker, letan mon pe koz lo *Cleaners* Korporativ, mon pa pe koz kont okenn travayer *cleaner*, kont okenn travayer sirtou sa group madanm ki ti tonm anba sa Korporativ. Ki bokou zot, zot ti fer bon travay e zot ti vreman serye.

Me senpleman son fason ki ti a pe ganny fonksyonnen, pa ti anliny koman en Korporativ endependan avek en bon lentansyon.

Nou ti plito dekouver ki i ti annan en laranzman pou senpleman donn en lokipasyon en pti group dalon. E byensir bann manman ki ti

bezwen travay, ki ti pe rod en travay pou anmenn manze kot lakour pou zot kapab fer grandi zot zanfan, zot ti oblige pran en lanplwa anba sa Korporativ ki ti'n ganny met an plas.

Mr Speaker, letan mwan ti rantre letan mwan mon ti antre dan lemonn travay byen zenn an 1980, bann *cleaners* ti deza egziste e zot ti pe ganny anploye dan bann Minister, Departman Gouvernman, osi byen ki bokou landrwa prive e la nou ava mazin osi bann labank, *supermarket*, lotel; diferan lazans bato, e bokou lezot landrwa prive.

Travay *cleaner* ti toulstan ganny valorize dan nou pei. Zanmen en madanm ki ti travay konman en *cleaner* ti kanmi, ouswa santi zot anbarase pou desann dan bomaten pou al fer zot travay. Akoz li osi i ti santi li enportan e fyer pou son travay.

Mr Speaker, mon pran legzanp lo mon manman ki ti toulstan en travay konman en *cleaner*, kot tou le bomaten nou ti desann ansanm, nou al lekol, li i al fer son travay. Ler nou, nou sorti lekol, nou ti rezwenn li e nou osi konman zanfan lekol nou ti donn li lanmen travay.

E la mon mazin sa fame *Mahe Shipping* la vizavi ki ti la vizavi Kord Gard Santral, kot mon manman ti travay la

cleaner, apre i ti al *DBS*, *still* dan *DBS* osi ler nou ti dan vakans nou ti al ede. E ler apre son retret mon manman ti kit *DBS* konman *head cleaner*.

Mr Speaker, letan sa biznes Korporativ ti ofisyelman ouver mwan mon ti annan bokou kestyon. Akoz? Akoz ozordi fodre annan en Korporativ? Kote kot li ki pou oblige donn *cleaners* dan bann landrwa travay. Eski Gouvernman sa letan ti vreman pe fer en keksoz differan? Ouswa i ti pe fer faver lo faver?

Labi lo labi, servi sa aktivite konman en lot zouti politik. Sa ki mon ti dakor de lot kote Mr Speaker, se ki bokou malgre *Cleaners* Korporativ ti ganny met an plas, bokou biro prive, labank ek Lendistri Touristik, zot ti gard zot bann *cleaners*. E zot ti form par sa landrwa travay koman en sel fanmir.

Mr Speaker, ler nou koz labi, i annan rikord ki dan *cleaner corporative* travay ti konmans 7 er bomaten e ti fini 3 er apre midi lo en *fixed saler*.

Me i annan en pti group en bann i dir 120 en bann pe dir 128 *cleaners*, me ti en group menm ki zot ti a en serten letan zot ti travay 7 er bomaten e fini midi, dan lespri al fer en lot pti deboury.

Me ki nou'n aprann? Zot ti deboury ti ganny fer lanmenm la dan sa menm Korporativ. I bon note ki zot ti pe ganny menm saler 7 er bomaten ziska midi. Apre ankor zot ti ganny ankor en *allowance* konman en *overtime*, ki pou zot ti ganny konsidere konman en lot pti deboury.

Mr Speaker, atraver ou, Onorab Pillay ti konnen ti annan sa laranzman ki ti pe arive alor?

Sa ti *ok* pou li? Sa pa defavorize sa? Ti napa lenzistis ladan la? Eski tou *cleaners* ti konnen ki ti pe arive? Kot ti *ok* avek sa laranzman vreman, en bann ki ti travay an plis en bann ki ti travay an mwens me la saler ti parey? Ti *ok* s2

Pou mwan sa i en lenzistis. Travayer pa kapab annan de klas travay, kot en group i travay 7 er -3 er, en lot i travay 7 er - midi pou menm saler. Pa'n bon ditou sa enn. Koumsa ki US i travay zot.

(APPLAUSE)

HON DESHEILA BASTIENNE

Mr Speaker, nou'n osi ganny lenformasyon ki menm ki *Cleaners* Korporativ, in ansarz son bann *cleaners*, si en landrwa ti ganny konplent konmkwa sa landrwa i sal i annan en problem, se pa sa

Korporativ ki ti ganny blanmen ki ti reponn kestyon.

Me tou blanm ti tonm direkteman lo sa Minister konsernen ou sa departman. Se zot ki ti bezwen abzorb bann kritik, menm ki bann *cleaners* pa ti tonm lo zot *payroll*.

Repons pou sa se ki akoz ti napa sa swivi.

Mr Speaker, nou ti ava kontan konnen ki mannyer sa dan lizye Seselwa ozordi i byen e i ti normal pou Minis Lasante i ganny kritik, ki lopital i sal, selman *cleaners* ki ti lo *payroll* Korporativ e pa ti tonm anba zot responsabilite.

Mr Speaker, mwan mon byen rapel ler Mrs Mitzy Larue ti Minis pour Lasante, letan i ti pe fer son letour dan bann lo bann ward, bann remark ki i ti fer, i ti demande akoz sa miray i sal i demann en cours lapentir la, sa rido in kase pe anpandan kan pou sanze? Be ti dan lepok lekel sa? Minis Peggy Vidot?

Lontan e lontan nou pe ganny konplent ki lopital i sal, *fungus* dan lasal loperasyon, lasal de ben i sal, twa tol lopital i koule. Dra i nepli sanz souvan.

Amwen ki pasyan i konplent ki i pe dormi lo en dra depi 3 zour pase. Lontan sa i annan sa bann konplent. Eski i ti amelyore? Eski i ti kontiny parey? Ki'n arive?

Mr Speaker, mwan mon ankor rapel anmenn dra kot manm mon fanmir lopital ti fer en loperasyon an 2016, lekel ki ti Gouvernman sa lepok? Lekel ki ti Minis Lasante sa lepok?

Mr Speaker, bal in donnen partou kot bann pti group in kapab profite. E sa ti stil US. Se pou se la zot pe touy lekor pou retourn o pouvwar. Zot malad sa pouvwar, kot zot ava donn bal dan larzan mannyer zot anvi!

Mr Speaker, sa ki mon kontan bann *cleaners* ki i annan lanmour pou zot travay ozordi, zot dan en lanplwa, kot zot osi form par sa lorganizasyon.

MR SPEAKER

10 minit Onorab.

HON DESHEILA BASTIENNE

Zot pa pe debout lo zot tousel, zot en *staff* ki dan lanplwa travay bokou. Ozordi, *Cleaners* ki pe travay dan en labank i pe ganny menm tretman i a pe profit *staff loans* e i pa pe ganny met a lekar letan i annan en parti. Zot form en sel fanmir.

Mr Speaker, ozordi *cleaners* i konnen kote zot ete dan zot lanplwa, akoz zot saler i anliny avek zot erdtan travay.

Zot in sorti lo en saler 6 mil 600 zot pe tous 8 mil 500 a 9 mil. Selon zot *allowance*,

ler zot travay konze piblik, swa zot ganny zot peye ouswa zot ganny rann zot zour.

Mr Speaker, se pou se la ki mwan mon pou vot kont sa Mosyon pou *quash* sa *S.I* anmennen par Onorab Pillay, pou ki tou bann *cleaners* ava ganny bann pli bon *deal* ek zistis dan zot bann landrwa travay. Mersi.

MR SPEAKER

Mersi.

(APPLAUSE)

MR SPEAKER

Bon, nou ava poz la nou ava repran deba 4 er.

(BREAK)

MR SPEAKER

Onorab Loizeau, laparol pou ou.

HON NORBERT LOIZEAU

Mersi Mr Speaker. Bonzour tou dimoun a lekout. Mr Speaker, mon'n ekout bann lentervansyon atantivman.

Me en keksoz mon anvi konmans avek. Konmsi mon demann mon lekor ki pouvwar nou annan nou konman en Manm Lasanble, sirtou bann ki pe tenir bann pos en pe for dan Lasanble.

Mr Speaker, mon pe dir sa akoz mon'n tann serten Manm US en Manm US koze

dir ki koripsyon i partou, partou kote dan pei dan bann lorganizasyon.

Mr Speaker, be mon en kestyon ki mon demande, be ki zot konman en Lopozisyon zot pe fer? Sirtou ki *Chairman FPAC* i zis la o bor zot.

E Mr Speaker, mwan mon rapel en keksoz, nou ler nou ti dan Lopozisyon, nou ti lager pou nou kapab ganny *Chairman Chief FPAC* senpleman akoz? Pou nou kapab anmenn keksoz o kler, bann koripsyon ki nou'n tandé.

E la i fer rapel *FIU, NDEA* bann rafal *Irish* ti pe donn bal - bann kont ki ti pe ganny soz. E *SBFA* Mr Speaker, mon rapel tre kler ler Onorab Andre ti vin avek sa size frod, bann keksoz ki pe arive kot *SBFA*, deswit sa *matter* ti ganny *take up* par Onorab Ramkalawan, ki Prezidan Larepublik, ki sa non i donn en gou anmer dan zot labous sak fwa mon koze, mon repet sa.

I ti pran sa Mr Speaker, e i ti fer *Hearing* konman *Chairman FPAC*. E laverite ti sorti, tou keksoz ti vin o kler.

E alor Mr Speaker, mon demande be Lopozisyon i pares Mr Speaker!

Zot annan – zot annan tou sa pouvwar, ki nou nou'n lager e nou'n donn zot e zot pa pe fer li. E zis nou pe dir koumsa dan lezer konmkwa, i

annan tou sa bann koripsyon ki pe arive.

Mr Speaker, an 2020 ti annan en sanzman Gouvernman dan Sesel. E pou premye fwa sa ti ariv demokratik-man dan Sesel kot en Gouvernman *LDS* ti vin o pouvwar.

Alor Mr Speaker malgre ki ler i annan en sanzman Gouvernman, i annan sa kontinite dan travay ki sa Gouvernman pe fer.

Eski alors Mr Speaker, menm si i annan serten keksoz, i annan serten Polisi petet ki pa bon, i annan serten keksoz ki pe mal, fer ki pe anmenn bokou lenzistis pou serten Mr Speaker, akoz i annan sa kontinite dan Gouvernman, eski nou merit kontinyen avek ?

Mr Speaker, non. Mwan a mon avi mon pa ti vot pou sa. Nou pa pou kapab kontinyen. Nou pa pou kapab kontinyen Mr Speaker, akoz nou ti ganny elekte pou nou vin fer pli byen.

Mon rapel toultan lo lot kote latab zot dir sa. Zot in ganny elekte be fer pli byen. Mr Speaker be la, ler nou pe fer pli byen nou pe koriz bann lenzistis ki ti pe arive parmi bann serten travayer, zot dir nou i mal ki nou pe fer.

Pourtan Mr Speaker, dan lepase ou ti o pouvwar en ta keksoz zot in fer san konsilte nou. E nou, nou ti annan en

lavwa feb sa letan dan Lopozisyon, nou pa ti kapab fer nanryen nou ti bezwen zis *go with the flow*, eksepte ler mon ti ganny 15 lo 10. Ler nou ti ganny 15 lo 10 nou ti annan en mazorite dan Lasanble la prezan ki nou, nou ti annan en lavwa e zot, zot ti ekout nou.

Mr Speaker, ozordi vi ki Gouvernman *LDS* ki dan Egzekitiv Mr Speaker, eski nou pou bezwen pran lord avek Lopozisyon? Tou sa ki nou bezwen fer nou bezwen tonm azenou devan Lopozisyon pou dir zot nou anvi fer sa ?

Non Mr Speaker, nou en Gouvernman. I nou tour. I nou tour pou nou fer en travay. E si apre pli tar Lepep Seselwa pa kontan, Lepep Seselwa zot ava fer zot desizyon anver nou.

La pandan sa 5 an ziska 2025 les nou travay, Mr Speaker. E en keksoz parmi plizyer lezot keksoz Mr Speaker ki nou, nou ki pa ti tonm an akor avek nou Gouvernman, nou Polisi lafason ki nou ,nou ti santi.

E nou ti santi ki nou bezwen met en lafen avek, sa se *Cleaners Corporative*. Akoz Mr Speaker? Nou'n tann dir parmi bann teknisyen ki'n vin la, Ms Tamatave - ti en fardo lo nou. PS Tamatave ek *Chief Secretary* Ms. Shella Mohideen Mr Speaker.

E sa de teknisyen Mr Speaker, de teknisyen ki'n ganny *train* en bann letan anba zot Gouvernman, anba Gouvernman US. Ozordi zot merit kapab konpran ki sa bann dimoun sa ki zot pe dir i byen, akoz se zot ki'n ganny *train* dan sa domenn.

E nou konman en Gouvernman, nou pe ekout nou bann teknisyen nou. Nou pa pe fer keksoz zis akoz nou, parey zot pe dir Ramkalawan *State House* pe dir fer sa. Non Mr Speaker. Nou annan bann teknisyen ki pe etidye sa bann keksoz e ki pe pran desizyon pou nou Mr Speaker.

Se sa rezon ki nou, nou ti anmenn zot la.

E mon anvi felisit Ms Tamatave pou son lapwentman osi Mr Speaker. E Ms Tamatave pe fer en travay mon anvi dir li kontinyen fer sa travay, Sesel pou tou son zanfan. Fer sa travay byen onnet met ou lapartenans politik apar e fer li pou byennet Sesel e tou Seselwa. E mon kontan sa ki pe arive ozordi i pe fer sa.

Mr Speaker, nou ava rappel - mwan mon rapel byen akoz URS ti fermen, avan mon al lo *cleaners*, mon a pas en pti pe an detay, akoz ti annan tro bokou labi ki ti pe arive.

Kot dimoun ti ganny mete lo sa *scheme* menm si i

ganny peye, menm si zot pa fer gran keksoz.

Mr Speaker, mon rapel kot Ladministrasyon Distrik Bel Air ti annan 4 dimoun, 10 er ou vwar zot pe desann pe al lo gento Corgate ouswa anler Stevenson.

Selman en lapey R7 mil zot pe gannyen tou le mwan. 7 mil mon krwar ti pe donnen.

Mr Speaker, me sa ti en lenzistis. Ti en lenzistis anver bann dimoun ki ti pe travay a lasyer de zot fron parey Onorab Arissol, Onorab Sandy Arissol i kontan dir, ki ti pe trimouse.

Me zot, zot pe ganny zot ti bezwen travay dir me sa bann zot nanryen ditou zot ti pe ganny peye, zis akoz pou rezon politik. Akoz en eleksyon ti pe arive. E nou, nou ti met en lafen ek sa.

Ozordi Mr Speaker, be tou dimoun pa pe travay? Napa URS. Tou dimoun e travay. Eksepte bann ki pa anvi travay, sa i zot swa. Menm sa i annan *social - sosyal* ki kapab ed bann ki bezwen en pti benefis ava donn zot. Me bann ki pa anvi travay sa i zot swa. Lavi pe kontinyen Mr Speaker.

Mon retourne lo *Cleaners Corporative* Mr Speaker, eski i ti en keksoz ki efikas mon demande? Kestyon i non. Akoz en odit entern ki ti ganny fer an 2022 ti montre ki sa

Cleaners Corporative la, ler ou gete konmsi zot ti pe *operate* konmsi konman en antite Gouvernman.

E *accountability* Mr Speaker, dapre bann teknisyen byensir ki'n dir toulstan ti tonm lo Gouvernman. Nou ava rapel plizer zot, in koz lo lopital sal, par egzanp. Mr Speaker, nou'n tande isi dan sa Lasanble ki lopital i sal, napa dra, diferan loder pi, pa konnen ki kalite loder zot in santi zot in al laba. Tou sa bann loder i fek vini 2020 apre eleksyon Mr Speaker.

E lekel ki ganny atake? Se Korporativ ki ti ganny atake? Mr Speaker, non, se Minister Lasante ki ti ganny atake.

Me pourtan, me pourtan Mr Speaker, lekel ki ti ansarz sa Korporativ se en *CC Member* dan *US Mr Speaker*.

E lontan e sa bann zafer loder dra konmdir Onorab Bastienne pa'n fek arive sa, pa'n fek arive. Lontan in arive. Ozordi Mr Speaker, e ler nou tann sa Mr Speaker, ozordi zot pe dir *quash* sa *S.I.*, parey Onorab Hoareau ti fer pli boner.

MR SPEAKER
10 minit Onorab.

HON NORBERT LOIZEAU

Hmmmm deza? Mr Speaker, eski zot realize mon a koup en bout. Sa menm *cleaners* sa menm loder ki zot ti pe santi se sa bann menm *cleaners* ki ti pe travay dan sa Korporativ, se zot ki ti pe fer sa bann travay ki zot ozordi zot pe sey siporte.

Mr Speaker, dan sa deba la mon ti annan en ta keksoz pou dir me letan in pas sitan vit Mr Speaker.

Dan sa deba mwan mon'n reflesir lo en keksoz, i annan zis en keksoz ki zot anvi, ki zot pe siporte. Zot napa nanryen pou fer ek sa bann *cleaners* zot. Zot annan pou fer ek zis sa dimoun ki lo latet sa Korporativ Mr Speaker. Akoz i enn zot.

E M Speaker, san pran kont sa bann lenzistis ki ti pe arive dan Korporativ, e mon ava dir zot Mr Speaker, permet mon donn mon zis en minit mon ava pas lo la Mr Speaker.

MR SPEAKER

Onorab, konklir silvouple.

HON NORBERT LOIZEAU

Ok Mr Speaker, pou - Mr Speaker, mon pa pou kapab konklir, be i telman annan keksoz pou dir.

MR SPEAKER

Be letan i limite.

HON NORBERT LOIZEAU

Mr Speaker, mon krwar mon ava termin la. Mon ava vir en lot zour mon ava fer sa deba. Akoz si mon koze mon pou koze ziska lannmen bomaten.

Mon telman annan pou dir Mr Speaker, 10 minit mon pa pou kapab koze, mon ava termin la. Mon a dir ou mersi e mon ava anmenn sa deba pli tar en zour dan en lot Mosyon ki ava vini. Mersi.

MR SPEAKER

Mersi Onorab. Onorab Aglae?

HON EGBERT AGLAE

Mersi Mr Speaker. Bonn apre midi tou bann dimoun ki a lekout, spesyalman pou bann *cleaners* ki nou konman en parti nou deryer zot, e nou krwar ki nou bezwen vvar en lazistis sosyal dan zot bann demars.

Mr Speaker, mon pou konmans mon lentervansyon lo sa size *cleaners* e dabor Mosyon ki la devan nou, pe demann en *repeal* sa *S.I* pou donn letan Gouvernman, al aranz bann kondisyon ki an premye lye letan zot ti pe mazin ferm Korporativ zot ti fer *meeting* avek sa bann *cleaners*.

Zot ti met bann kondisyon ki sipoze pli favorab avek zot reminerasyon e zot ti ganny dir zot pa pou perdi nanryen e zot pou al ek zot *take home* ki zot deza pe

gannyen, letan zot pou antre anba en nouveau zerans ladministrasyon. Sa ki ti ganny dir.

Be an alan nou vwar poudir gol pos i sanze e kondisyon i sanze e se sa ki nou pe lager la ozordi, pou fer ki sa kondisyon ki ti ganny set o konmansman i ganny respekte e pa kree bann lezot kondisyon ki pa ti ganny met dan kondisyon orizinal. Sa ki nou, nou pe sey lager.

Mr Speaker, dan tou - nou pa *mind* Gouvernman fer son sanzman, akoz sak Gouvernman pou vini i pour *run* pei dan son fason, administre li son fason.

Zot in antre depi 2020, zot in ferm en kantite antite ki ti pe donn sipor zot in ferm *APDAR*, zot in fer en bann kalite *gerrymandering* avek *ASP*, zot in zot koz lo lapovrete. Zot ti ferm seksyon lapovrete ki ti anliny e an mars pou kapab retir dimoun dan lapovrete.

Mwan mon napa problem ek zot bann sanzman ki zot in fer. Me sa ki enportan, se ki zot bezwen mazinen si zot koz lo en Gouvernman responsab, pa sak fwa i annan bann sanzman ki afekte lavi dimoun, se sa ki pli vilnerab i ganny afekte.

Sa nou problem. Nou pa vwar larzan pou donn

cleaners ozordi, me selman nou kapab vwar plizer milyon pou met dan bann serten antite pou ganny larzan. Sa i fasil pou zot fer sa.

Nou pa kapab vwar larzan; nou dir nou fer *saving* 5 milyon - konmsi *saving* 5 milyon pou mwan pou zot en gran *saving* ki zot in fer, me selman plizer milyon 3 milyon zot kapab al lo zil, monte desann i annan plizer pou ganny fer. Plis ki 100 milyon anba ACCS. Lalis i long.

E zot loter Mosyon Mr Speaker, e entervenan ki'n koz avan mo in dir i annan *FPAC*, pa trakase, sa bann demann *FPAC* ki annan zafer koripsyon byento i pou vini li. Nou pou met devan bann ka. Pa trakase sa zot.

Nou Mr Speaker lo sa kote latab, nou, nou santi poudir i annan en lenzistics ki pe ganny pase dan sa pei, tou kou kot i konsern bann vilnerab. Me selman bann ki o plase zot kapab ganny bann gro *allowance*, zot ganny gete avek bann sanzman ki vini, zot, zot ganny met dan en bol Mr Speaker.

Me pou malere li menm li, letan li i ganny afekte, napa personn ki pou pare pou mont devan pou vin dir se nou lo sa kote latab poudir be vwala be i mal.

Si en dimoun son *take pay* ti R10 mil ekek, letan ou'n fer ou sanzman ou'n met li anba en lot kad administrativ mon krwar akoz Lalwa i kler anba *Employment Act 49 (1)* se ki ou bezwen donn li son *dues*, ou pa kapab fer li *less favourable*. Sa i enn.

Dezyenm pwen Mr Speaker, ki mon anvi tous lo la mwan se letan zot in vin o pouvwar 2020, *ok*, *Desizyon* pou fer en Korporativ i anliny avek Lalwa, *ok*?

E letan ti konmanse ti annan 100 ekek travayer. E anba programm *IMF* ti dir nou ki nou bezwen redwir nou *wage to GDP ratio*; savedir degrosi *payroll* Gouvernman e se la ki nou ti bezwen pran sa bann dimoun, ki dayer si nou pa ti fer li. Bokou ti pou lo semen, ti pou napa en lanplwa.

Nou Gouvernman in pran en responsabilite e fer Korporativ pou kapab anmas sa 100 ekek dimoun.

E byensir letan sa in ganny formen Mr Speaker, in annan bann demann ki'n vini avek bann lezot antite pou ganny servis sa Korporativ. Be letan demann nou konn byen poudir *supply and demands* letan ou annan demann ou bezwen annan *recruitment*.

E letan mon tann serten Onorab i dir 90 poursan Bidze Korporativ i al pou pey saler,

be annou servi en pe nou lespri silvouple. Be ki kor fonksyon en Korporativ e lekel son kor zouti li? Se imen ki bezwen travay. Se sa *cleaner, what do you expect*?

90 poursan menm si ti 100 poursan pou pey saler dimoun ti pou fer sans, akoz son kor biznes se sel lekspertiz sa travayer. Sa son kor *function* li.

So ki ou espekte kote plis son larzan pou ale. Nou bezwen reflesir ler nou fer serten komanter Mr Speaker.

Dezyenmman, avek travay ki Korporativ ti pe fer, ki ti pe fer byen son travay Mr Speaker sa bann letan, mon kapab dir. E se la kot menm biznes prive ti pe rod servis sa Korporativ. E se la osi ki ti bezwen *recruit* ankor.

Letan mon get liv, Mr Speaker i dan liv sa en Rapor Oditer Zeneral. Sete an 2021 ki Korporativ ti konmans vwar bann abes dan son reveni fas avek servis ki i ti pe donnen.

Sa pa ti anba nou *watch* sa ti anba *watch LDS*, akoz nou 2020 nou pa ti o pouvwar, *ok*? Ti desann sorti 5.7 milyon e in ariv 4.5 milyon 2022. Akoz sa? E letan mon pe get dan rapor i dir poudir, bann antite ki ti pe letan zot in konpran poudir lentansyon Gouvernman se ferm Korporativ, zot ti annan en lensertitud, alors zot pa ti

renew contract avek Korporativ pou eksport zot bann travayer se zot. Zot ti plito rod zot travayer.

Eski sa pa ti kapab ganny dir bomaten avek *panel la poudir*, zot vin vann nou en keksoz ki parey kan dan rapor i kler?

E letan ou dir poudir par serten Onorab lot kote i vini i dir nou, ti napa okenn dernyen *AGM* ti kan? Dernyen *AGM* ti 2019 anba nou ladministrasyon. 2020-2021-2022 ti anba lot ladministrasyon. Minister Finans ki responsab Korporativ.

Akoz li pa ti dir be ou pa ankor fer *AGM* al fer *AGM*. Ti anba zot *watch* sa me ser ami.

Annou aret vin krwar zot pe vin penn nou konmsi nou ki pa'n pran nou responsabilite. Nou, nou ti pran nou responsabilite.

Lot pwen Mr Speaker, pa akoz ou pa kontan en dimoun ki ti lo latet en lorganizasyon, ki ou bezwen pran li detri li e detri tou sa ki son zalantour, tou son lanvironnman. I pa mars koumsa sa. I irresponsab lo zot par konman en Gouvernman pou fer sa.

Zot dir Sesel pou tou son zanfan, konmdir msye mon krwar Sesel pe touy tou son zanfan.

Lot pwen Mr Speaker, nou bezwen rekonnnet poudir

cleaners i annan en valer pou li zwe. Letan mon vin la, mon pran sa menm Lasamble. Letan mon vin la granmaten mon ariv la granmaten, akoz mon reste en pe dan ovan, mon ariv la ennler dan 7 er edmi premye keksoz mon ouver laport ler ou antre laba dan *Caucus room* se nou vvar en *cleaner*.

Ou konnen keler in ariv la li? Keler in kit se li pou li ariv la 7er bomaten? Nou pa mazinen tousala? Avan nou, nou vini sorti en bon loder dan *room*, nou vvar i prop kot nou pe marse i prop, akoz si i ti sal zot ti pou konplent. Me nou pa mazin zefor ki sa bann dimoun i fer?

Pourtan zot pe ganny en saler, mwens ki R10 mil sa bann dimoun, mwens ki R10 mil. E ozordi nou konplent, akoz i annan ki pe ganny gro saler zot pe kraz, sa bann *cleaner* konmsi sa bann *cleaner* bann dernyen dimoun. Ki pa akseptab.

Mr Speaker, mwan osi mon bezwen rekonnnet poudir dan sa travay i annan keksoz ki pa pe al aziste. Nou dan en pei demokratik ozordi nou'n ganny en Komite *Stage, Chief Secretary* in vini in donn son bout, Finans in donn son bout. Me osi i annan en lot bout osi nou ti ava kontan konnen.

Menm si zot in dizourd, zot in *dissolve*, zot in *repeal* sa *S.I* pou tir Korporativ. Be Korparativ ti ava kontan ganny en *say*. Pou dir ki mannyer ti pe fonksyonnen ki son bann problemm ki pe pas avek, ki son bann defi.

Akoz ki i pa kapab vin devan, pou defann son lekor pou dir. Mwan mon pe dir mon pa pe dir retourn Korporativ mwan. Mon pe dir sor bann travayer ki anba korporativ ki'n ganny *less favourable* akoz kondisyon *goalpost* in sanze letan zot ti anba Korporativ e zot in transfer anba en lot ladministrasyon. Sa ki nou problemm isi lo sa kote *US*. Sa ki nou pe demande pou aranze e fer sir.

E ou konnen ki pe arive la Mr Speaker? Mwan mon'n koz ek serten sa bann *cleaners*, akoz dan tou distrik i annan sa bann *cleaners*, ok? E *mind you* bokou sa bann *cleaners* zot en bann manman i annan bann fanmir annan lakaz. E bokou plizyer zot politisyen, pe al kommans pas devan laport sa bann *cleaners* la. Pe al rod zot vot, pe al rod zot sipor. I bon pou note sa.

Serten landrwa travay apre ki sa bann *cleaners* in perdi sa R1500 ki zot sipoze gannyen, ki zot ti dir zot pou gannyen tou, i pou al avek i pou *export* sa saler pou zot al kot zot sipoze ete laba; i dir zot

nou ava donn ou R500. Sorti R1500 in perdi, ou pou donn li R500 me selman sa ki nou pe vvar se ki i annan plis travay ankor. Onorab Loze atraver ou Mr Speaker in nonm 21 lofis.

MR SPEAKER

10 minit Onorab.

HON EGBERT AGLAE

Be i annan Mr Speaker, ki pe ganny rente la 2,3, 4 fwa plis pou mwens larzan. Eski i annan nou la anndan ki ti pou kontan?

Pou terminen Mr Speaker, mwan taler mon ti anvi demann avek *Chief Secretary* ouswa PS, eski si ler ou pe ganny R50 mil ou - mon pe met li - pa pe dir pe ganny 50 - si ou ti pe ganny R50 mil, kot ou ti pe travay i dir ou be nou bezwen tir ou laba pou anvoy ou laba, (akoz pa mwan ki pe kree sa *disturbance*, se Gouvernman ouswa sa antite in deside) mon pou donn ou R30 mil kot ou pou ale. Ki mannyer ou ti pou santi ou? Ou ti pou dakor, ouswa ou ti pou sorti ou ti pou kite ouswa al rod en lot plas travay.

Mon pa krwar poudir zot zot ti pou dakor. E se sa ki nou, nou pe lager lo sa kote, se pou annan en kondisyon ki ti ganny *set* ki devret ganny adere e mars avek e pa fer personn perdi larzan.

Akoz ler ou'n donn li 10 poursan la, me la ou'n fini pran ankor 20 poursan ek li.

Avek sa Mr Speaker, mwan mon santi poudir i bezwen annan en konversasyon, pou re aranz sa bann dimoun ki pe ganny defavorize. Mersi.

(APPLAUSE)

MR SPEAKER

Onorab Larue.

HON FLORY LARUE

Mersi Mr Speaker. Mr Speaker, nou'n tann nonm rapor Oditer Zeneral an relasyon avek sa Mosyon ki devan nou e kler Mosyon i demande pou nou *quash* sa S.I. 106 2023, ki fer ki nou pou retourn dan sa sityasyon ki nou ti ete avan.

Dan Rapor Oditer Zeneral ki mon annan en kopi avek mon sa enn 2022, lo paz 69 nou annan, *The Special Audit Seychelles Cleaners Corporative* ki pou peryod 2020- 2022. Nou pou skip enn de paz, nou pou al lo paz 72 e nou pou gete ki rapor i dir nou an relasyon avek lobzekatif prensipal sa Korporativ.

I dir nou ki zot pou pran responsabilite netwayaz dan bann biro, batiman ek lezot propriete ki'n ganny idantifye par Korporativ, pou garanti en o nivo lapropte.

Zot pou angaz dan lezot aktivite ki lye avek netwayaz biro, batiman ek lezot landrwa, pou enkli kot i annan bokou lapousyer e netway bann lafnet lo nivo endistriyel.

Zot pou servi metod netwayaz ki anliny avek prensip netwayaz nasyonal e enternasyonal. Zot pou minimiz lenpak ki kapab arive lo lanvironnman ler zot pe servi bann prodwir netwayaz e ki mannyer zot ganny zete.

Zot pou servi bann metod netwayaz ki minimiz lenpak lo lanvironnman.

Zot pou promot langazman ek kanmaradri ek solidarite dan korporativ pou promot e ankouraz devlopman.

Zot pou prepar e ranforsi tou manm lo tim pou zot kapab pran plis responsabilite, pou zot devlop man profesyonnel performans e maksimiz nivo prodiktivite.

Zot pou kree en lespri *profitabilité* ek varyabilite finansyel, pou permet korporativ vin pli endependan.

Sa i dir nou bann lobzektif ki sa korporativ i sipoze annan. Nou'n ganny en pe listwar lo Korporativ i ti gannyen formen an 2009 atraver sa S.I e ladan i mansyonn sa group dimoun ki ti pour un sa korporativ.

Mr Speaker, nou bezwen an menm tan regarde kisisa en Korporativ.

Nou tou nou konnen ki dan sa letan - nou'n ekout en kantite dimoun in koze bomaten - Korporativ li i endepandan avek Gouvernman.

I en group dimoun ki'n form ki'n vin ansanm e anrezistre anba *Corporative Act*, pou zot form en group e sa group i sipoze anmenn en benefis pou zot tou letan zot fer sa groupman.

Souvan bann Korporativ i ganny formen pour ranpli en bezwen e i en bezwen zeneralman i benefisyen gran group dimoun e ki anmenn en lavantaz pou en kominate.

En Korporativ i anmenn en stati egal pou tou son manm. I annan en *membership* ouver, tou dimoun i zeneralman kapab *join* sa zot anmenn menm lanvi.

I zeneralman anmenn en prodwir ek en akse ek en servis. I anmenn souvan osi en benefis sosyal. I osi en fason ki soutenir i sipoze soutenir en biznes anmenn *sustainability* pandan letan. I fasil pou formen. I fasil pou konpran son fason zerans e i anmenn en group dimoun ansanm pou deservi en bezwen.

Mr Speaker, eski nou kapab dir ki korporativ ki ti ganny formen anba S.I. 89 an 2009 anba reform restriktirasyon ekonomik Gouvernman US sa letan, in fer in akonpli son bi, letan in pran en group dimoun in met ansanm e donn zot zot laliberte, pou kree loportinite pou zot lekor.

Mr Speaker, dan deba spesyalman avek dernyen entervenan avan mwan, in dir bi prensipal ki zot pe lager avek sa demann pou *quash* sa S.I se pou fer se ki sa group dimoun ki zot saler ki zot ti pe gannyen avek Korporativ le 31 Desanm 2023, i pa parey letan zot ti ganny re abzorbe dan Gouvernman an 2024.

Mon krwar bomaten teknisyen in eksplik nou plizer fwa. Me selman kekfwa mon ava repeete. Lefe ki nou'n dir ki deba pou *quash* i prensipalman lo lefe ki enserten group dimoun in ganny defavorize.

Nou ti ganny dir ki letan korporativ ti frenmen ti annan 671 dimoun. Deza Mr Speaker, nou'n byen konpran ki S.I. ki ti permet pou korporativ annan zis 500 dimoun, ki date ki S.I. 76 lannen 2010, i dir ki zot pe tir sa *figure* ki ti annan ti 250 avan, ki ti ganny entrodwir an 2009 letan i ti ganny formen. E zot ti met li 500.

Deza Mr Speaker, letan i ti fermen, i pa ti an konformite avek Lalwa. En Korporativ ki'n ganny anrezistre pou *manage* son lekor. I pa ti an konformite ek Lalwa dapre son S.I. ki ti permet li annan ziska 500 dimoun.

Me letan zot ti fermen zot ti annan 671 dimoun. E nou'n ganny dir ki sa group dimoun in ganny en group dimoun dan sa sif in ganny defavorize, akoz zot saler pa ti parey.

Me nou'n ganny dir bomaten ki dan sa group ti annan en pti group spesifik e ladan nou koz aepre en 100tenn dimoun 128 dimoun ti pe ganny en *allowance* R1500 an plis, lefe ki zot ti pe ganny menm saler avek tou larestan bann *housekeepers*, zot zot ti pe travay 7 er - midi avek sa saler ki i egal avek lezot e an plis zot ti pe ganny en *allowance* R1500.

Nou'n ganny dir ki sel rezon ki zot pa pe ganny zot saler parey zot ti pe gannyen anba Korporativ ki li menm li i pa ti konformite ek Lalwa akoz i ti annan plis ki 500 dimoun letan i ti fermen, i ki zot pa ti kapab eksplike ki mannyer saler ti diferan ek lezot, pou sa pti group dimoun.

Mr Speaker, i pa konmsi sa madanm zis zot in vini zot in deside pran en desizyon e sanz lapey. Zot dir ki zot pa kapab vwar leksplikasyon,

akoz en sertern group dimoun zot saler i diferan e ki mannyer zot pou kapab abzorb zot dan Gouvernman, si napa en leksplikasyon kler, ki sorti kot sa antite ki separe, pou ganny re abzorbe dan Gouvernman pou fer li kler akoz zot saler i diferan.

Si non, sa ki sa madanm ti dir zot pou pran zot avek zot saler sa ki Gouvernman in fer. In pran zot avek saler ki zot ti anploy anba la dapre zot laranzman. Me non pa en benefis an plis, ki napa en leksplikasyon e nou pa konnen ki mannyer anba ki kriter ki zot ti ganny sa larzan an plis. Se tou ki diferan Mr Speaker.

Napa en diferans ekse ki nou pe donnez avek sa larestan, akoz i reste en lot group dimoun la ki zot pa pe koz lo la. Sa 543 ki zot zot ti pe konplet zournen avek zot saler zot, zot zot pa ti gannyen sa extra.

Alor i kler ki zot pe defann en pti group dimoun dan sa 671 letan Korporativ ti frenmen e i pa fer sans zot deba. Letan zot dir ki promes ki ti ganny fer ki dimoun pou ganny abzorbe avek zot saler i pa korek. I pa fer sans sa deba Mr Speaker. Akoz personn pa kapab eksplike kote sa R1500 an plis i sorti.

An plis ki sa Mr Speaker, nou ganny dir ki letan *panel* ti

vini bomaten ki *Board Korporativ* pa ti vin ek zot.

Mon retourn dan rapor Mr Speaker, lo paz 90 anba *Methodology* i dir nou byen kler ki ti annan *entry meeting* ki ti ganny fer avek CEO e *Chairperson of the Corporative Management Committee, Senior Officer of the Corporative Head office to understand the process and system in place. This was followed up with interviews, correspondences, document review and queries with staff of the corporative.* Sa dan odit.

E ti also annan en *exit meeting* ki li ti ganny fer an Me 2023, e Rapor Oditer Zeneral ti ganny mete devan zot e zot ti ganny sans pou fer zot komanter e tou komanter ki'n ganny donnen i enkli dan rapor.

So Mr Speaker, lo kote oditer, e sa bann sif ki dernyen entervenan vin avan mwan in baz prensipalman tou son deba lo la, i sorti dan Rapor Oditer Zeneral. E li menm li ki'n demann nou akoz zot bann manm Korporativ pa ti la. Me solman dan odit tou sa bann lezot *discrepancy* ki nou'n koz lo la i dan odit.

E sa bann dimoun ti *aware of it.*

MR SPEAKER

10 minit Onorab.

HON FLORY LARUE

Alor Mr Speaker, mon ti a kontan dir ki nou pe ganny ammennen lo en *while goose chase* lo bann pwen ki vreman minim letan nou pe gete i annan 671 dimoun ki *involve* dan sa sityasyon. Me nou pe fer *a big mountain out of it.*

Nou pe get zis 100 dimoun e i pa kler ki mannyer sa restan 540 ekek dimoun zot zot merit ganny en saler, en lot group i ganny en lot, letan zot tou zot sorti dan menm Korporativ.

Mwan mon pa pou kapab siport sa Mosyon pou *quash* sa S.I Mr Speaker. Mersi.

MR SPEAKER

Mersi. Onorab Andre.

HON CLIFFORD ANDRE

Mersi Mr Speaker. Mr Speaker, sa Mosyon devan nou pe demande ki nou *quash* sa S.I. - en S.I. annefe ki'n fini pran lefe depi le 01 Zanyye.

Mr Speaker, letan nou gete, mwan mon konsernen letan nou get ki savedir en Korporativ, se sa rezondet mon kestyon, ki mon ti demande bomaten. Korporativ i dir ou, "*a corporative is defined as a user owned and controlled business from which benefits are derived and distributed equitably on the basis of use or as a business owned and*

controlled by the people who uses its services.”

Savedir Korporativ, i devret ganny kontrole e benefis ki Korporativ i gannyen i devret ganny partaze avek manm Korporativ.

Mon sir si nou demann sa bann *cleaners*, bann manm sa Korporativ *Cleaners*, si zot en manm, manke i annan formalite ki'n pa'n ganny *comply* avek e zot pa konnen si zot en manm.

Si zot in ganny benefis, mon asire zot pou dir ou zis zot in ganny zot saler e zot pa'n ganny okenn benefis.

Alors letan nou gete, Mr Speaker, nou vvar ki Gouvernman in enzekte larzan dan en Korporativ ki li i pa manm sa Korporativ. Eski sa i byen? Non. I pa devret mars koumsa.

Alors letan Gouvernman *LDS* in vin o pouwwar anba direksyon Prezidan Ramkalawan, nou bezwen get en pti pe bann keksoz ki pa pe mars byen, akoz lentansyon sete pou fer pli byen. E nou pe fer pli byen la.

I enportan ki bann dimoun ki ti Korporativ, oubyen bann *cleaners* ki dan Korporativ zot konpran sa laspe, akoz Gouvernman pa ti pou kapab kontinyen donn larzan e ki definitivman - Akoz sa larzan la Mr Speaker, i

larzan *taxpayers*, mon larzan, ou larzan, larzan sa manm ki pe dir ki pe rod lentre sa dimoun.

So si nou gete i annan mwens ki 100 dimoun an 2020, letan rapor 5-hourti, oubyen zot ti pe selebre 10 an, kot zot ti dir poudir sa *timeframe* zot in ganny sans negosye en *5 hour shift to a 8 hour shift. But is this fair* akoz pa zot tou ki ti benefisy sa.

So si ou en manm korporativ, benefis i devret al pou zot tou. Pa zis pou en pe.

E mon ti demann sa kestyon bomaten, pa'n ganny reponn, akoz e ki mannyer ti ganny fer pou swazir sa 128 ki ti ganny ganny sans benefisy avek 8 er -midi e non pa lezot? Lo ki baz? Ki prensip?

E aparaman sete pou zot sa bann dimoun benefisy sa, ki zot kapab al travay ganny en pti pe plis larzan. E kot zot ti al travay, zot ti al travay avek Korporativ menm ankor.

Savedir zot ti'n kapab travay 7 er ziska 3 er. Akoz si ou travay 7 er ziska midi dan Korporativ e ou sipoze al rod en lot - parey nou dir konmela – *survive*, me selman ou pe rod sa *survive* kot ou ti sipoze travay ziska 3 er?

Ou pe ganny en *survive* tou ou la. Ki mannyer i apele? Labi Mr Speaker! E labi se larzan *tax payers*, kot mwan

osi mon pe travay e sa zardinyen ki pe travay dan Gouvernman, li osi i pe fer son kontribisyon - pa zis dan Gouvernman, me i pe travay dan prive i pe fer sa kontribisyon. E alors son larzan ti bezwen neseserman ganny vwar kote ki keksoz pe fer byen ou mal.

Mr Speaker, mwan letan mon gete, i annan - nou'n koz lo 5 milyon zot dir pa bokou larzan. Mwan mon krwar 5 milyon i bokou larzan.

E si ou kapab fer en *saving administratively* - pa saler parey in ganny dir bomaten - *administratively* nou pe fer larzan reste, oubyen larzan ganny byen depanse par Gouvernman. Se zis en Gouvernman responsab Mr Speaker, ki fer sa kalite analiz.

E ki fer sir ki letan in fer en analiz parey, i rod fason pou li fer sir ki i remedye sa bann sityasyon ki annan serten *anomaly*.

CS in dir nou bomaten sityasyon in ganny mete, konmsi en *right* - konmsi kot ti mal nou'n fer li vin byen. E sa i enportan, akoz i pran en CS ankouraze konman Mrs Mohideen, annefe nou'n NYS ansanm, nou'n *Polytechnic* ansanm. So, i pou en dimoun ankouraze pou pran sa bann desizyon e bann desizyon *tough decisions*.

E li letan nou'n koze, i dir mwan poudir in eksplik sa bann dimoun ki sityasyon ki zot ti pe al atraver.

Alors i enportan pou nou - nou konpran dan en sistem kot ou pou eksplike pou annan dimoun ki pou aksepte sa leksplikasyon, me i normal ki i annan ki pa pou aksepte sa leksplikasyon e i pou rod bann rezondet par deryer.

Me selman ki nou bezwen gete dan en pei - e se sa demokrasi, demokrasi se mazorite - *the majority prevails*. So si mazorite i santi ki zot in ganny en *fair deal*, alors sa desizyon i ganny pran.

Me sa pa anpes zot ki santi ki zot pa'n ganny *fair deal* pou vin devan e anmenn zot konsern devan. E zot konsern i a ganny adrese.

Mr Speaker,
Gouvernman annefe
taxpayers money in ganny
egzekte dan peyman
konpansasyon to the tune of
R24.4 milyon.

Alors tou bann konpansasyon, tou bann *dues* in ganny peye. I enportan pou fer sorti Mr Speaker, ki letan ou ferm en konpannyen, e tou *dues* i ganny peye, ou pa kapab al on the same terms and conditions.

You cannot go on the same terms and conditions. E i enn bann novo kondisyon ki ganny mete akoz tou sa ki ou

ganny drwa, i ganny peye pou ou.

I irresponsab pou Lopozisyon vin dir nou ki poudir *terms and conditions salary* pa'n ganny *complied with*. Akoz *it's new conditions* ki ou pe al lo la. I ti kapab ganny peye mwens ki i ti pe ganny peye avan. Akoz in fini pas sa faz kot sa *dues* i ganny donnен.

Mr Speaker, mon konnen ou pe al dir mwan mon pe fer 10 minit. Mon pa pou long, me mon konnen mon'n fer sorti bann pwen ki neseser ki enportan, e ki bann *cleaners* zot menm zot bezwen gete si zot in ganny okenn benefis avek sa Korporativ ki ti pe ganny *subsidise* par larzan *taxpayers*.

Avek sa, mwan mon pa pou siport sa Mosyon, akoz mon pa vwar merit ladan e mon pa vwar merit senserman *from the bottom of my heart*. Mersi Mr Speaker.

(APPLAUSE)

MR SPEAKER

Mersi Onorab. Onorab Cosgrow?

HON WALLACE COSGROW

Mersi Mr Speaker. Bonn apre midi tou dimoun. Mr Speaker, atraver ou ler mon ekout Onorab Larue son lentervansyon, mon demann

mon lekor oli son sa leksitasyon pou defann pep Seselwa parey i ti fer dan Sizyenm Lasanble. E mon konpran ozordi akoz ti annan serten konversasyon pou ranplas li avek Onorab Bistoquet Mr Speaker.

Me selman mon kit sa la Mr Speaker. Mr Speaker, ozordi *LDS* dan Lasanble in troun sa deba lo sa Mosyon - sa deba lo sa Mosyon dan en konteks konmkwa poudir ti annan problem ek Korporativ, ti annan problem ek zesyon Korporativ, ti annan problem ek lafason ki bann *cleaners* ti pe travay, ler travay e tousala.

Me mon sipoze zot in pran *cue from Press Conference* Prezidan kot li menm li in donn en move direksyon lo ki ti pe arive dan Korporativ.

Me annou re set sa deba apre midi la, annou al dan vre rezondet akoz - akoz ki sa Mosyon in ganny anmennen.

Me avan mon dir sa mon annan serten *statement* mon ti ava kontan fer.

Mr Speaker, dan Rapor Oditer Zeneral *Special Report* lo *Cleaners Corporative* pa koz ni lo labi dan Korporativ ni menm lo *misappropriation* pran larzan ouswa *mismanagement* dan Korporativ.

(APPLAUSE)

HON WALLACE COSGROW

Mr Speaker, nou bezwen met li kler apre midi la. Se ki sa zafer ki ti annan en bann ki ti travay ziske midi en bann ti travay ziske 3 er ti annan menm lapey i fo.

(APPLAUSE)

HON WALLACE COSGROW

Mr Speaker, mon kapab konfirmen ki sa ki ti pe travay ziske midi ti ganny R7 mil 567 e bann ziske 3er ti ganny 9 mil 67 sou.

(APPLAUSE)

HON WALLACE COSGROW

Mr Speaker, e ler travay sa sa group dimoun ki zot pe koz lo la, ti ganny determinen par sa landrwa ki ti pe pran zot. Savedir si dan Minister X ti dir mon bezwen *cleaner* ziske midi *then* Korporativ ti anvoy *cleaners* ziske midi. Zot pe zis *mislead* sa Lasamble, *mislead* pep Seselwa e zot pe fer en deba ki ozordi pa fer okenn sans avek sa Mosyon ki *Leader Lopozisyon* in anmennen.

Now Mr Speaker, in ganny dir taler dan deba ki nou pe fer sa zis pou fer *cleaners* vot kont LDS, non Mr Speaker. Sa pa nou ki pou fer sa.

Sa in ganny fer successfully par zot Prezidan, ler i ti maltret *cleaners* dan son speech ki i ti fer. Pa nou ki pe fer. Zot in fini fer sa. Domaz zot ki'n fer pa nou. Ou konpran Mr Speaker?

So zot deal avek zot zafer zot menm al eksplik *cleaners* ler zot pas devan laport sa bann dimoun. E si parey Onorab Gill in dir i fer zot foulkan, sa pa nou problem Mr Speaker.

(APPLAUSE)

HON WALLACE COSGROW

Now etabli vre rezondet sa ki *Leader Lopozisyon* in anmennen ozordi. Sa Mosyon Mr Speaker in ganny baze lo entern lazistis sosyal, kot nou annan nou en group dimoun ki pa neseserman byenneze ganny gro saler parey serten nou isi dan sa Lasamble ouswa serten dimoun.

I malere Mr Speaker ki ozordi nou annan nou en group dimoun dan Lasamble, ki benefisyen gro saler allowance avek bann benefis lafen lannen lafen term, ki ozordi zot pa kapab konpran akoz nou bezwen aziste saler en *cleaner* R1000 - R1500 ki zot in perdi.

Be ki mannyer konmsi nou'n perdi rezondet, konmsi?

(APPLAUSE)

HON WALLACE COSGROW

Nou bezwen konpran Mr Speaker, poudir sa bann dimoun - sa bann dimoun ti ganny promet dan en *meeting* ki poudir zot kondisyon pa pou sanze. So ler ou fer Lalwa pou *repeal* sa Korporativ ou pa kapab fer Lalwa apre ler ou re anploy zot. Vre zot in ganny fer *redundant* vre novo term.

Me kondisyon sete kit zot pa pou ganny en term mwen favorab, ki ozordi - *I mean* ki dan Korporativ zot ti pe gannyen.

Bomaten mon'n fer le pwen Mr Speaker, se ki eski Minister Finans avek *DPA or Public Service Bureau* konmela, zot ti fer en legzanmen - ti annan zot 1 an en pti pe plis ki 1 an, zot ti konnen zot pou ferm Korporativ - eski zot in fe en legzersis konparatif, pou get striktir saler korperativ ki dayer i tonm anba regar Minister Finans; pa blye get striktir saler Korporativ e get striktir *housekeepers* dan *housekeepers cadre* anba *public service*.

Si zot ti fer sa legzersis, zot ti pou vwar petet i annan serten *allowance* ki zot pa ti pou kapab *merge* avek donn sa bann dimoun ler zot antre dan *public service proper*.

Si zot ti fer sa legzersis zot ti pou bwar bann *anomaly*

ki zot in vin nonm nou bomaten la. Zot ti pou vwar e zot ti pou kapab adrese. Zot ti ava fer Polisi, zot ti ava revwar *cadre housekeepers*, e zot ti ava kapab onor sa promes ki zot ti fer avek bann *cleaners* dan sa *meeting* an Desanm.

Me malerezman Mr Speaker, zot pa'n fer, e i pa lafot bann *cleaners* ozordi ki si - i pa lafot i pa zot responsabilite Mr Speaker - ki si ozordi Korporativ in deside fermen e zot, zot bezwen *worse off*.

Non, i pa zot lafot in fermen. Alors i drwa - Gouvernman i drwa zot i bezwen fer sir ki letan i re anploy zot e zot in reganny anploye sorti dizour a lannmen. Dan *public service* i konte konman i pa neseserman en *break in service*. Akoz le 31 Desanm zot ti aret korporativ zot in antre avek Gouvernman.

So i drwa Gouvernman pou fer sir ki zot *terms and condition* i reste parey. Menm si petet i annan serten teknikalite Mr Speaker, nou pe koz lo en group dimoun ki zot saler i bokou, bokou pli ba.

Nou'n perdi rezondet isi dan sa Lasanble. Akoz nou saler i sepa konbyen, nou ganny benefis tou lannen tou le lafen term, preznan nou blye preznan nou kommans koz kont

bann dimoun ki mwen favorab ki nou? Ki pli vilnerab ki nou?

Be *arr* Mr Speaker, si nou annan en Lasanble ozordi ki koumsa, *then* i pa en Lasanble ki reprezentatif of Lepep – e pep Seselwa, *then* sa Lasanble i devret dizourd re fer *fresh election!*

(APPLAUSE)

HON WALLACE COSGROW

Zot in peri rezon Mr Speaker! Mr Speaker, mon pwen i lo prensip fondamantal. Parey mon'n dir taler se ki nou pa defavoriz dimoun.

Ler nou pe sanz sirtou Gouvernman nou annan en responsabilite. Nou pa defavoriz sa bann dimoun. I en group dimoun i en group dimoun - i en group dimoun signifikan, ki ozordi zot annan zot fanmir, zot annan zot det.

Konmsi nou kapab zis mazinen ou leve bomaten i dir ou koumsa ou saler in koupe par R1500 - R2000? Ou ti pe viv, vre parfwa ou pa kapab mentenir ou standar, me solman ou ti pe viv lo en saler kot ou ti pe kas li menm pa ase pou kase Mr Speaker.

Ou ti pe kas li pou pou ou *loan*, organiz ou lakaz pou ou zanfan e tou sa. E en sel kou i dir ou ou perdi sa R1500 - R2000 ki ou ti pe servi pou pey ou lakaz, ouswa pey ou *loan*. Be ou kapab pa konpran sa

bann dimoun latet i fatige. Latet i fatige Mr Speaker!

E se pou sa rezon dan mon ti koz lo sor bann *cleaners*. E mon ti dir donn bann *cleaners* en konpansasyon omwen R5000 pou sa soufrans e sa martir ki zot in fer zot. E mon pe demande osi ki Gouvernman atraver Prezidan i fer *public apology* avek sa bann *cleaners*, pou sa soufrans ki zot in pas ladan Mr Speaker.

(APPLAUSE)

HON WALLACE COSGROW

E mon pe sey konpran Mr Speaker. E la mon oule met sa dan en konteks sityasyon ozordi. Mon pe sey konpran, zot fer promes parey sa promes ki tou zot bann kondisyon ti pou reste parey, zot pa onore.

Me solman i pa sirprann mwan. Mon ti krwar sa enn zot ava onore i sirprann mwan Mr Speaker. Akoz en ta promes ki zot in fer zot pa'n onore. Kantite promes.

E la mon pou al dan sa zafer bann promes ki zot ti fer kanpanny eleksyon. Met larzan dan pos Seselwa, fer desann pri lavi. Ozordi Mr Speaker, pri lavi i bokou pli o ki i ti ete avan 2020! Bokou pli o.

E ozordi Sesel pa *feature* lo lalis bann 10 pei pli ris dan

Lafrik. Akoz Mr Speaker?
 Akoz kou lavi anba Gouvernman LDS in pet plafon!

(APPLAUSE)

HON WALLACE COSGROW

E sa pa mwan ki dir, en rapor ki ganny dir sa Mr Speaker.

Ozordi pri delo elektrisite in ogmante. Sa bann menm *cleaners* ozordi ki ou'n koup zot saler, ou'n koup zot *allowance* la, ou'n fer monte zot pri bil elektrisite ek zot bil delo, ou'n fer monte sa pri marsandiz, ki zot pou fer?

I pou al kot *welfare* Mr Speaker i pou dir li i pa kalifye. Sa dimoun zis i tonm lanmenm i vir an ron i tonm dan dezespwar.

Mr Speaker, ou konpran akoz prezan nou dir sa deba i en deba lazistis sosyal. Napa nanryen pou fer avek sa bann zafer ki *LDS* pe sey dir depi bomaten konsernen sepa i annan *misappropriation*, Korporativ ti pe mal ganny zere.

E sa bann dimoun ki ti pe zer Korporativ ti napa zis en madanm, ti annan detrwa dimoun laba e sa bann dimoun i pran lofans ler zot dir sa Mr Speaker.

Akoz zot pa ti anmenn Korporativ la, bann dimoun ki ansarz Korporativ e sa bann dimoun ti ava vin eksplik zot?

Zot pa'n fer li ou konnen akoz? Akoz si zot ti fer li la, laverite ti pou sorti. E zot ti pou vwar ki poudir sa bann – (Mr Speaker mon pe rod sa mo pou mon pa dir lalang, ni mansonz) me sa bann lekonomi laverite ki zot pe vin avek la, en? zot ti pou kanmi avek e i pa ti pou tenir delo Mr Speaker. Akoz sa bann dimoun.

Mr Speaker, mwan mon annan lenformasyon, *ok*, ki poudir sa *debtors list* ki zot pe konplent lo la, en bon pe la dan se Gouvernman ki dwa, Minister Finans pa'n pey zot zot bann resi, zot bann *invoice* ki zot in *issue*.

Mr Speaker, pa zis sa, mon annan lenformasyon ki poudir Minister Finans ti tir larzan dan kont Korporativ, be sa pa ganny dir tousala ?

(APPLAUSE)

HON WALLACE COSGROW

Ou konpran? Zot ankor pe rode oli sa larzan ki Minister Finans ti tire Mr Speaker.

Ankor enn fwa parey letan mon ti fer mon sa mon ti dir sa zafer eksplozif. Personn pa ti demanti mon ziske ler Prezidan ti mont anler ti dir zafer eksplozif i annan en lakle avek *SPDF* akoz ti bezwen isi laba.

Me la mon *challenge* zot vin demanti dir mwan zot pa ti tir larzan dan kont Korporativ,

dir mwan koumsa poudir napa *invoice* Gouvernman ki Minister Finans pa ankor peye e i aparet dan *debtors list*.

Mr Speaker, ozordi lesansyel...

MR SPEAKER

10 minit Onorab.

HON WALLACE COSGROW

Mersi Mr Speaker, mon pe al konklir. Ozordi lesansyel parey monn dir i en deba lo lazistas sosyal. I en deba pou fer sir ki Mr Speaker nou pran ka avek bann dimoun ki mwen fortinen pli vilnerab dan sisyete.

E bokou nou bann *cleaners* i form parti bann dimoun ki ganny pre mwens larzan. Ki i annan mal si nou debat pou zot? Pa pou donn zot okenn nanryen ki zot pa merite. Pou donn zot en keksoz ki ti ganny promet avek zot.

En kondisyon travay, ki pa ti pou sanze e pa pou defavoriz zot ek zot fanmir.

Ozordi i malerezman zot in ganny defavorize e Mr Speaker, krwar mwan mon pe dir zot poudir bokou sa bann dimoun i dir 2025 *LDS OUT!* Mersi bokou.

(APPLAUSE)

MR SPEAKER

Onorab Monthy.

HON PHILLIP MONTHY

Mersi Mr Speaker. Mr Speaker, nou Gouvernman in souvan ganny dekrir par sa swadizan 10 sez plen la anndan, sorti dan sa parti minoriter konmkwa i en Gouvernman kanmaron ki i pran en desizyon, me ki apre i fer mars an ayer e retourn lo sa desizyon.

Me la Mr Speaker, Mosyon ki la devan sa Lasanble ozordi anmennen par zot *Leader* pe demande ki en *S.I.* ki'n sorti depi le 15 Desanm 2023 plis ki 3 mwan pase i ganny *quash*. An term senp. Savedir ki zot pe dir nou, zot pe dir nou retourn lo en desizyon ki'n fini ganny pran.

Me Mr Speaker, mwan pou mwan ler mon pe get sa swadizan Mosyon, be sa i pirman en Mosyon kanmaron Mr Speaker.

Si ozordi mazorite Manm la anndan i vot an faver sa Mosyon, i annan en sel keksoz ki pou bezwen arive. E se sa lentansyon Onorab Pillay ler in drafte son Mosyon. Sa ki pou arive se ki *Cleaners Corporative* ki'n ganny fermen an Desanm 2023, apre tout en prosesis antreprann par *Public Service Bureau* me Minister Finans pou bezwen retourn an egzistans.

E ki sa pou vedir Mr Speaker? Sa pou vedir ki bann *cleaners* ki'n fini *settle* anba sa nouvo kondisyon travay e ki satisfe ki mannyer sa tranzisyon in pase, pou vwar zot pe bezwen retourn anba sa ansyen fason fer, ki i pa ti forseman bann kondisyon ki ti pe valoriz tou bann *cleaners*.

Me plito zis en pti group privilezye e detrwa *staff senior* sa Korporativ, ki son CEO ti pe tous en pe plis ki R37 mil par mwan. Se sa ki Onorab Pillay i oule nou fer ozordi atraver sa Mosyon Mr Speaker

I oule ki sa pti *group* ki ti pe byen pase i kontinyen byen pase Mr Speaker.

Mr Speaker, an 2019 kondisyon travay sa bann *cleaners* ti sanze zot ti ganny demande pou travay 7 er - midi. Me lo menm lapey.

E en group ti ganny demande pou reste travay ziska 3 er e sa ti napa okenn kriter, ki ti ganny servi pou swazir lekel ki pou ganny sa privilegez. E sa ti kree bokou fristrasyon parmi bann *cleaners* Mr Speaker.

E sa ki enteresan, parey in ganny fer resorti, sa group ki ti pe travay ki ti ganny swazir pou travay ziska 3 er zot ti pe ganny en *allowance* R1500 an plis pou fer en travay ki zot ti deza pe ganny peye pou fer Mr Speaker.

E sa i ti en lenzistis anver bann lezot *cleaners*. Apre zot vin koz lo lazistis sosyal. Be oli lazistis sosyal pou sa group *cleaners* ki ti pe ganny defavorize avek sa desizyon Mr Speaker?

(APPLAUSE)

HON PHILIP MONTHY

Eski Onorab Pillay, konman sa Dirizan responsab, parey souvan dekrir son lekor, pe demann nou pou fer retournen sa bann lenzistis. Eski Onorab Pillay pe demande ki tou sa bann labi ki ti egziste pandan legzistans sa Korperativ, i ganny sa sans pou kontinyen?

Mr Speaker, sa Mosyon i trakas mwan. I trakas mwan akoz ler monn lir rapor Oditer Zeneral 2022 sapit 4 ki konmans lo paz 69 ziska 90, e ki i annan pou ti "*Special Audit Review of the Cleaners Corporative*" sa rapor i al an detay, lo tou bann iregalite ki'n egziste anba sa Korperativ. E ki ler nou pe koz iregularite, i vedir ki nou pa lwen avek koripsyon Mr Speaker!

E sa Mosyon i trakas mwan plis ankor, ler ou pran kont ki se *Chairperson* Komite FPAC dan Lasanble, ki son rol prensipal se kit en regar lo bann depans Gouvernman, pou asire ki *best practices* i ganny pratike pou anpeze ki

annan labi e koripsyon, li menm li ozordi i ignor konpletman Rapor Oditer Zeneral!

E en lot son Manm i vini i dir nou Rapor Oditer Zeneral napa okenn lenportans!

So andotmo i pe dir nou aboli sa pos Oditer Zeneral e les tou bann antite Gouvernman depans larzan parey zot anvi, menm si i annan labi parey ti egziste anba zot Gouvernman Mr Speaker.

Mwan Mr Speaker, se koumsa ki mon konpran sa Mosyon ki la devan nou ozordi.

Mr Speaker, *Cleaners Corporative* ti ganny kree an 2009 par en S.I, ki ti *S.I. 89 of 2009*, lo rekondasyon *IMF*. Apre ki sa Gouvernman *SPPF* - mon krwar i ti apel Lepep sa letan, ki son bann Manm la anndan pe tou kou dir nou ki zot sel opsyon pou Sesel, ki zot sel parti ki i annan leksperyans pou dirize, ti'n faid sa pei an 2008!

(APPLAUSE)

HON PHILIP MONTHY

Wi Mr Speaker, sa parti ki sel opsyon pou fer Sesel *fail* ti faid Sesel an 2008. E apre ki Misyon *IMF* ti'n fer resorti ki *wage bill* Gouvernman ti tro o e prenon kont touzour dapre rapor *IMF* - ki Sesel ti pe vwar li difisil pou repey son bann

det e kot rezerv *forex* ti'n preski zero, baze lo zot bann move Polisi Monneter, desizyon ti bezwen ganny pran, prenon kont ki pei ti'n faid pou retir sa fardo finansyel lo Gouvernman.

Sa S.I. 89 ti alor fer provizyon pou ki sa Korperativ i ganny kree avek le bi ki i zener son prop reveni, pou kapab soutenir son lekor olye depan lo en Bidze sorti kot Gouvernman.

E seksyon 5 ti fer provizyon ki sa korperativ i anploy en *maximum* 250 *cleaners*.

250 *cleaners* me zis 1 an apre zot ti fer sorti en lot S.I. ki ti *S.I. 76 of 2010* pou amann seksyon 5 e olye 250, me preznan pou met *maximum* 500 *cleaners* Mr Speaker.

E sa pwen Mr Speaker, i enportan pou note ki sanmenm sa Gouvernman kanmaron ki apel *US*, i fer en lot mars an aryer e al kont zot prop S.I.

Akoz la ler *Cleaners Corporative* in ganny dizourd, ki nou'n vwar? ti annan en *maximum* 671 *cleaners* ki ti anploye avek sa Korperativ Mr Speaker.

Sorti 250 ogmante pou vin 500 e pou fini kont avek 671, ki i al kont zot prop regilasyon ki zot ti pase Mr Speaker. Sanmenm sa en

Gouvernman ki annan leksperyans pou dirize sa.

E nou tou nou konnen akoz sa ti ganny fer Mr Speaker. Parey tou zot bann desizyon ki zot ti fer, sa ti bann desizyon politik pou anmas zot bann siporter *hardcore*.

Mr Speaker, *Cleaners Corporative*, ti ganny kree avek le bi pou redwir *payroll* Gouvernman. Me eski sa in arive pandan tou sa letan ki in egziste? Larepons i non Mr Speaker. Me tou le kontrer in arrive. Sorti 250 pou konmanse pou ariv 671 ler ti frenmen.

Eski sa Korperativ ti pe zener son prop finans parey ti ganny espekte ler i ti ganny kree? Repons i non Mr Speaker! Gouvernman ti pe bezwen depans plis *taxpayers money* menm si sa Korperativ ti swadizan pe ofer zot servis sekter prive.

Avek mank sipervizyon lo lafason ki sa Korperativ ti pe fonksyonnen, parey Oditer Zeneral in fer resorti dan son rapor, ti en reset ideal pou koripsyon Mr Speaker.

Tel parey in ganny fer resorti dan rapor, ki sa dimoun oubyen sa *firm* ki ti sipoze odit kont sa Korperativ, ti sipoze ganny swazir par Minis Finans. Me pa sa ki ti arive Mr Speaker.

Sa *firm* ki ti pe odit sa kont se li menm li ki ti la depi

konmansman, ki ti'n ganny swazir par Korperativ li menm mon krwar. Pa par Minis Finans parey Lalwa i fer provizyon.

E pa bliye osi, ki 53 poursan sa bann kliyan ki ti pe benefisyek sa servis, pa ti satisfe ek sa nivo servis ki ti pe ganny ofer.

E sa Gouvernman LDS Mr Speaker. Konman en Gouvernman responsab in deside antre e met en stop avek tou sa labi. E ler sa in ganny fer, napa okenn *cleaners* ki'n kapab dir, i pa'n ganny ofer en *expression of interest* pou zot kapab garanti en lanplwa anba novo kondisyon.

Napa okenn *cleaners* ki kapab dir ki zot pa'n gannyen, oubyen pa pou ganny peye zot bann *dues*.

Ler mwan mon'n ganny asire par sa de teknisyen ki ti la bomaten Mr Speaker, ki sa in arive, mon pa vvar okenn rezon akoz ki sa Mosyon i la devan nou Lasanble ozordi, apard zis pou vin fer politik bonmarse pou sey anmas vot detrwa *cleaners*.

Alors mwan Mr Speaker, konman en Manm Lasanble responsab, sa Mosyon ki la devan nou mon pou fer zis en keksoz avek, mon pou zet li anba. Mersi Mr Speaker.

MR SPEAKER

Onorab Porice.

HON DOYACE PORICE

Mersi Mr Speaker. Mr Speaker, sa Mosyon anmennen par Leader Lopozisyon Onorab Pillay, i enn ki vreman irresponsab.

E i enn ki zis pou fer politik bonmarse avek vant en group travayer. Mon santi ki pli ale nou nepli konnen ki nou anvi anmennen dan sa Lasanble, zis gaspiyaz letan. Zis parey sa pti baba, ki kriye tou lazournen akoz move size. Toultan i rod latansyon son paran. E ler i ganny son siset i arete.

Sa Mosyon i baze lo *Cleaners Corporative* ki ti ganny formen par ansyen ladministrasyon letan ki i Fon Monneter Enternasyonal (*IMF*) ti demann Gouvernman pou revwar son *wage bill* an 2008.

E la sa Korperativ ti ganny formen e ansarz par en madanm ki ti travay Lopital Sesel e sa ti Mrs Denis. Ti osi annan en *Board* ki ti ganny formen pou asiste.

Mr Speaker, mwan mon ti krwar ki ler en Korperativ i ouver son laport, se sa Korperativ i responsab tou sa ki neseser.

Me ki nou ti dekouver, se *taxpayers money* anba ansyen ladministrasyon ki ti pe ed sa Korperativ.

Mwan konman en madanm byen responsab e sa mwan mon konnen ki sa Korperativ ti pe ganny *rule* zis parey nenport ki biznes.

E Mr Speaker, i devret annan son prop finansman. Me ki mannyer sa in arive, i byen ki sa ladministrasyon in fer son premye anver zot pou zot kapab bouze.

Nou pa *taxpayers money* ki pou kontinyen pou plis ki 17 an. E mon santi ki sa ladministrasyon ki ti pe abiz *taxpayers money*.

Ladan menm Mr Speaker, sa madanm ki ti ansarz ki ti pe ganny en saler plis ki R37 mil 784 mil. Plis ki en Manm Lasanble. Ou kapab krwar?

Son asistan ti pe ganny R18 mil 286, pa blyi son *HR* 20 mil 735 ek *allowance* 10 mil 784. Nou kapab nonmen ziska bomaten.

Bann *cleaners* Sesel, fodre zot konnen tousala. Zot ti pe ganny en pti lapey, e sa ki ti pe ansarz zot ti pe ganny 4 fwa zot lapey.

Pa blyie sak manm *Board* osi ti ganny en *allowance*. En lofis ki ti kout Gouvernman 54 mil 775. Sa ou a dir mwan ti annan en bal. Zis parey bal dan simityer sirtou dan Lopital Sesel.

Kot materyo netwayaz ti ganny servi lanmen apre ozordi nou dir lopital i pi, i sal,

napa tapi, napa zorye napa, eksetera.

Alala Lepep Seselwa. Sirtou zabitan Baie Sainte Anne. Zot trouve kote nou larzan e materyo ti ale? E akoz tou sa bann keksoz dan lopital ti perdi? Apre zot anvoy tou blanm lo sa nouveau ladministrasyon.

Sa madanm kantmenm ti ansarz sa Korperativ, i ti osi pe debourye dan nou Lopital Sesel. Sa bann pov *cleaners* oubyen bann *housekeeper* pa ti konnen ki ti pe pase. E menm i fer mwan mazin sa madanm Baie Sainte Anne ki ti pe vreman konplent akoz i ti met li *supervisor*.

E ganny promet ki en *allowance* an plis. Me ziska Desanm 2023 nanryen pa'n donn li. Kot i vreman mal Mr Speaker. Pou ou ki sa travayer i plis nou bann madanm ki pe debourye. E zot ti pe mal ganny gete.

Ozordi Lopozisyon minoriter pe koz nou manman la deor, ki lafen ki napa ase pou met pou donn son fanmir, tou sord kalite zot dir. San realiz ki zot ladministrasyon ki ti pe fer soufer sa bann madanm.

Zis parey la konmela menm Mr Speaker. I annan madanm ki pe pas dan menm ben Edwar kot *Maison Du Peuple*. Kot zot ganny fer

travay zis lanmwatye zournen e ganny lanmwatye lapel.

Lekel ki pe fer soufer sa manman la deor? Se sa menm parti politik minoriter US. Wi Mr Speaker se zot menm! Ozordi mon vreman kontan ki ler ladministrasyon LDS in vin o pouvwar an 2020 en *survey* ti ganny fer kot 54 poursan lakonpannyen pa ti satisfer avek sa Korperativ.

E la sa ladministrasyon in pran zot responsabilite e en desizyon in ganny donne, pou return sa bann travayer dan en *full* lanplwa dan diferan sekter piblik e ferm sa Korperativ.

E mon pou felisit sa ladministrasyon LDS. Pou fer piblik konnen ki sa bann travayer ki ti dan Korperativ in ganny tou zot *dues*. Enkli sa ki ti responsab pou al dan lakour avek.

Depi Zanvye 2024 3 kar zot i dan lanplwa. Ki plis ki sa Mr Speaker? Avek en ladministrasyon responsab ki toulstan pe rod solisyon pou sa pei e bann travayer.

Zis pou fer piblik konnen ki apre ferm sa Korperativ, Gouvernman pe benefisyé par R5 milyon. Sanmenm sa Mosyon ki *Leader Lopozisyon* pe vin dir nou pou *quash* sa *S.I?*

Mon demann mon lekor, eski sa bann travayer pou bezwen al vann zot bann

assets ki zot in aste avek larzan konpansasyon, ouswa tann servis pou retourn Gouvernman sa larzan, zis apre sa S.I. i ganny quashed. E retourn Korperativ ankor?

Be non Mr Speaker, sa bann travayer i bezwen kontiny zot travay non pa retourn an ayer, zis parey *Leader Lopozisyon* pe demande pou fer. Zis parey ler zot ti dir nou pa ouver *Airport*, kennsel tou bann proze nasyonal, zis zot ti krwar ki ladministrasyon pou ekout zot, nou pou mars an ayer parey sa kanmaron *US* ki zot krwar ladan.

Mr Speaker, pou mwan konman en fanm ki pa krwar dan mars an ayer parey kanmaron *US*, mon pou vot kont sa Mosyon. Mersi.

MR SPEAKER

Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun. Partikilyerman bann dimoun dan distrik Mont Buxton.

Mr Speaker, Lopozisyon i konfize. I konfize pou la senp rezon ki zot in anmenn en Mosyon devan Lasanble Nasyonal, pou anil S.I. 106 ki ti sorti an 2023.

Si nou fer sa, i pou senpleman vedir ki *Cleaners*

Corporative pou re etabli parey i ti ete avan Desanm 2023.

E setadir tou sa bann larzan ki Gouvernman in pey sa dimoun ki ti travay avek Korperativ ki'n ariv en total sonm 29 4 milyon. A mon lavi i bezwen ganny rann si i retourn parey i ti ete.

Mr Speaker, i annan en keksoz ek parti minoriter i bezwen ganny li kler. E konpran mwan pou la apre midi. Sa desizyon pou ferm korperativ, i en Polisi administrativ nouveau ladministrasyon pei ki'n ganny en manda kler an *Novanm - an Oktob 2020.

Anba sa manda, *LDS* i determinen pou fer keksoz pli byen. Ki mannyer i pou fer? I pou retir labi e mank lefikasite kot i egziste, akoz koumsa pei i kapab mye envestir dan servis lenfrastruktir avek resours imen.

E sa i en prensip inversel ki pa nou ki'n evante. Nou senpleman anvi fer pli byen, kit sa pei pli bye ki nou ti vin zwenn e mon pa kapab konpran mannyer *United Seychelles* pa ganny li sa. I telman senp.

E ler nou fer sa Mr Speaker, nou pa zis fer me nou eksplik Lepep Seselwa ki nou pe fer. Nou a rapel ki depi an 2021, dan Diskour Bidze 2022, Minis pour Finans ti donn lendikasyon lentansyon

Gouvernman vizavi *Cleaners Corporative*.

E apre sa bann zofisyen Minister Finans, in fer de rankont avek zesyon ouswa *Management Cleaners Corporative*.

An plis ki sa, Biro Servis Piblik *Attorney Zeneral* e Minister Finans in fer ankor de rankont avek bann travayer Korperativ lo Mahe, Praslin avek La Digue.

Sa prosesis in dirize par par bann teknisyen dan Gouvernman. Sa in lekaM akoz ler politisyen i eksplik keksoz reaksyon piblik dirize par Lopozisyon i ki i annan lezot keksoz pe kasyet.

Sa desizyon pou ferm *Cleaners Corporative* i form parti demars pou asire ki *taxpayers Seselwa* i ganny valer pou zot larzan.

Ler Gouvernman pe sibvansyonn en lorganizasyon sorti en sonm R22.8 milyon an 2012 pou ariv 71 milyon an 2023, i enportan ki vo lapenn ki nou pe gannyen. Desizyon Gouvernman i kler. I oule anploy son prop *housekeepers*. Determin zot kondisyon travay ler ki zot travay e pey zot selon zot performans e zot lakantite erdtan travay.

Si nou *quash S.I. 106* 2023 ki i pou arive? Gouvernman in dir ki i pa pou

outsource servis netwayaz ankor avek sa Korperativ.

Erezman *US* napa mazorite dan Lasanble, akoz si i ti annan nou ti pou annan risk ki sa *S.I.* ti pou ganny *quash* e met lavi 658 dimoun an risk perdi zot lanplwa.

US in vwar in perdi largiman. Alor lo *Floor Mr Speaker*, zot sanz zot *tune*. E zot dir ki i merit Mosyon se pou asire ki kondisyon bann travayer pa vin pli de favorab ki avan.

Be si sa ti zot lentansyon - si sa ti zot lentansyon, se ki zot ti kapab fer, anmenn en Mosyon ki demande ki Gouvernman i asire ki anba sa novo programm redeplwayman bann *housekeepers* zot pa ganny defavorize ki en propozisyon konstriktiv. E nou san ezitasyon nou ti ava siport zot. Nou ti ava fer. Me zot konfize mon pa konnen ki zot oule.

Be i napa sa bann zafer defavorize. Akoz mon konnen poudir napa sa. Akoz mwan mon krwar dan parol *PS* Tamatave e CS Mohideen letan zot in koz ek nou bomaten.

Akoz mwan osi konn sa? Akoz napa en ansyen travayer Korperativ ki Parti *US* in reisi fer desann kot Lorloz avek en plakar parey zot ti fer Cascade dan sa nespes demonstrasyon apre lensidan le 7 Desanm.

Tou prosedir legal pou ferm *Cleaners Corporative* in ganny swiv - en prosedir ki'n ganny anonse inisyalman an 2021 e konplete an 2023.

Bann travayer in ganny loportinite adres dan *meeting* parey sekirite lanplwa term e kondisyon travay, zot saler si size zot *loan* avek labank eksatera. Gouvernman in promet en keksoz e in gard son promes; en plas travay pou tou dimoun ki anvi travay.

E la Mr Speaker, mon kapab di avek *US* ki parmi sa 658 *housekeepers* 615 zot in ganny re abzorbe dan servis piblik le zot in al travay avek bann lorganizasyon paraetatik ki ti pe deza anploy zot. E osi i annan ki'n al dan prive parey *tourism*. Sa i reprezent 93 poursan ki'n ganny re abzorbe.

Oli problem? Oli dimoun ki pe mor lafen? Oli manman ki pa konnen ki pou fer avek zanfan ki monn tann zot di depi bomaten? Tousala i bann fo lenformasyon.

E pa blye ki Prezidan ti dir nou dan son Diskour Leta Lanasyon, ki nou bezwen sorti konman en lenstitisyon enportan dan sa pei dan bann politik popilis. Annou koute enn fwa pou tou.

Mr Speaker, *US* i vwar li poudir in perdi largiman, pou konvenk Sesel akoz *Cleaners*

Corporative fodre i ganny re formen.

Alor zot in vin avek sa largiman pou met en *clause* dan *S.I.* ki ava dir ki bann travayer pa pou ganny defavorize.

Sa 8 *MNA US* ki prezan ozordi in konn tre byen ki *Cleaners Corporative* pa en antite Gouvernman, parey *SAA*, *Aids Council* ouswa *APDAR* ti ete ava ki zot ti fermen e zot in donn konman legzanp.

Prenon kont ki *Cleaners Corporative* ti pe fermen, i pa lozik alor pou promet okenn endividé menm saler ki nou ti pe gannyen avan ler ou pa ti konnen lekel antite egzakt ki i pe al ganny re deplwaye.

Donk zot in ganny peye zot tou zot bann *dues* konpansasyon, konze ki zot ti annan e apre zot in ganny re anplwaye lo novo term.

Par egzanp, si en dimoun ti pe al travay lopital li i pou ganny en *allowance* konman en *housekeeper* ki bann lezot lorganizasyon pa pou gannyen, akoz lopital i en landrwa ki i annan en risk partikilye ki vin avek.

E petet mon krwar nou ti'n merit Minister Lanplwa la, pou eksplik *US* ki'n deza dan Gouvernman. Be mon demann mon lekor ki zot in aprann dan sa bann letan ki zot ti dan Gouvernman? Ki

mannyer letan dimoun son kontra i fini avek en antite, apre i ganny anploye avek lot. Eski zot ti'n deza sezi sa konsep?

Non selman zot largiman pa fer sans, me zot pa'n dir nou ditou, ditou ditou, akoz fodre ki Gouvernman i re enstal *Cleaners Corporative*. Akoz? Mon'n ekout zot tou ki'n koze, napa enn zot ki'n dir mwan akoz depi loter Mosyon ziska dernyen entervenan.

Napa nanryen ki anpes zeson Korperativ reouver zot prop biznes. E rod biznes avek sekter paraetatik e osi sekter prive. Zot in deza pe fer li. E zot in kapab kolekte en reveni R5 .7 milyon an 2021 e R4.5 milyon an 2022.

Alor akoz zot pa kapab kontinyen fer ki zot bezwen *rely* lo Gouvernman pou ganny travay?

Alor Mr Speaker, mon ava termin lo sa largiman. Largiman *US* anmennen par Dirizan Lopozisyon pa fer sans, i pa fonde. I pa konvenkan, i pa realis, me zot in priy dan politik popilis.

I pa baze lo fe avek lanaliz e se pou sa rezon ki nou'n anmenn bann teknisyen bomaten pou re edik zot ankor, lo ki mannyer sa bann keksoz i marse. E si mon ti en ansenyan, mon ti pou'n *fail* loter Mosyon dan son legzanmen matematik.

Sel keksoz ki *US* pe lager Mr Speaker, se ki depi inisyalman zot in servi *Cleaners Corporative* koman en antite pou fer politik dan servis piblik.

E la zot santi poudir zot pe perdi sa lavantaz, alor zot pe re trenn nou pou fer re anmenn *Cleaners Corporative*, me mon dir zot ankor enn fwa avek sa i en desizyon administrativ ki nouveau administrasyon in pran; en administrasyon ki annan manda, alor les nou travay e esper 2025 si Seselwa pa kontan ki nou pe fer zot ava deside me zot ki la anndan pa pou ni fors nou fer eleksyon e zot pa ni pou fors nou *resign*. Mersi.

(APPLAUSE)

MR SPEAKER

Onorab Esparon.

HON REGINA ESPARON

Mersi Mr Speaker. Mr Speaker mersi pou donn mon sa loportinite pou fer mon kontribisyon an ver sa Mosyon ki devan nou.

Dabor mon oule remersye Ms Tamatave ek Ms Mohideen pou zot leksplikasyon ki zot in fer bomaten. Mon kapab dir Mr Speaker, apre ki mon'n ekout byen bann rezondet ki sa de madanm in prezant devan nou

Lasanble, zot in sirman ekliersi bann dout e eksplike kote ki pei pou benefisyé atraver sa legzesis pou ferm Korperativ.

E sa i osi fer mwan pli byen konpran akoz ki Gouvernman in pran en tel desizyon. Pou mwan in vin pli kler Mr Speaker, apre ki monn ekout sa prezantasyon akoz ki *IMF* atraver Minister Finans, in demann Gouvernman pou fer sa reform.

Parski ki apre ki *IMF* li menm i ti ankouraze pou *setup* sa Korperativ, in vwar ki pei pa'n benefisyé ditou atraver sa striktir. Me o kontrer in met plis depans ek kontinyen foy trou dan Bidze Gouvernman.

Sa i malgre ki sa lentansyon ti bon. Problem se ki in napa en *business model* pou ki zot vin profitab. Parski nide kree en korperativ, sete pou annan en model ki zer en reveni e fer profi atraver sa servis ki i donnen e pou vin profitab. Pli tar zot kapab debout lo zot prop lipye e kontinyen progrese.

Me kantmenm nou'n vwar kot zot in kontinyen depan lo Gouvernman ; zot in travay lo bann vye model ki ti an plas ki pa neseserman profitab. Pa'n anmenn gran reveni pou soutenir sa striktir.

E menm sa reveni ki zot ti pe kolekte ek bann lorganizasyon non-

gouvermantal, ler zot ti pe ofer sa servis, pa ti pe ganny byen zere.

Mr Speaker, lo konmansman atraver en regilasyon S.I. 89 2029 Korperativ ti ganny laprouvassyoun pou anploy 250 travayer.

Pli tar zot in fer demars pou plis e son lannen answit 2010 S.I. 76. 2010 ti etabli e donn zot pouvwar pou annan ziska 500 travayer.

Ki nou'n vwar apre zot in kontinyen fer demann pou ogmante. E menm si in napa en regilasyon ki permet zot fer sa, zot in ogmante ziska 671. Sa ki ilegal Mr Speaker.

Non pa sa ki Gouvernman in fer. Parski ti annan konsiltasyon atraver Biro Attorney Zeneral pou fer sir ki tou prosedir legal ti ganny swiv pou sa *closure*.

E sa ti vin apre en legzesis entern, ki ti ganny fer par Minister Finans. En *cost effective benefits analysis* pou analiz sityasyon e fer en revi lo depans Korperativ, kot zot ti dekouver ki ti annan bokou *mismanagemet of funds*, bokou manboulouk, bokou *anomaly*; kot serten depans ki ti pe ganny fer, pa ti kapab ganny zistifye, ki donn sa laparans ki zot ti pe protez serten bann alye konpare ek lezot travayer.

E sa in osi fer Gouvernman realize, ki i perdi bokou larzan e i napa kontrol letan ki zot *outsource* bann servis.

Difikilte ki ti aparan, se ler travayer Korperativ i ganny plase dan en departman, oubyen dan en Minister, sa ki ansarz napa okenn kontrol lo li.

Kot parfwa zot menm dir ek bank ki responsab, ki zot pa tonm anba zot regilasyon, akoz zot pa pran lord ek sa ki ansarz, Zot pran lord ek sa ki ansarz korperativ.

Sa i fer ki i annan friksyon dan serten Minister ou departman, ki vwar li difisil pou etabli serten disiplin. E menm si en travayer i annan en problem konportman, sa departman ou Minister, pa kapab dir nanryen Korperativ.

E dan serten landrwa zot ti kree zot prop pti lanpir ki fer louvraz *management* vin difisil. Sirtou letan zot pe zot pa pe perform lo sa standar ki sa departman ou Minister in etabli.

Me i osi annan sa bann madanm ki vreman ti travay alaoter, sa mon felisit zot e mon dir zot kontinyen vin sa model pou lezot.

Dan en *survey* Mr Speaker, fer kot departman ek Minister, in revele ki 53 poursan ki ti fer resorti ki zot

pa ti satisfe ek servis zot ti pe gannyen pou diferan rezon.

Me malgre sa, letan ki Gouvernman in anbark lo sa reform tou travayer Korperativ ti ganny enformen e ganny sa opsyon pou zot reganny anplwaye ki lamazorite in fer li.

E zot saler in reste parey e personn pa'n ganny met deor. La mon koz lo saler debaz. Mon pa pe koz lo *allowance*. Lapel ti ganny fer pou ki tou sa ki ti anvi travay, ti ganny apele pou vin pran bann pozisyon. E bomaten ankor nou'n tann CS Mohideen in osi ankor lans sa lapel ek bann ki anvi reoran travay.

Dan son leksplikasyon Mr Speaker, PS in mansyonnen ki atraver sa legzersis Gouvernman pe fer en *savings* environ R5 milyon. En kestyon ki ti pou bon konnen Mr Speaker, se, konbyen larzan ki sa Korperativ ti pe anmase an deor sa ki Gouvernman ti pe donn zot?

E lekel ki ti pe odit sa bann tranzaksyon. Eski zot ti pe deklar tou zot bann reveni?

Mr Speaker, akoz mon poz sa bann kestyon? Parski Oditer Zeneral pou 2022, kot i annan kot in annan depi dan paz 69 ziska 83 bann lerer ki Oditer Zeneral in vwar, ler ki i ti pe fer son odit.

Petet Mr Speaker, la olye vwar en Mosyon pou *quash* sa *S.I.* nou ti'n devret petet vwar en sesyon *FPAC*, pou kestyonn *Cleaners Corporative* lo bann *anomaly* ki Oditer Zeneral in dekouver ler in fer sa odit, ki i ilistre dan sa rapor. Pa mon ki'n evante.

Zis pou nonm enn de, ler travay ki pa ti regilye; ti annan preferans; i annan ki ti travay 7 er - midi pou menm lapey ek sa ki ti pe travay 7 er - 3 er. I annan ki ti ganny peye pou *standby*. Ti annan en mankman oubyen enn i tonm malad la ki zot ti ganny kriye. Sa zot bann sekreter sekter ek zot bann dalon sa. Sa enn ki ti travay 7 er - midi si i arive ki i bezwen reste plis erdtan, i ti ganny en *allowance* R1500.

Tandis ki sa enn ki ti pe fer zournen plen, li i pa ti ganny nanryen an plis. Sa ki mon pe dir mon pa pe evante. Sa Rapor Oditer in ekrir an blan ek nwanz Mr Speaker.

Ti annan kot kont ki pa ti annord. Kot menm larzan ki Gouvernman ti pe donn zot, pa ti reflekte dan sa kont ki zot ti deklare.

Nou ti tann dir bal dan simityer Mr Speaker. Ki mannyer zot ti mal aprosyonn larzan Gouvernman e menm ti gro, gro kopo lo tranzaksyon lanmor.

La Rapor Oditer Zeneral in montre nou en lot bal dan

Korperativ. Mon dir i byen ki Gouvernman i met en *stop* ek sa bann kalite mantalite.

Dan sa rapor apele "*Special Audit Seychelles Cleaners Corporative*" tou bann Manm *Board* ti ganny en lapel e osi ti pe ganny en *allowance* R1500.

E tou *staff* administratif ti pe ganny peye en saler. Menm en bann plis ki lapey *MNA* avek en *allowance*.

Mon panse ki tou bann manm *Board* i ganny zot konpansasyon la ki Korporativ in fermen.

Ansanm ek lezot *staff* administrasyon ki bomaten nou'n tann dir ki konpansasyon pli o ki'n ganny peye i environ R300 mil.

Mr Speaker, nou'n tandé - nou'n tann koz mank respe pli boner, ler *management* pe anbelir li ek bann lapey plis ki R37 mil, R10 mil, *allowance* R5 mil. Lapey R20 mil ek *allowance* R10 mil, eksetera. Pa i apel mank respe vizavi sa travayer Korporativ ki ou pe donn R8 mil? Zot ava reponn sa pou mwan.

Kot Zidisyer Mr Speaker, de travayer Korporativ ti bezwen *resign* e anploye konman *receptionist* pou zot kapab ganny en saler ki pli o.

La nou'n vwar la ki nou'n vwar en Mosyon pou *quash* sa *S.I.* eski Lopozisyon pe dir nou fer sa bann madanm ki'n fini

ganny zot konpansasyon, ki i annan zot ki'n fini aste zot *fridge*; (mon konnen Jenna in profite in aste son masin lave) mon pe dir nou pe dir *quash* sa S.I. e fer rann sa R29.4 milyon ki'n ganny peye an term konpansasyon? Eski sa en desizyon responsab sa Mr Speaker?

Mr Speaker, en lot *anomaly* ki'n ganny dekouver, kot *casual worker* ki pa ti neseserman lo *payroll*, kot rikord i montre ki environ 2.327 milyon in ganny peye dan sa de dernyen lannen.

Parfwa ou demann ou lekor, ki kalite manboulouk osi in kapab pase dan sa zafer zournen?

Mr Speaker, mon pou dir an terminan avek sa detrwa mo mon pou dir, mon pa vwar mwan kapab siport sa Mosyon anmennen par *Leader Lopozisyon*, pou *quash* S.I. 103, 106, 2023. Parski Mr Speaker, kot keksoz pe marse dan pozitivite napa rezon pou nou trouv an ayer. Mersi.

MR SPEAKER

Bon. Mon ava prezanz apel loter Mosyon *Leader Lopozisyon* pou fer son repons lo deba.

HON SEBASTIEN PILLAY

Mersi Mr Speaker. Mr Speaker, mwan si mon ti annan en desizyon ozordi pou

mwan fer mon ti pou donn tou sa bann *MNA* lot kote latab lapey en *cleaner*.

Mon ti pou zot tou lapey en *cleaner*.

(APPLAUSE)

HON SEBASTIEN PILLAY

Akoz zot in *fail* dan en *basis* obligasyon ki devan zot devan Lasanble, pou zot al rod lenformasyon, e konpran Lalwa.

E sa ki pli enteresan ankor, i se ki dan sa Lasanble - dan sa Lasanble zot in anmenn Avoka dan Lasanble, zot in anmenn sepa konbyen, enn ladan, enn ladan pa kapab fer en zefor *regard* dan ki Lalwa i dir zot tan ki konsern en S.I, enn ladan pa kapab dir zot.

E si zot ti'n regarde Mr Speaker, Onorab Esparon ou mon ser, me selman ennler mon bezwen demann mon lekor si sa *workshop* ki zot in al fer *State House* Lendi in abouti dan gran keksoz.

Me Mr Speaker, Mr Speaker, en S.I. anba seksyon 64(2) ler in fini ganny met an aplikasyon sa ki'n ganny fer in fini pase.

Onorab Andre i sipoze en Avoka i pa kapab dir sa. Onorab Bistoquet sipoze en Avoka pa kapab dir sa? Onorab Naidu pa kapab dir sa? Zot in atak mon *Chairman*

FPAC, mon isi, mon laba. Chairman Standing Orders Committee Mr Speaker, oule dir mwan ou pa fer ou zefor pou ou al gete ou menm ou ava vin dir mon konfize?

La mon ava lir pou ou Mr Speaker. Si Lasanble i pas en rezolisyon pandan 3 mwan, ki en lenstriman i ganny *repeal*, nanryen pa pou fer ki sa bann keksoz ki'n ganny fer i ganny retournen. Savedir *without prejudice to the validity of anything previously done under the Act, under the S.I.*

Be ou pe koz lalang ek Jenna Mrs Esparon. Well, par kont Marie-Lise i dir ou pa pas kot li, Marie-Lise i dir ou pa pas kot li, akoz i ti pe espekte poudir ozordi ou ti pou fer li ganny son R1500 Mr Speaker !

MR SPEAKER

Onorab, Onorab ou'n tann mon dir ou pa kapab akiz lezot Manm lalang *retract silvouple*.

HON SEBASTIEN PILLAY

Non Mr Speaker. Mon pou *retract* sa avek gran ker, mon *apologise* avek mon koleg, i pa ti mon lentansyon dir sa. Senserman sa ki mon pe dir Mr Speaker, se ki zot ti'n devret fer en zefor pou fer zot *homework*.

E la Mr Speaker, dernyen fwa i ti *plagiarize* e li I vin *fail* mwan konman en *teacher maths*. Be sa boug i

unfit to be a Member of the Assembly!

(APPLAUSE)

HON SEBASTIEN PILLAY

He's unfit to be a Deputy Speaker ki pe Chair nou Lasanble ek nou Standing Orders!

Bomaten ou menm ou met mon deor pou ou sa ki mon konnen *Standing Orders* ki ou pa'n kapab fer. *But what is this Assembly coming to, Mr...*

(APPLAUSE)

MR SPEAKER

Onorab, mon'n met ou deor, akoz dezord ki ou ti pe fer dan Lasanble. Pa akoz ou pozisyon ou lo *Standing Order*, oubyen si ou ti pe sey eksplik en keksoz. Konpran mwan byen e aret dir Speaker in vyol *Standing Orders* parey ou kontan dir silvouple.

HON SEBASTIEN PILLAY

Mersi Mr Speaker. ...kan i kler an nwanr ek blan dan Lalwa akoz mon'n gete avan mon vin met sa Mosyon, ki pou arive *the effect of a repeal of an S.I. Interpretation and General Provisions Act* seksyon 64 (2) - napa okenn *cleaners* ki pou bezwen rann okenn nanryen. Sa i kler sa.

Sa ki mwan mon pe demande se ki i *repeal* sa *S.I.*

zot le pran en desizyon Polisi pou zot tir Korporativ tire, me retourñ ek en *clause* ki dir poudir bann kondisyon ki ti egziste avan *repeal* pou ankor egziste apre.

(APPLAUSE)

HON SEBASTIEN PILLAY

Se sa ki apel lazistis sosyal. Se sa ki apel *fairness* Mr Speaker. Ou konnen ki mon'n gannyen apre midi Mr Speaker, largiman ki mwan mon en pti baba, largiman ki mwan mon en pti baba *from* en dimoun Mr Speaker, ki li in vyol konfyans bann vye dimoun e al tir fizi lo tron koko!

Mon'n ganny trete parese Mr Speaker, *from* en dimoun en zanmi en koleg, zis akoz mwan mon pe fer konpanny dan son distrik.

But yes, that is politics Onorab. E Cascade nou pou met ou ater 2025!

(APPLAUSE)

HON SEBASTIEN PILLAY

Grow a thick skin! Mon ganny maltrete toulezour, pa bezwen ankoler ek mwan. *This is politics* Mr Speaker! *But what is not politics, what is wrong.* E akoz LDS i devret out 2025 Mr Speaker, se akoz R1500 ou pa kapab donn en *cleaner* ozordi dan sa Lasanble.

This is what is wrong.
This is what is misleading Mr Speaker.

E *Chief Secretary* i konnen in mal fer, akoz son *demeanor*, son *body language* i montre poudir i konnen poudir i pe *mislead* Lasanble, akoz i ti dir ...

MR SPEAKER

Onorab, ou pe rann repons lo ou deba mon pa kapab met ou deor. Mon pa kapab koup ou mikro. Be selman silvouple respekte e evite dir ki zofisyen in vin *mislead* Lasanble. Fer ou bann largiman, dir kote ou pa dakor, me selman pa dir ki in fer keksoz mal kont son konsyan.

HON SEBASTIEN PILLAY

Mersi Mr Speaker. Mon a eksplik ou. Sa i *Special Report* lo *Cleaners Corporative* ki ti sipoze zis pou Minister Finans, ok mon'n rode monn ganny en kopi. E ki i dir ladan.

Premyerman i pa mansyonn okenn iregalite, nor okenn vol, nor okenn *impropriety*, nor okenn latak lo bann *Management e Board* sa *Cleaners Corporative*.

Alor zot drwa sa bann dimoun en *apology* pou *drag* Mr Speaker, pou *drag* repitasyon sa bann dimoun dan labou ozordi apre midi, e fer krwar poudir sa bann

dimoun in *mismanged* sa Korporativ.

This is unfounded, untrue e malisyé. Zisteman akoz Prezidan Larepublik i anvi fer malis Mrs Denis Mr Speaker. La nou dir.

(APPLAUSE)

HON SEBASTIEN PILLAY

Prezan mon ava montre ou akoz napa Mr Speaker. La la kote Rapor Oditer Zeneral kote sa bann larzan i ale. I apel *salary and service charge. Basic salary en cleaner* dapre Rapor Oditer Zeneral i R6 mil 206; menn en *MNA*, Mr Speaker, *ok - en Minis parey mwan, nou saler i dan Konstitisyon, over R50 thousand.*

Be mwan *at least* mon pe fer en fason ki mon vwar saler ki mon gannyen. Be zot ki zot pe fer?

(APPLAUSE)

HON SEBASTIEN PILLAY

Vin sof sez dan Lasanble pran lakoler ek mwan ler mwan mon anmenn Mosyon?

Si mon pa ti anmenn Mosyon, Gouvernman ti pou napa travay pou fer akoz napa *Bill*.

(APPLAUSE)

HON SEBASTIEN PILLAY

Sa i apel en Gouvernman pares, sa i apel en Gouvernman i responsab Mr Speaker.

E ki sa i dir ou. I dir ou koumsa poudir i annan *cleaner* apre ki in sanze pou travay 7 er - midi, 5 erdtan par zour, par kont dan serten *MDA* depandan natir zot travay zot pou travay plis letan.

E ki arive Mr Speaker? Sa zafer ou travay ek Korporativ ou pe ganny en *survive* ou a rod en *survive*, be Mr Speaker, kote *cleaner* pou al rod en lot *survive*?

Kan Korporativ ti annan li 72 antite Gouvernman. E 20 antite prive.

Be pa i normal? Oule dir mwan nou pou lager, nou pou *begrudge* en *cleaner*? En *cleaner* ki ganny R8 mil. R8 mil nou pou *begrudge* en dimoun? Be *come on!*

Sa i bann dimoun ki nou konman en *MNA* lo Konstitisyon nou *swear* pou nou defann Mr Speaker.

E rezon akoz mon'n anmenn sa Mosyon Mr Speaker, la mon met lo rikord e Minister Finans i a demanti mwan. Mon'n fer en plizyer *call* kot zot depi lannen pase, pou enform zot plizyer dimoun ki pe ganny en afekte ek desizyon. Sa in ale, vini.

Finalman monn *fed up* Mr Speaker mon dir napa swa vin ek en Mosyon zot ava bezwen vin devan vin eksplike, e apre zot a bezwen pran desizyon.

Mr Speaker, atraver ou mon bezwen demann Onorab Bastienne depi kan 128 dimoun i en pti git dimoun? 128 dimoun miltikiye par 4 means pran 130 miltikiye par 4 Mr Speaker, ou pe ganny ou *over 4 hundred* dimoun, *4 hundred* dimoun dan en fanmir, *ok*, plis ki 520 dimoun Mr Speaker.

Akoz ou annan en fanmir ki asosye ek sa *cleaner*. 520 dimoun e 520 dimoun i en pti git dimoun ki ganny afekte? *LDS shame on you. Shame on you* Mr Speaker! E ki mon pe demann ou? Mon pe demann ou en keksoz ki senp, *repeal* sa *S.I*, retournen.

Mwan mon oule zis en keksoz ki pou satisfer mwan, en *clause* ki dir mwan poudir an nwar e blan pran parol Mr Speaker, *because* nou nepli kapab *trust* parol Gouvernman. Akoz ler Gouvernman i dir nou en keksoz i sanze. E dir nou dan sa dokiman ki zot pou kit bann kondisyon parey. E si zot kapab azoute *all the better*, azout en keksoz lo la.

Be Mr Speaker, nou'n ariv en staz kot akoz nou vin en *MNA* nou'n bliye kot nou sorti? Nou bliye akfer nou la.

E la ki nou'n gannyen ankor Mr Speaker, nou'n ganny latak ganny fer lo bann *cleaners* ki se sa bann madanm ki pe gard lopital sal. *But how - come on* Mr Speaker! I bezwen annan en keksoz ki pa *click* la anler ek nou!

E sa sanmenm sa rezon ki Seselwa dan son gran mazorite pe konmans pa oule zot devan zot laport. Pa i vre Onorab Hoareau? Se sa Mr Speaker. Sa madanm ti li rezon, akoz dimoun pa oule zot devan laport se akoz zot tro dir en keksoz apre fer en lot.

Sa nou problem ki nou annan Mr Speaker. E nou, nou pas nou letan la apre midi nou debat lo en size ki monn anmennen ki *straight forward*. Zot antak mwan, zot antak Mrs Denis, zot antak US.

Be Mr Speaker mwan mon oule met en keksoz lo rikord. Tou sa bann Manm ki'n koz lo ansyen Gouvernman avan *ok*. Onorab Andre, Onorab Bistoquet, Onorab Porice, annou konmanse Onorab Andre *former SPPF*. Onorab Bistoquet *former SPPF*, Onorab Porice *former SPPF*, Onorab Zialor oli zot labous sa letan, ti soude?

Mr Speaker, annou arete konmsi fer nou krwar poudir nou pli Katolik ki Lepap. Sel dimoun ki kapab fer nou krwar i pli Katolik ki Lepap Mr

Speaker se Prezidan akoz se li ki'n al resaman kot Lepap. *Because there's something seriously wrong dan sa pei. There's something seriously wrong.*

E mwan tou sa ki mon ti pe rode Mr Speaker, se menm provizyon ki nou'n met dan sa bann Lalwa ki nou'n *repeal* nou mete pou bann *cleaners*.

Akoz si sa *cleaner* ti pe travay dan sa lorganizasyon, i ti pou benefisyé avek sa *clause* li. Me malerezman li i pa ti anploye par sa lorganizasyon, alors i pa'n ganny benefis. Sete sa ki nou pe rode. Lazistis.

E akoz sa i pa zis 128 dimoun ki ti'n ganny afekte. Ti annan plis e i ankor annan plis Mr Speaker. E sa ki ti *Chief Secretary* in dir nou i pa korek, akoz Rapor Oditer Zeneral i kler lo kote bann keksoz in ale lo ki mannyer bann sityasyon in pase.

I ti ava'n fer referans ek en rapor ki Gouvernman in dir, i form labaz pou li ferm Korporativ. Be ou konnen ki'n arive Mr Speaker. Onorab Loze i annan rezon dir sa - ler *Board* Korporativ ti ekrir Minister Finans, zot pa'n reponn. Zot pa'n enterese pou ekout. Akoz zot ti'n fini fer zot desizyon, i byen.

Be oule koriz *anomaly* oule koriz *whatever*, fer ou. Me pa pini bann dimoun ki pe

travay. *This is wrong* Mr Speaker.

E la mon oule met en lot keksoz devan ou Mr Speaker. Ankor enn fwa mon pou dir ankor enn fwa, wi si mon ti annan en swa mon ti pou pey zot saler sa bann *cleaners*, akoz zot in *fail* konman en MNA. Personn pa al get Lalwa Korporativ ki mannyer *Cleaners Corporative* ti formen Mr Speaker.

E *Cleaners Corporative* ti formen anba sanksyon Minis pour Finans. *It's in the law.* Alors Onorab Andre ler ou dir zot ti sipoze pe fer larzan, ki larzan zot pou fer se Minister Finans ki kontrol zot?

E ki Oditer Zeneral in idantifye. *If there is a discrepancy* - si i annan en keksoz ki mal Mr Speaker ki Oditer Zeneral in *find out* se ki in annan *failure for monitoring on the part of the Ministry of Finance*.

E ki from 2019 ek 2020-2021 Minister Finans ti'n fini fer son desizyon alors i ti pe *avoid* angaz li avek *Cleaners Corporative*. Se pou sa rezon Mr Speaker e mon ava montre piblik Seselwa akoz Minister Finans ki ansarz, *unlike* tou lezot Korporativ kot bann manm i bezwen zwenn pou dizourd sa Korporativ, *Cleaners* Korporativ i ganny dizourd koumsa li; anba seksyon 16 son Lalwa i dir ou

"dissolution of a corporative and ... Committee where the Minister is of the opinion...."

Savedir ler Minis i dan lopinyon ki devret dizourd se li ki dizourd. Minis i dizourd apre i blanm *Board Korporativ?*

Me zis parey in taye dan *roadblocks* alor i pa pran responsabilite pou sa. Mon pa'n zis vin devan Lasanble pou amenn sa Mosyon pou fer *cheap politics* Mr Speaker.

Mon'n anmenn sa Mosyon pou travay pou en sor travayer, zis parey sa enn semenn pase, mon ti anmenn li pou sor bann Pralinwa e in prouve i realite. Ozordi mon'n anmenn li sort bann *cleaners*. E *next* Mr Speaker, mon annan ankor en Mosyon ki pe vini mon pe donn zot travay pou fer, akoz i paret zot napa travay pou fer.

E la mon pe demande *next week* ki tou bann Lagreman, tou bann negosyasyon enternasyonal ki zot fer, zot vin devan Lepep Seselwa pou eksplike, zot vin devan Lasanble pou eksplike.

Mwan ki bezwen travay pou Lepep Seselwa. Me selman mazorite i ek zot. Ki mannyer ou kapab annan en group MNA Mr Speaker ki *fail in their duty of care, fail miserably in your duty of care* pou zot kapab defann lentere bann dimoun ki'n met zot la?

E zot pe pas zot letan zis fer sa ki zot Gouvernman i dir zot.

Mr Speaker, mwan mon'n deza dan en mazorite ki ti koumsa mwan. *I know, me zanmen nou pou pran en mazorite koumsa ankor nou.* E sa ki Lepep Seselwa pe war Mr Speaker, se ki sel fot ki'n fer 2020 se dan zot mazorite dan sa Lasanble!

(APPLAUSE)

HON SEBASTIEN PILLAY

Akoz si nou, nou ti annan mazorite ni koup mikro, ni ganny met deor, ni *Motion to adjourn* pa ti pou gannyen. Minis ti pou reponn, Minis ti pou koze e lepep ti pou tande e *cleaners* ti pou ganny zot larzan.

(APPLAUSE)

HON SEBASTIEN PILLAY

Malerezman Mr Speaker, mon napa en mazorite e i kler poudir ki mannyer zot in *move*, ki mannyer zot in koze zot pou vot kont sa Mosyon.

Zot pou vot kont lefe ki dan en pei demokratik e modern ozordi, kot dimoun ki ganny sa o saler ou ganny ou, i annan ki ganny 5 fwa saler *cleaner* - 5 fwa saler *cleaner* nou pa kapab vwar R1000 pou retourn lo saler en *cleaner*. Nou pa kapab vwar R1500 pou retourn lo saler sa *cleaner* dan

lopital ; sa *cleaner* kot *met office* i travay li tousel netway *met office*, avek sa lot *block* tou. Tousala nou pa kapab vwar Mr Speaker.

Nou pa kapab vwar ou konnen akoz? Akoz nou'n vin arogan ek pouvwar. Nou'n sitan vin arogan ek pouvwar ki nou'n blye kot nou sorti. E preznan ki i arive, nou nepli kapab eksplike konman *MNA* ki mannyer pou eksplike. Alors ki nou bezwen fer? Nou bezwen *rely* lo *expert* pou vin devan Lasanble. Lo teknisyen pou vin devan Lasanble.

Be teknisyen I annan letan pou li eksplike. Ler i fer son *S.I.* i devret eksplike. Nou rol konman Manm Parlman se *hold the Executive to account*. Be i paret Mr Speaker ki nou *US* nou bezwen zwe kont refri, nou bezwen zwe kont *linesmen*.

Mon ti krwar poudir nou bezwen zwe kont sa boug ki vey deor sa boug ki anpes dimoun antre dan soz, be la li osi i paret mwan poudir li osi i lo laplenn pe zwe kont nou.

Finalman konbyen zwer pe zwe kont nou? Se sa ki Seselwa in donn nou. En demokrasi a la diktatir, en demokrasi a la diktatir ek en Lasanble Nasyonal, ki son moto se "*Serving a modern dictatorship*" se sa ki nou annan Mr Speaker.

(APPLAUSE)

HON SEBASTIEN PILLAY

Mon vwar ou pe ganny letan Mr Speaker, ou pe dir mon aret koze. Mon al ver mon konklizyon Mr Speaker.

Mr Speaker, Lepep Seselwa in vwar ozordi klerman e bann ki ti pe ekout mwan, zot in vwar lekel ki dan zot kote, e zot in vwar lekel ki pa dan dan zot kote. Zot in vwar ki sa promes Mr Speaker ki ou menm ou atraver ou ou ti fer pandan konpanny eleksyon *LDS*, ki donn ou en mazorite avek ou tim ki nou *hold Gouvernman to account*. Ou pa pe fer li ou pa pe kapab fer li.

Zot in vwar ki mannyer dan mazorite distrik zot in met bann *MNA LDS* zis nou flat Minis, nou dir Minis be en bon travay, bon keksoz me selman nou pa pare pou nou *hold government accountable*.

Zot in vwar ki mannyer zot Prezidan a plizer repriz i fer mars ayer lo tou keksoz in dir. Apel nou en Gouvernman kanmaron Mr Speaker i paret mwan Onorab Porice pe get dan laglas, akoz i pe vwar en gro kanmaron!

(APPLAUSE)

HON SEBASTIEN PILLAY

Mr Speaker, son problem ki nou annan ozordi - son

problem ki nou annan ozordi se ki zot pa kapab rekonsilye ek lefe ki lepep pe dir en keksoz - en keksoz. E sa se ki *LDS 2025 OUT!* Mersi Mr Speaker.

(ADJOURNMENT)

MR SPEAKER

Onorab, mon'n ekout ou ek pasyans, mon zis redir ou ou napa okenn lesion pou donn mwan dan demokrasi ...

(APPLAUSE)

MR SPEAKER

... ni okenn lesion pou donn mwan lo diktatir, oubyen ki mannyer pou tret dimoun ki o poz en Gouvernman ki o pouvwar.

Manm i ava vot lo sa Mosyon. Manm ki an faver lev lanmen silvouple? Manm ki kont?

Lo Mosyon an ankor avek seksyon 64(2) *Interpretation General Provision Act* ki sa Lasanble i rezourd pou *quash* S.I. 106 2023 8 Manm in vot pour 17 Manm in vot kont, 0 Manm in *abstain*. Mosyon in ganny rezete par Lasanble.

(APPLAUSE)

MR SPEAKER

Lasanble i ava *adjourn* ziska Mardi prosen. *Adjourn*.